

## Xtiidxza'c Jesucrist ni bacaa San Lujc

### *Rxhiaal Lujc gui'ch loj Teófilo*

<sup>1</sup> Zien ree b́en ma been naguiejn gucaa ni goc con dunuj ree,

<sup>2</sup> zi'cgajczi balüü ree bejn dunuj ree, b́en baguiaa ree diisd guia'xchej ni been Jesús nē ni guzacaman, gutie'ch tēē reeman xtiidxaman.

<sup>3</sup> Naj baguixnejzchaaw diisd guia'xchejn, dad Teófilo, zeel naladxan zagdxen gucanan xnejz par lüj,

<sup>4</sup> din chignia'l zagdxe diidxli balüü reeman lüj.

### *Rugojn tijb anjl gal Waj*

<sup>5</sup> Tiamp gunabee rey Herodes guidib niz Judea, guyu tijb bixhioz brii laj Zacarías, bachajgaman tib cwaa ree bixhioz brii laj xbejn Abías. Xbéngunaa Zacarías brii laj Elisabet, zaman loj xdiaa bixhioz brii laj Aarón.

<sup>6</sup> Grop reeman gubajn xnejz loj Dios bazoob tēē reeman diidx graczi ni rniabee Dios, abi' achut rile' guiēb guial rajp reeman dol.

<sup>7</sup> Per achut xi'n reeman guyu guial ad gojct niu xi'n Elisabet, grop reeman ma naj bengol.

<sup>8</sup> Tijb dxej ni bayal ree bixhioz no'ch Zacarías loj, been reeman sirv loj Dios,

<sup>9</sup> zi'c naj xcostumbr ree bixhioz guin, gudx-ijt reeman suert din guidoon chu yayal gudxe'

goxyaal lën yadooro' Jerusalén, abi' bayal Zacarías cu'man goxyaal guin.

<sup>10</sup> La'tgaj cagu'man goxyaal guin, gra ree bejn riga' lule' cabejdx canab reeman Dios.

<sup>11</sup> Dxel balüüloj tijb xianjl Dios loj Zacarías, za'liman xladbee altar lod cayu goxyaal guin.

<sup>12</sup> Chi baguiaa Zacarías anjl guin, ad badxejlt xhie nüjnman, dád bidxebaman.

<sup>13</sup> Per rëb anjl guin:

—Zacarías, ad rdxebil ma bacaagdiajg Dios ni gunabil. Chu' xi'n xbéngunaan Elisabet, gaquix xinguaaw abi' yagu'l lajx Waj.

<sup>14</sup> Yabaa da'til, në zien ree bejn yabaa chi galix,

<sup>15</sup> guial gaquix xin lasajc loj Dios. Ad zë'tix vin ni'qui ni gusüdx laax. Abi' diizd chi gadix gal mal za'në xSprijt Dios laax.

<sup>16</sup> Por laax zien ree bën Israel yayejc loj xDad reeman Dios.

<sup>17</sup> Laax ned lojman, chu' xSprijt Dios luxdoox gap tëëx gualrniabee zi'c Elías, bën badëë xtiidx Dios loj ree bejn, yabe'cdxex bën naj ree dad con xi'n reeman, gulüü tëëx bën ad ruzoobt ree diidx din guzuxnejzix bejn ree guidxga' reeman laaman chi gui'taman.

<sup>18</sup> Dxel rëb Zacarías loj anjl guin:

—¿Xhienaag gagbeen guial gac cumplid ni nal? Din naj con da béngunaan ma nayajcan bengol.

<sup>19</sup> Badxi' anjl guinan rëbaman:

—Naj naj Gabriel, rünan sirv loj Dios, laaman guxhaal naj zidnë'n diidxza'c guie lojl.

<sup>20</sup> Per yan guial ad bililadxtil da diidxan, yaya'nl gop ad zajct guinieel xt guidxin dxej gal xindo guin.

21 Guiáad ree ben riga' lule' guin cabëz reeman Zacarías yu' nawëëg reeman guial cayaglaaman lën yadoo guin.

22 Chi bariiman ad rajctri rnieeman, gaz sen rüjnman guial ma baya'nman gop. Dxel gogbee reeman guial yu' xhie baguiaaman lën yadoo guin.

23 Zianz baza' ree dxej ni been Zacarías sirv lën yadoo guin, dxel zia lidxaman.

24 Chi gudëd ree dxej guin, guyu xi'n xbéngunaaman Elisabet. Gaay bëëw tib guyuzaman lënü, rëbaman:

25 “Ze naj ni beennë Dios naj lën ree dxej guie chitëë guze'ri ree bejn naj.”

### *Rugojn tijb anjl Li gal Jesús*

26 Ni goc xho'p bëëw, guxhaal Dios anjl la Gabriel luguiedx Nazaret ni riga' niz Galilea,

27 din chignajman tijb biinxdüb lam Li. Ma naj tia' tijb xin la Xiëb laam, xin zëed loj xdiaa rey Davi.

28 Guyu anjl guin lod yu' Li abi' rëbaman:

—¡Xchan Li, Dios ma gulej lüj! Dios za'në lüj, ma beenle' tëëman lüj loj gra ree béngunaa.

29 Chi baguiaa Li anjl guin dád badxa lojm guial rëbaman zian, abi' gunabdiidxim xhie rën guiëb ree diidx guin.

30 Dxel rëb anjl guin:

—Li, ad rdxe bil din lüj gule Dios beenle' tëëman lüj.

31 Chu' xi'n'l, abi' chi galaman yagu'l lajman JESÚS.

<sup>32</sup> Laaman gac bén zojbloj, guiniee ree bejn laaman Xi'n Dios bén yu' xanyabaa. Güün dux Dad ree Dios laaman rey zi'c goc xdiaagulalaman Davi,

<sup>33</sup> din nabeeman bén Israel ree xt goctëez, abi' xgualrniabeeman ad yu't dxej loxan.

<sup>34</sup> Dxel rëb Li loj anjl guin:

—¿Xhienaag chu' da xi'n nan awa achut bénguiaaw nabannë'n?

<sup>35</sup> Badxi' anjl guinan rëbaman:

—Por xSprijt Dios chu' xi'nl, abi' xgualrniabee Dios bén yu' xanyabaa gusiaawan guijquil con xbalan. Zeel xi'nl bén gal, gacaman naya nali abi' guiniee ree bejn laaman Xi'n Dios.

<sup>36</sup> Ziangajc lasa'l Elisabet ma yu' xi'nman, majsi ma najman bengol, bén rëb ree bejn ad zajct chu' xi'n, per yan ma gojc xho'p bëew yu' xi'nman.

<sup>37</sup> Din Dios graczi zajc güünman.

<sup>38</sup> Dxel rëb Li loj anjl guin:

—Dios naj bén rniabee naj, gacza zi'c rënman.

Ziat anjl guin.

### *Rignaj Li Elisabet*

<sup>39</sup> Lën ree dxej guin wej Li cari da't tijb guiedx ni riga' lad ree guia' niz Judea,

<sup>40</sup> dxel guyum lënü lidx Zacarías, bagajpdiozim Elisabet.

<sup>41</sup> Chi biguiejn Elisabet cha'm cugajpdiozim laaman, laa baniib gajc xindobëz yu' lënman, dxel guyu xSprijt Dios luxdooman guidiblagaa.

<sup>42</sup> Abi' gunee Elisabet rejs, rëbaman:

—¡Dios ma beenle' lüj loj gra ree béngunaa, beenle' tëeman bejndobëz yu' lën!

<sup>43</sup> ¿Chuza najn zeel zidganaj xniaa da Diosan naj, b́en rniabee?

<sup>44</sup> Din biguiejnzan cha'l bagajpdiozil naj, laa baniib gajc da bindoon ĺenan guial babaam.

<sup>45</sup> Xiquilbaal guial bililadxil, din gac zi'c bagojn Dios ĺuj.

<sup>46</sup> Dxel ŕeb Li:  
Ruzatan Dios zagdxe,

<sup>47</sup> rabaan' t́een laaman, guial ragńeman naj.

<sup>48</sup> Guial baguiaaman naj, majsi biin ŕujnzi sirv lojman naj.

Abi' diizd yan xt goct́eéz guza't ree bejn naj, guiéb reeman xiquilbaam.

<sup>49</sup> Din Dios, b́en rniabee, d́ád zro' naj ni ma beenńeman naj.

Naya naliman.

<sup>50</sup> Ad rb́eýt rayaman graczi ree b́en ruzoob xtiidxaman.

<sup>51</sup> Zro' naj ni ma beenman con xguialrniabeeman. Base'nman xixgab ree b́en ŕujn benro',

<sup>52</sup> biquiedaman guialrniabee loj ree b́en rniabee, guiáad loj ree b́en ad zojblojt bad́eeman guialrniabee loj reeman.

<sup>53</sup> Bad́eeman guialnaza'c loj ree b́en biaadx guialraw,  
guiáad ree benrijcw basa'nman laa reeman zezi.

<sup>54</sup> Gogńeman b́en Israel ree, xbejnman, abi' ad bayanladxtaman nayaman laa reeman,

<sup>55</sup> zi'c ŕebaman loj dux b́engulal ree, Abraham ńe loj ree xdiaaman.

<sup>56</sup> Abi' baya'nńe Li Elisabet cost choon b́eew, dxel baguiaaj lidxim.

*Rajl Waj*

<sup>57</sup> Chi bidxin dxej gojl xi'n Elisabet najx xinguaaw.

<sup>58</sup> Abi' gogbee ree lasa'man në ree bén zobj gajxh guial baya Dios laaman, dád babaa reeman bignaj reeman laaman.

<sup>59</sup> Chi ma gojc xindobëz guin toxman, dxel binë reeman laax guyux sen ni ru ree bén Israel. Abi' guyën reeman nagu' reeman lajdoox Zacarías zi'c la xdadix,

<sup>60</sup> per gunee xniaax, rëbaman:

—Ad zayutan zian. Rayal gaquim Waj.

<sup>61</sup> Dxel rëb reeman lojman:

—¿Chexquiza zeel gaquix Waj? Achut ree lasa'l la zian.

<sup>62</sup> Abi' con sen gunabdiidx reeman loj xdad xindobëz guin chu rënman grii lajx.

<sup>63</sup> Zianz gunabaman tibia' tabl abi' bacaaman lojn: “Waj grii lajx.” Dád badxaloj gra ree bén guin.

<sup>64</sup> Loj hor ziigajc gojc banee Zacarías, abi' guzuloj cuza'taman Dios zagdxe.

<sup>65</sup> Gra ree bén zobjnëman gajxh dád badxa loj reeman, xt gra ree guiedx riga' lađ ree guia' niz Judea gogbee reeman graczi ni goc.

<sup>66</sup> Guiáad graczi ree bén gogbee zian, rniabdiidx loj lasa' reeman, rëb reeman:

—¿Chu gac xindo guin ya'n chi ni'six?

Rëb reeman zian guial laa rguien gajc ma beenle' Dios laax.

### *Ni gunee Zacarías*

<sup>67</sup> Zacarías, bén naj xdad xindo guin guyu xSprijt Dios luxdooan guidiblagaa, zianz guzuloj canee-man, rëbaman:

- 68 Benza'c bendxoon naj Dios, dux Dad ree nayajc ree b́en Israel,  
 guial bi'taman bidganajman dunuj ree nayajc ree xbejnman, bidgalēē tēēman dunuj ree loj ni cayza'c ree.
- 69 Guxhaalaman tijb b́en rajp guialrniabee din yabēēman dunuj ree loj ni cayza'c ree,  
 zēēdaman loj xdiaa rey Davi, b́en naj xbejn Dios.
- 70 Zi'c been Dios promejs diizd gocli, zian gunee ree b́en badēē xtiidxaman loj ree bejn, b́en guban ree zi'c rēnman:
- 71 guial yabēēman dunuj ree loj ree b́en ralen dunuj ree, nē loj gra ree b́en yu'xyajn dunuj ree,
- 72 yaya tēēman dux b́engulal ree,  
 abi' ad zayanladxtaman promejs ni beenman.
- 73 Ni ne naj promejs ni beenman loj dux b́engulal ree Abraham:
- 74 guial yabēēman dunuj ree loj ree b́en ralen dunuj ree,  
 din chile' yaguieen ree sirv lojman sin guialrdxeb,
- 75 yabajn ree yaguieen tēē ree zi'c rēnman, guidib tiamp ni yabajn ree.
- 76 Guiáad lūj xi'n, guiniee ree bejn lūj b́en rudēē xtiidx Dios loj ree bejn, Dios yu' xanyabaa.  
 Din nedil chiguieenchaawil xnejz b́en naj Dad,
- 77 gulūū tēēl xbejnman din gagbee reeman xhien-aag gac xtol reeman perdon,  
 laa tēē reeman loj casti.
- 78 Guial raya da't dux Dad ree dunuj ree,  
 zeel guxhaal xi'nman, b́en naj zi'c xbacha' gubijdx din gusniman du loj ree,

<sup>79</sup> guixhial tēēman xquiarguiejn ree bēn zē loj ne-  
jzmal, bēn ad nabant ree xnejz zi'c rēn Dios,  
gulüü tēēman dunuj ree yadxoo ree loj xnejzaman  
din yabajn ree zagdxē sin wadijl.

<sup>80</sup> Guiáad xindo guin guni'six guyu tēē xqui-  
arguiejnx mazri por Dios. Guzujx loj yujbidx, xt  
bidxin dxej guneex xtiidx Dios loj ree bēn Israel.

## 2

### *Rajl Jesús*

*(Mt. 1:18-25)*

<sup>1</sup> Lēn ree dxejzii gunabee rey César Augusto  
guiyab gra ree bejn guidib lod rniabeeman.

<sup>2</sup> Laan naj ni yaloj biyab ree bejn chi goc Cirenio  
governador Siria.

<sup>3</sup> Graczi ree bejn naj yaguiaj ladx ladx din  
guiyab reeman.

<sup>4</sup> Zianan zeel brii Xiēb luguiedx Nazaret ni riga'  
niz Galilea, wejman Belén, ni riga' niz Judea, lod  
gol rey Davi din loj xdiaa rey Davi zēēd Xiēb.

<sup>5</sup> Wejman binēman Li, lacheelaman din guiyab  
reeman. Ma yu' xi'n Li.

<sup>6</sup> Abi' la'tgaj za' reeman Belén, bidxin dxej gojl  
bejndobēz guin.

<sup>7</sup> Yagaj gol xi'n yaloj Li, dxel batüübaman bejn-  
dobēz guin lajd, gudijxhaman laaman lod ru ni  
raw ree be, guial ad bidxejlt lēnü naya'n reeman.

### *Bidxin ree xianjl Dios lod za' ree bēn rajp xiil*

<sup>8</sup> Gajxh Belén guin za' ree bēn rajp xiil, abi'  
dajn guin gajc rdēd reeman guiaal rajp reeman laa  
reeb.



<sup>9</sup> Dxejczy balüüloj tijb xianjl Dios loj reeman, naynidxuj basni xbiani Dios lod riga' reeman abi' dád bidxeb reeman.

<sup>10</sup> Per rëb anjl guin loj reeman:

—Ad rdxebidi din zidnë'n diidxza'c lojdi, por laan yabaa gra ree bejn.

<sup>11</sup> Yan, ladx rey Davi ma gojl bën yabëë lëjt loj ni cazajquidi, laaman naj Cristo, laaman naj Dad.

<sup>12</sup> Abi' din yayünbeedi laaman; nadüübaman lajd, naga'man lod ru ni raw ree be.

<sup>13</sup> Dxejczy balüüloj zien da't ree anjl cwë' anjl yaloj guin, ruza't reeman Dios zagdxë, rëb reeman:

<sup>14</sup> ¡Benza'c bendxoon naj Dios bën yu' xanyabaa, abi' loj guidxliuj yabe'cdxëman luxdoo bën rüjn ree zi'c rënman!

<sup>15</sup> Chi ma zia ree anjl guin xanyabaa, dxel rëb loj lasa' ree bën rajp ree xiil guin:

—Yo' ree Belén yuquiaa ree ni goc ni, zi'c ma bagojn dux Dad ree Dios dunuj ree.

<sup>16</sup> Dxel cari da't zë reeman, abi' bidxaagloj reeman Li në Xiëb, nëtëë bejndobëz guin naga'man lod ru ni raw ree be.

<sup>17</sup> Chi baguiaa reeman laaman, be reeman diidx ni rëb anjl guin loj reeman xcwent bejndobëz guin,

<sup>18</sup> abi' graczi ree bën biguiejn dád badxa loj reeman ni rëb ree bën rajp ree xiil guin.

<sup>19</sup> Per Li, rgu'chaaw luxdooman gra ni rucaag-diajgaman, rüjn tëëman laan xgab.

<sup>20</sup> Dxel zia ree bën rajp ree xiil guin, rabaa reeman rudëë tëë reeman quixtëë loj Dios por gra ni baguiaa reeman biguiejn tëë reeman, guial gojc zi'c rëb anjl guin loj reeman.

*Binë reeman Jesús lën yadooro' Jerusalén*

<sup>21</sup> Chi ma gojc toxman gojl bejndobëz guin, badxe' reeman laaman sen ni ru ree bën Israel, bagu' tëë reeman lajman Jesús zi'c rëb anjl guin loj Li chi gad Jesús gacxhiey lënman.

<sup>22</sup> Chi bayaaloj ree dxej ni been Li zi'c rüjn ree béngunaa rajl xi'n, dxel binë reeman bejndobëz guin loj Dios lën yadooro' Jerusalén.

<sup>23</sup> Been reeman zian din loj ley guin ca: “Gra ree xindoniguiaaw rajl yaloj ma naj reex par Dios.”

<sup>24</sup> Abi' binë reeman gon par Dios zi'c rniabee ley: rayal chinë reeman tio'p gugdoo o tio'p palomdoo.

<sup>25</sup> Tiamp zii zojb bën la Simeón Jerusalén. Najman benza'c rën tëëman Dios, rbëzaman bën gagnë bën Israel ree za'në tëë xSprijt Dios laaman.

<sup>26</sup> Abi' por Sprijt guin gogbeeman guial ad zëjttaman xt guguaaman Cristo, bën guixhiaalaman.

<sup>27</sup> Dxel por xSprijt Dios wejman lën yadooro' Jerusalén. La'tgaj yu'man lën yadoo guin, Xiëb con Li bidxinnë reeman Jesús din güün reeman zi'c rniabee ley,

<sup>28</sup> zianz gudiidx Simeón bejndobëz guin baza'taman Dios zagdxe, rëbaman:

<sup>29</sup> Dad, yanri ma babedxe luxdon.

Ma zajc guslaal naj guiëtan

najn xmojsil, ma gojc zi'c nal.

<sup>30</sup> Din con quijb guiaalon ma baguian bën gagnë dunujn.

<sup>31</sup> Guial ma bazujl laaman loj gra ree bénguidxliuj.

<sup>32</sup> Laaman naj biani par ree bën ad najt bën Israel, naj tëëman bacha' par ree xbën Israelil.

<sup>33</sup> Guiáad Xiëb con xniaa Jesús dád badxa loj reeman ni biguiejn reeman rëb Simeón xcwent bejndobëz guin.

<sup>34</sup> Dxel beenle'man laa reeman, zianz rëbaman loj Li xniaa Jesús:

—Li, Dios bacaabee bejndobëz guie din por laaman zien da't ree bën Israel laa loj dol, per zien reeman yaya'n loj xtol. Zidgalüüman bejn ree conin naj ni ruladx Dios, per zien reeman ad zënt laaman.

<sup>35</sup> Abi' zian gagbeeman xhienaag naj xixgab tijbgaj bejn, guiáad lüj zi'c tijb espad chëëz luxdool chi gac ree ni guin.

<sup>36</sup> Yagaj gajc za' tijb béngunaa yo'xh laman Ana, rudëëman xtiidx Dios loj ree bejn, xdadaman brii laj Fanuel, xdiaagulalaman gojc Aser. Benguiagan chi cwa' xinguaaw laaman, abi' gajdx ijsi gubajnnë lacheelaman.

<sup>37</sup> Ma gojc tajpgajlbitap ijz baya'nman bizëjb. Zianczi yu'man lën yadooro', rba'nman rbejdx rniab tëëman Dios.

<sup>38</sup> Loj hor ziigajc bibigaman lod za'në Xiëb Li con Jesús, guzuloj cudëëdaman quixtëë loj Dios cuza't tëëman bejndobëz guin loj gra ree bën cabëz guixhiaal Dios bën gagnë bën Jerusalén ree.

### *Zia reeman Nazaret*

<sup>39</sup> Chi ma been reeman graczi ni rniabee xley Dios, dxel zia ladx reeman Nazaret ni riga' niz Galilea.

<sup>40</sup> Cani's bejndobëz guin, cayuman gojl, cayajcaman nasin, cayüjnle' tëë Dios laaman.

### *Yu' Jesús lën yadooro' Jerusalén*

<sup>41</sup> Gazob ijz rej ree xdad Jesús Jerusalén lanij pascw.

<sup>42</sup> Chi baza' Jesús chiptio'p ijz, binë ree xdadaman laaman lanij zii zi'c naj xcostumbr reeman.

<sup>43</sup> Chi ma gudëd lanij guin, baza ree xdad Jesús ma zia ladx reeman. Ad gogbeet reeman baya'n Jesús Jerusalén.

<sup>44</sup> Gunaladx reeman ma no'chaman loj ree bén zia. Zian guza reeman tibdxej. Per chi baguiil reeman laaman loj lasa' reeman në loj ree bén nünbee reeman,

<sup>45</sup> achut laaman naguiee. Dxel bayejc reeman zia reeman Jerusalén zatijb zigdiil reeman laaman.

<sup>46</sup> Xt ni gocri choon dxej badxejl reeman laaman lën yadooro' Jerusalén, zojbaman galay ree mextr rajc ley, cucaagdiajgaman canabdiidx tëëman laa reeman.

<sup>47</sup> Gra ree bén caguiejn ni rnieeman caydxaloj reeman guial rajcaman në ree diidx radxi'man.

<sup>48</sup> Chi baguiaa ree xdadaman laaman, dád badxaloj reeman, dxel rëb xniaaman:

—Xi'n, ¿chexc zeel basajquil dunujn zian? Xdadil con naj dád nadxu'n xgab caydiilan lüj.

<sup>49</sup> Badxi' Jesús laan rëbaman:

—¿Chexc zeel raguuilidi naj? ¿Nid ragbeedi ya rayal gūnan xchiin da Dadan?

<sup>50</sup> Per ad bignia't reeman xhie rën guiëb ni rëbaman.

<sup>51</sup> Dxel bayejcnëman laa reeman zia reeman Nazaret, graczi xtiidx ree xdadaman ruzoobaman, guiáad xniaaman graczan rgu'chaaw luxdooman.

<sup>52</sup> Zi'cri cani's Jesús cayu tëë mazri xquiar-guiejnman. Rabaanë Dios laaman rabaanë tëë ree bejn laaman.

### 3

#### *Rzuloj Waj rulüüman xtiidx Dios (Mt. 3:1-12; Mr. 1:1-8; Jn.1:19-28)*

<sup>1</sup> Chi goc chiin ijz rniabee rey Tiberio, abi' Poncio Pilato najman gobernador Judea, Herodes najman gobernador Galilea, bijchaman Felip najman gobernador Iturea në Traconite, guiáad Lisantias najman gobernador Abilinia.

<sup>2</sup> Anás në Caifás naj reeman bixhioz rniabee gra ree bixhioz. Lën ree dxej zii gunee Dios Waj, xi'n Zacarías lod naj yujbidx.

<sup>3</sup> Dxel gudëd Waj graczi ree guiedx riga' ro' guiiw Jordán, rëbaman loj ree bejn din yayüjn reeman xgab por xtol reeman tiobnijs tëë reeman, din güün Dios xtol reeman perdon.

<sup>4</sup> Zian gojc cumplid ni bacaa Isaías bën badëë xtiidx Dios loj ree bejn, lod rëbaman: Rguien cha' tijb bën rbidxa' loj yujbidx, rëbaman: “Gol beenchaaw xnejz dux Dad ree Dios, gol guxhal tijb nejz nali.

<sup>5</sup> Gra ree la'ch yadxa reen guiáad ree guia' con ree lom yayajc reen tibloj, në ree nejz volt yayaali yadxa tëë ree lunejz ni ad najt tibloj.

<sup>6</sup> Gra ree bénguidxliuj guguaa bën guixhiaal Dios gagnë dunuj ree.”

<sup>7</sup> Chi brii zien ree bejn din guroobnijs Waj laa reeman, rëbaman loj reeman:

—ǝXi'n xindxab lëjt! ǝChu bagojn lëjt guial laadi loj castiro' ni zëöd?

<sup>8</sup> Gol gubajn zagdxe din guiguien guial waliqui ma bayüjndi xgab por xtolidi, ad guiëb tëë loj lasa'di: “Dunujn zio'p loj xdiaa Abraham”, din naj rni lëjt xt guiaj guie ree zajc yayüjn Dios xdiaa Abraham.

<sup>9</sup> Abi' ree bën ad zinalt xnejz Dios zi'c rayal, ma zidyob dxej ni güünnë Dios laa reeman zi'c rüjnnë bejn tijb yag chi ad rtiatan, rütüügaman laan din che'can.

<sup>10</sup> Dxel gunabdiidx reeman, rëb reeman:

—ǝXhie rayal yaguieenan?

<sup>11</sup> Badxi' Wajn rëbaman:

—Bën yu' tio'p xab, rayal gudëëman tijban loj bën achet rajp. Guiáad bën yu' ni raw, rayal gudëëman ta'nan loj bën ryaadxan.

<sup>12</sup> Në tio'p choon ree bën ruquijx impuest bidxin din tiobnijs reeman. Abi' gunabdiidx reeman loj Waj, rëb reeman:

—Mextr, laadx dunujn, ǝXhie rayal yaguieenan?

<sup>13</sup> Badxi' Wajn, rëbaman:

—Ad guquijxidi mazri guial loj ni rayal guquijx-idi.

<sup>14</sup> Yu' tëë ree suldad gunabdiidx lojman rëb reex:

—Laadxza dunujn, ǝXhie rayal yaguieenan?

Badxi'man laan rëbaman:

—Ad cwëëxuudi xhie xieen bejn, guial guchejbidi laa reeman o gudxiibidi guijc reeman ni ad beent reeman, gol guziibnejz tëë ni rajxidi.

<sup>15</sup> Guiáad ree bejn gagbeenezdoo reeman bal Wajn naj Cristo,

<sup>16</sup> per rëbaman loj gra reeman:

—Naj curobnijs lëjt con nijs. Per zëed tijb bën guroobnijs lëjt con xSprijt Dios në bajl. Laaman rajp mazri guialrniabee guial lon, ni'qui xgurëchaman ad zajct gaxhiecan.

<sup>17</sup> Abi' zi'c raya trigo zian güünnëman bejn. Din bën zinal ree xnejz Dios yayal reeman lod rniabeeman, guiáad ree bën ad zinalt xnejz Dios guixhiaalaman laa reeman loj bajl ni ad yu't dxej yayü'.

<sup>18</sup> Zian guneenë Waj laa reeman, në ree con diidx ren guneenëman laa reeman rulüüman laa reeman xtiidxza'c Dios.

<sup>19</sup> Gudilë tëëman rey Herodes guial cwa'man Herodías xbéngunaa bijchaman Felip, në por graczi ni mal ni ma beenman.

<sup>20</sup> Per luar nidxga' Herodes xtiidx Waj aal beenman zatijb ni mal: badxe'man Waj ladxguiib.

### *Riobnijs Jesús*

*(Mt. 3:13-17; Mr. 1:9-11)*

<sup>21</sup> Chi curoobnijs Waj bejn ree nëgajc Jesús gurobnijs. Abi' la'tgaj cabejdx canabaman Dios, bixal xanyabaa

<sup>22</sup> zianz biguiajt xSprijt Dios zi'c tijb palom xt guijcaman. Dxel biguien cha' tijb bejn xanyabaa, rëbaman:

—Lüj naj da xi'nan, rënan lüj rabaanë' tëën lüj.

### *Bën goc ree xdiaagulal Jesús*

*(Mt. 1:1-17)*

<sup>23</sup> Cost gajlbichii ijz yu' Jesús chi guzuloj beenman xchiin Dios. Naladx ree bejn xi'n Xiëb najman, Xiëb guin gojc xi'n Elí.

<sup>24</sup> Elí gojc xi'n Matat, Matat gojc xi'n Leví, Leví gojc xi'n Melqui, Melqui gojc xi'n Jana, Jana gojc xi'n Xiëb,

<sup>25</sup> Xiëb gojc xi'n Matatías, Matatías gojc xi'n Amós, Amós gojc xi'n Nahum, Nahum gojc xi'n Esli, Esli gojc xi'n Nagai,

<sup>26</sup> Nagai gojc xi'n Maat, Maat gojc xi'n Matatías, Matatías gojc xi'n Semei, Semei gojc xi'n Xiëb, Xiëb gojc xi'n Judá,

<sup>27</sup> Judá gojc xi'n Joana, Joana gojc xi'n Resa, Resa gojc xi'n Zorobabel, Zorobabel gojc xi'n Salatiel, Salatiel gojc xi'n Neri,

<sup>28</sup> Neri gojc xi'n Melqui, Melqui gojc xi'n Adi, Adi gojc xi'n Cosam, Cosam gojc xi'n Elmodam, Elmodam gojc xi'n Er,

<sup>29</sup> Er gojc xi'n Josué, Josué gojc xi'n Eliezer, Eliezer gojc xi'n Jorim, Jorim gojc xi'n Matat,

<sup>30</sup> Matat gojc xi'n Leví, Leví gojc xi'n Simeón, Simeón gojc xi'n Judá, Judá gojc xi'n Xiëb, Xiëb gojc xi'n Jonán, Jonán gojc xi'n Eliaquim,

<sup>31</sup> Eliaquim gojc xi'n Melea, Melea gojc xi'n Mainán, Mainán gojc xi'n Matata, Matata gojc xi'n Natán,

<sup>32</sup> Natán gojc xi'n Davi, Davi gojc xi'n Isaí, Isaí gojc xi'n Obed, Obed gojc xi'n Booz, Booz gojc xi'n Salmón, Salmón gojc xi'n Naasón,

<sup>33</sup> Naasón gojc xi'n Aminadab, Aminadab gojc xi'n Aram, Aram gojc xi'n Esrom, Esrom gojc xi'n Fares, Fares gojc xi'n Judá,

<sup>34</sup> Judá gojc xi'n Jacob, Jacob gojc xi'n Isaac, Isaac gojc xi'n Abraham, Abraham gojc xi'n Taré, Taré gojc xi'n Nacor,

<sup>35</sup> Nacor gojc xi'n Serug, Serug gojc xi'n Ragau,



Ragau gojc xi'n Peleg, Peleg gojc xi'n Heber, Heber gojc xi'n Sala,

<sup>36</sup> Sala gojc xi'n Cainán, Cainán gojc xi'n Arfaxad, Arfaxad gojc xi'n Sem, Sem gojc xi'n Noé, Noé gojc xi'n Lamec,

<sup>37</sup> Lamec gojc xi'n Matusalén, Matusalén gojc xi'n Enoc, Enoc gojc xi'n Jared, Jared gojc xi'n Mahalaleel, Mahalaleel gojc xi'n Cainán,

<sup>38</sup> Cainán gojc xi'n Enós, Enós gojc xi'n Set, Set gojc xi'n Adán, guiáad Adán gojc xi'n Dios.

## 4

### *Been xindxab Jesús prueb*

*(Mt. 4:1-11; Mr. 1:12-13)*

<sup>1</sup> Yu' xSprijt Dios luxdoo Jesús guidiblagaa. Chi bazaman guiwro' Jordán dxel binë xSprijt Dios laaman lod naj yujbidx.

<sup>2</sup> Ni guzuman tiuu dxej tiuu guiaal, abi' been xindxab laaman prueb. Achetczi gudawaman dxej zii ree, zianz gulaanman.

<sup>3</sup> Dxel rëb xindxab guin lojman:

—Bal wali najl Xi'n Dios, gunabee yayajc guiaj guie guiadxtil.

<sup>4</sup> Badxi' Jesús laan rëbaman:

—Loj xtiidx Dios rëb: “Ad ganaxtizi guiadxtil guiban bejn, nëgajc gra diidx rníee Dios.”

<sup>5</sup> Dxel binë xindxab guin laaman tijb guiic guia' ya da't, lod balüüx laaman gra ree nacion riga' loj guidxliuj.

<sup>6</sup> Abi' rëb xindxab guin lojman:

—Gunen graczi guialrniabee në guialnaza'c ni yu' loj ree nacion guie. Din naj ca' laa reen, zajc gudëdan laa reen loj chutëez bën rënan.

<sup>7</sup> Bal guzuxibil lon abi' guiën da'til naj, graczan gac xieenl.

<sup>8</sup> Badxi' Jesús laan, rëbaman:

—Loj xtiidx Dios rëb: “Tijbzi loj xDadil Dios guzuxibil guiën tëël laaman, abi' tijbzi laaman been sirv.”

<sup>9</sup> Dxel binë xindxab guin laaman Jerusalén, abi' gulë'pix laaman guiyc yadooro' zojb luguedx guin. Zianz rëbix lojman:

—Bal wali najl Xi'n Dios, gudidya' diizd guie xt luyuj,

<sup>10</sup> din loj xtiidx Dios rëb:

Dios guixhiaal ree xianjlaman din guinia reeman lüj.

<sup>11</sup> Yales reeman lüj con yaa reeman, chitëë quiilguijdx guiaj guia'l.

<sup>12</sup> Badxi' Jesús laan rëbaman:

—Rëb tëë loj xtiidx Dios: “Ad güünl prueb xDadil Dios.”

<sup>13</sup> Chi ad badxejltri xhienaag güün xindxab guin Jesús prueb, dxel biquiedix tiblädëd.

*Rzuloj Jesús rulüüman bejn ree niz Galilea  
(Mt. 4:12-17; Mr. 1:14-15)*

<sup>14</sup> Badxin Jesús niz Galilea, yu' xSprijt Dios luxdooman guidiblagaa, abi' guidibczi niz yagaj bire'ch xtiidxaman.

<sup>15</sup> Rulüüman bejn ree lën ree yadoo guidib niz yagaj, abi' graczi reeman ruza't laaman zagdxe.

*Radxin Jesús Nazaret**(Mt. 13:53-58; Mr. 6:1-6)*

<sup>16</sup> Badxin Jesús Nazaret luguiedx lod guni'saman. Abi' dxej raziiladx ree bejn guyuman lèn yadoo zi'c naj xcostumbraman. Dxel guzuliman persi biilaman xtiidx Dios.

<sup>17</sup> Badëed reeman gui'ch ni bacaa Isaías bén badëe xtiidx Dios loj ree bejn. Chi bachijlaman loj gui'ch guin, badxejlaman lod rëb:

<sup>18</sup> XSprijt dux Dad ree Dios za'në naj, din laaman ma beenle' naj din ganen xtiidxza'caman loj ree bénprob.

Guxhaalaman naj din gugojan bejn ree xhienaag laa reeman loj ni rzajc reeman, yaxhal tëen loj ree bénlutia'p.

Gün tëen yudar bén rusagzi reeman,

<sup>19</sup> din gugojan guial ma bidxin dxej za'cdxoon ni güünle' Dios bejn ree.

<sup>20</sup> Dxel batüüb Jesús gui'ch guin bayüman laan loj bén rüjn yudar lèn yadoo guin, zianz gurejman. Graczi ree bén riga' yagaj ruguiaadxijch laaman.

<sup>21</sup> Dxel guzuloj caneenëman laa reeman, rëbaman:

—Yan dxej gajc ma gojc cumplid zi'c ca loj xtiidx Dios ni ma biguiejndi.

<sup>22</sup> Graczi reeman cuza't laaman zagdxë caydxa tëe loj reeman diidxza'cdxoon ni caneeaman. Dxel canabdiidx loj lasa' reeman rëb reeman:

—¿Nid laaman naj xi'n Xiëb ya?

<sup>23</sup> Dxel rëb Jesús loj reeman:

—Ma ragbeen guial nadi tijb diidx ni rëb: “Doc-tor, bayüjn lüj gajc”, na tëedi: “Ni ma baguiejnan beenl Capernaum nëgajc guie beenan najn ladxil.”

24 Rëb tëë Jesús:

—Diidxliczi rnin, ni'czi tijb bén rudëë xtiidx Dios loj ree bejn, ad rënt reeman laaman ladx gajcaman.

25 Gol basaaladx dád zien ree béngunaa bizëjb zojb Israel lën ree dxej guban Elías bén badëë xtiidx Dios loj ree bejn, chi ad golt guia choon ijz garol, abi' guyu gubijn guidibczi.

26 Per ad guxhaalt Dios Elías guin loj tijb ree bén bizëjb zojb Israel, guxhaalaman laaman loj tijb bén bizëjb zojb guiedx la Sarepta, gajxh Sidón.

27 Në lën ree dxej guban Eliseo bén badëë xtiidx Dios loj ree bejn, dád zien ree bejn rajc guialguijdx la lepra, per ni'czi tijb reeman ad bayüjntaman, tijbzi bén Siria bayüjnman laman Naamán.

28 Chi biguiejn gra ree bén yu' lën yadoo guin ni rëb Jesús, dád balen reeman.

29 Bisu reeman babëë reeman Jesús luguiedx guin, dxel binë reeman laaman ro' tijb bala' ya guial naj guiedx guin guiyc tijb guia', din gutedia' reeman laaman.

30 Per gudëd Jesús galay reeman, ziataman.

### *Rabëë Jesús xindxab luxdoo tijb bejn*

*(Mr. 1:21-28)*

31 Wej Jesús guiedx Capernaum ni riga' niz Galilea, yagaj rulüüman bejn ree dxej ni raziiladx reeman.

32 Abi' dád badxaløj reeman ni rulüüman guial rnieenëman laa reeman con guialrniabee.

33 Lën yadoo guin yu' tijb xin yu' xindxab luxdoo, abi' guridxa' xindxab guin rëbix:

<sup>34</sup> —Basa'n dunujn, ¿xhie rēnl con dunujn, Jesús bēn Nazaret? ¿Zēēdil ya zidganiĵtil dunujn? Nūnbeen lūj, naya nalil najl xi'n Dios.

<sup>35</sup> Dxel gudilē Jesús xindxab guin, rēbaman lojx:

—¡Bacwēēz ro'l, barii luxdoo xin guin!

Zianz badxe'bi xindxab guin xin guin luyuj guidib niz loj reeman, bariitix luxdoox achetczi goquix.

<sup>36</sup> Graczi reeman badxaloj, rēb loj lasa' reeman:

—¿Xhie ree diidx guin rnieeman? ¡Con guialrniabee ni rajpaman, rniabeeman rarii ree xindxab luxdoo ree bejn!

<sup>37</sup> Abi' guidibczi niz yagaj bire'ch xtiidxaman.

*Rayūjn Jesús xnasuegr Bēd*

*(Mt. 8:14-15; Mr. 1:29-31)*

<sup>38</sup> Dxel barii Jesús lēn yadoo guin, abi' wejman lidx Simón. Ragxuu xnasuegr Simón guin yu'man xliaadoxh zeel guzajc reeman Jesús liaadx din yayūjnman laaman.

<sup>39</sup> Zianz basajb loj Jesús lod naga'man gunabee-man yarii xliaa guin, abi' bariin. Loj hor ziigajc bixchewan guzuloj cudēēman ni gaw reeman.

*Rayūjn Jesús zien ree bēnragxuu*

*(Mt. 8:16-17; Mr. 1:32-34)*

<sup>40</sup> Chi ma wēēz gubijdx, graczi ree bēn rajp bēnragxuu bēn rajc ree gadxagayaa guialguijdx binē reeman laa reeman loj Jesús, persi badxiib yaaman guiĵc tiĵb gaj reeman, bayūjnman laa reeman.

<sup>41</sup> Nē zien ree bēnragxuu guin rarii xindxab luxdoo, rbidxa' reex rēb reex:

—¡Lūj naj Xi'n Dios!

Per gudilëman xindxab guin ree, ad cwëjbtaman niniee reex, guial ragbee reex laaman naj Cristo.

*Rulüü Jesús xtiidx Dios niz Galilea*

*(Mr. 1:35-39)*

<sup>42</sup> Chi bareguiaal, barii Jesús luguiedx guin zëman lod achut bejn zojb. Per raguiil ree bénguiedx guin laaman, bidxin reeman lod za'man abi' rëb reeman lojman din yaya'nnëman laa reeman.

<sup>43</sup> Per rëbaman loj reeman:

—Në ree luguiedx ren rayal chinë'n xtiidxza'c Dios guial xhienaag naj xguialrniabeeman, din par zian guxhaalaman naj.

<sup>44</sup> Zian basnuu guneeaman xtiidx Dios lën ree yadoo niz Galilea.

## 5

*Rniaaz reeman zien bëjl*

*(Mt. 4:18-22; Mr. 1:16-20)*

<sup>1</sup> Tijb dxej chi za' Jesús ro' nijs Genesaret, bidxin ree benzien. Xt rxa't reeman laaman guial rën reeman gucaagdiajg reeman xtiidx Dios.

<sup>2</sup> Dxel baguiaa Jesús tio'p barcw ro' nijs guin; ni basa'n ree bën rniaaz bëjl la'tgaj caguiib xguijxh reeman ni rniaaznë reeman bëjl.

<sup>3</sup> Zianz wë'paman loj tijb barcw ni naj xbarcw Simón, abi' rëbaman lojman din gudxigaman laan niz galay nijs guin. Dxel gurejman, guzuloj culüüman bejn ree.

<sup>4</sup> Chi gulox guneeëman laa reeman, dxel rëbaman loj Simón:

—Binë barcw guin lod mazri naxhit, gol bazaal xguijxhidi din guiniaazidi bëjl.

<sup>5</sup> Badxi' Simón laan rëbaman:

—Mextr, gudëd guiaalczi baguieenan dxiin, achutczi bëjl wanaazan. Per bal lüj na, yazaalan guijxh guin ree.

<sup>6</sup> Chi bazaal reeman guijxh guin ree loj nijs guin, bëjl zien da't gunaaz reeman xt guzuloj cayaxya' ree guijxh guin.

<sup>7</sup> Abi' been reeman sen loj ree xcompniar reeman bën yu' ree loj stijb barcw guin, din chiguieen reeman laa reeman yudar. Dxel wej reeman, abi' bacha reeman bëjl guin ree loj grop barcw guin xt ma nizëëb reen xan nijs.

<sup>8</sup> Chi baguiaa Simón Bëd ni goc, bazuxibaman loj Jesús rëbaman:

—Biquied lod za'n, Dad, din bëndol naj.

<sup>9</sup> Guial Simón con ree bën za'nëman badxa loj reeman guial dád zien bëjl gunaaz reeman.

<sup>10</sup> Ziangajc badxaloj ree Jacob con Waj, bën naj ree xi'n Zebedeo, naj tëë reeman xcompniar Simón. Per rëb Jesús loj Simón:

—Ad rdxebil, din diizd yan guto'pil bejn ree par Dios luar guiniaazil bëjl.

<sup>11</sup> Dxel babëë reeman barcw guin ree loj nijs guin, basa'n reeman laa reen, zinalt reeman Jesús.

*Rayüjn Jesús tijb bën rajc guialguijdx la lepra  
(Mt. 8:1-4; Mr. 1:40-45)*

<sup>12</sup> Chi za' Jesús tijb luguiedx, bidxin tijb bën rajc guialguijdx la lepra, guidibczaman ma yu' guialguijdx guin. Chi baguiaaman Jesús laa bazuxib gajcaman, basajb lojman luyuj, rëbaman:

—Dad, bal rēnl, zajc yayüjnl naj.

<sup>13</sup> Zianz basli yaa Jesús baqui'man laaman, rēbaman:

—Rēnan. Bayajc.

Loj hor ziigajc bayajc bēn guin.

<sup>14</sup> Dxel rēb Jesús lojman:

—Achuczi loj guiēbil guial ma bayajquil. Lojzi bixhioz wej din guguaaman lūj. Binē gon ni rayal chinēl zi'c gunabee Moisejs din gagbee gra bejn guial ma bayajquil.

<sup>15</sup> Per guixie guixie mazri bire'ch xtiidx Jesús por gra ree ni zagdxē rūjnman. Abi' dād benzien rdo'p din gucaagdiajg reeman ni rnieeman yayüjn tēeman laa reeman guialguijdx ni rajc reeman.

<sup>16</sup> Guiáad laaman rejman niz lod achut bejn zojb, persi rbejdx rniabaman Dios.

### *Rayüjn Jesús bēn nējt xcuerp*

*(Mt. 9:1-8; Mr. 2:1-12)*

<sup>17</sup> Tijb dxej culüü Jesús bejn ree, abi' zojb tio'p choon ree bēnfarisew nē ree mextr rajc ley, zēēd reeman guiedxdo ni riga' ree niz Galilea nē niz Judea, nē Jerusalén. Za'nē xguialrniabee Dios laaman persi rayüjnman bēnragxuu ree.

<sup>18</sup> Dxel bidxin tio'p choon ree bejn, bidxinnē reeman tijb xin nējt xcuerp, naga'x loj da. Abi' guyēn reeman niunē reeman laax lēnū guin din niguijxh reeman laax lod za' Jesús.

<sup>19</sup> Per ad badxejlt ban niz niunē reeman laax guial bēn guixiuj riga' yagaj. Dxel wē'p reeman guijc yu guin, abi' biquied reeman tex dxiib guijcan, zianz gulet reeman xinragxuu guin guidib



naga'x loj da guin, gudijxh reeman laax galay ree b́en guin lod za' Jesús.

<sup>20</sup> Chi baguiaa Jesús guial rliadx reeman laaman; rēbaman loj xinragxuu guin:

—Xi'n, ma benan xtolil perdon.

<sup>21</sup> Per ree mextr rajc ley con ree b́enfarisew guzuloj cayüjn reeman xgab: “¿Chu xin guin zeel rüjnx mazri xin zojbloj guial loj Dios? Achutczi rajc rüjn perdon dol, tijbzi Dios.”

<sup>22</sup> Per gogbee gajc Jesús xgab cayüjn reeman, dxel rēbaman:

—¿Chexc zeel rüjndi xgab zian?

<sup>23</sup> ¿Conin ad nawēēgt gac, guial guiēn ya: “Ma naj xtolil perdon”, o guiēn: “Bixche guza tēē”?

<sup>24</sup> Per yan, gulün lējt guial B́en guxhaal Dios rajpaman guialrniabee loj guidxliuj guie din güünman perdon dol ree.

Dxel rēb Jesús loj xinragxuu guin:

—¡Bixche, baca' ni go'til loj! Baguiaj lidxil.

<sup>25</sup> Loj hor guin gajc bixchex guidibloj gra ree b́en riga' yagaj balesix ni go'tix loj, zianz zia lidxix ruza'tix Dios zagdxe.

<sup>26</sup> Graczi reeman badxaloj ruza't tēē reeman Dios zagdxe abi' dád bidxeb reeman, rēb reeman:

—¡Ni'qui tijb ad waguiaat ree zi'ct naj ni cayguiaa ree yan!

### *Rbejdx Jesús Leví*

*(Mt. 9:9-13; Mr. 2:13-17)*

<sup>27</sup> Chi gudéd gojc zian, baguiaa Jesús tijb b́en ruquijx impuest, laman Leví, zojbaman lod ruquijxaman. Abi' rēbaman lojman:

—Tanal naj.

28 Dxel bisu Leví, guro'nladxaman gran zinaltaman Jesús.

29 Abi' been Leví lanijro' lidxaman par Jesús, në zien ree bèn ruquijx impuest zojb nètëë ree ben ren zojbnë reeman xan mex.

30 Per ree bénfarisew ree në ree mextr rajc ley, bèn nuchajg gajc ree bénfarisew guin, guzuloj caneguidx reeman xbejn ree Jesús, rëb reeman:

—¿Chexc zeel rë' rawnëdi bèn ruquijx ree impuest në ree bëndol?

31 Badxi' Jesús laan rëbaman:

—Bénnadaan ree ad riaadxt reeman doctor, bénragxuu ree laa reeman riaadx Doctor.

32 Ad zialtan par ree benza'c, zialan par ree bëndol din yayüjn reeman xgab por xtol reeman.

*Rniabdiidx reeman loj Jesús xcwent guialrba'n (Mt. 9:14-17; Mr. 2:18-22)*

33 Bénfarisew ree në ree mextr rajc ley, rëb reeman loj Jesús:

—Xbejn Waj, në ree xbejn ree bénfarisew dád zien volt rba'n reeman rbejdx rniab tëë reeman Dios, guiáad ree xbejnl ganax rë' raw reeman.

34 Badxi' Jesús laan rëbaman:

—¿Wen zajc güündi naguiejn ya guiba'n ree biooz za' loj guialruxhliaa, la'tgaj za'në xin cuxhliaa guin laa reeman?

35 Per guidxin dxej chiquiedix, dxel guiba'n reeman.

36 Rëb tëëman loj reeman:

—Achut bèn rutüüg ta'n lajd cüb din yata'man laan loj lajd yojx. Bal güünman zian, zaguixya' lajd cüb guin lajdyojx guin, nètëë yan ad zuguaatan zagdxé loj lajdyojx guin.

<sup>37</sup> Ad rgu' tēet bejn vin cüb lēn anfr yojx, din bal güünman zian, zaguixya' vin cüb guin anfr guin, abi' zi'c anfr guin zi'c vin guin zaxin reen.

<sup>38</sup> Zeel vin cüb rayal chu'n lēn anfr cüb din ni'qui tijb reen ad zaxint.

<sup>39</sup> Abi' tijb bēn ma gu' vin yu' gocli ad rē'taman vin cüb, dīn rēbaman: “Vin yu' gocli mazri ni za-gdxen.”

## 6

*Rgui'ch ree xbejn Jesús trigo dxej raziiladx ree bēn Israel*

*(Mt. 12:1-8; Mr. 2:23-28)*

<sup>1</sup> Tijb dxej raziiladx ree bēn Israel, la'tgaj cadēd Jesús con ree xbejnman loj tijb guiniaa lod yu' trigo. Guzuloj cagui'ch reeman trigo guin, dxel cuxho'p reeman laan cayaw reeman.

<sup>2</sup> Abi' yu' ree bēnfarisew rēb loj reeman:

—¿Chexc zeel rüjndi ni ad rayalt güündi dxej raziiladx ree bejn?

<sup>3</sup> Badxi' Jesús laan, rēbaman:

—¿Gadidi gool loj xtiidx Dios ya ni been Davi chi gulaanman con ree xcompniaraman?

<sup>4</sup> Guyuman lēn xyadoo Dios, cwa'man guiadxtil ma nagle' ree gudawaman con ree xcompniaraman, ni ad rayalt niajw reeman bixhiosi ree rayal gaw laa reen.

<sup>5</sup> Rēb tēē Jesús loj reeman:

—Bēn guxhaal Dios rajpaman guialrniabee dxej raziiladx ree bejn.

*Rayajc tijb xin naxü'n tibladya*

*(Mt. 12:9-14; Mr. 3:1-6)*

<sup>6</sup> Zatiyb dxej raziiladx reeman, guyu Jesús lèn tijb yadoo abi' guzuloj culüüman bejn ree. Yagaj za' tijb xin naxü'n yaa ladbee.

<sup>7</sup> Abi' ree mextr rajc ley në ree bénfarisew rzunal reeman din guidoon zayüjn Jesús laax dxej raziiladx reeman ya, din gac gutedia' reeman Jesús.

<sup>8</sup> Per laaman ragbee gajcaman xhie xgab cayüjn reeman, zeel rëbaman loj xin naxü'n yaa guin:

—Bisu, guzuli galay guin.

Dxel guzulix, guzujx galay guin.

<sup>9</sup> Dxel rëb Jesús loj reeman:

—Ganabdiidxan lëjt: ¿Xhie rayal güün bejn dxej raziiladx reeman, ni zagdxé ya o ni mal? ¿Guslaaman xguialnaban bejn ya o gugüjtaman laaman?

<sup>10</sup> Dxel baguiaa Jesús gra ree bén riga' yagaj, abi' rëbaman loj xin guin:

—Basli yaal.

Dxel beenx zi'c rëbaman, abi' bayajc yaax.

<sup>11</sup> Per laa reeman dád bidxe'ch reeman, guzuloj rëb loj lasa' reeman xhienaag güünnë reeman Jesús.

*Rbe Jesús chiptio'p ree apóstoles*

*(Mt. 10:1-4; Mr. 3:13-19)*

<sup>12</sup> Lèn ree dxej zii wej Jesús tijb ruguia' persi gurejdx gunabaman Dios, abi' gudëd guiaalczi gurejdx gunabaman Dios yagaj.

<sup>13</sup> Chi bareguiaal, gurejdxaman bén nal ree laaman, dxel gulejman chiptio'p reeman loj reeman, abi' guneeaman laa reeman apóstoles.

<sup>14</sup> La reeman: Simón, bén gulëëljajman Bëd, Andrejs bijch Simón, Jacob, Waj, Felip, Tol,

15 Matew, Tumajs, Jacob xi'n Alfeo, Simón, bèn bi'ch loj ree bèn cananistas,

16 Judas xi'n Jacob, nē Judas Iscariote bèn bayü Jesús.

*Rulüü Jesús zien ree bejn*

*(Mt. 4:23-25)*

17 Baguiajt Jesús ruguia' guin con guidxiptio'p ree xbejnman, badxin reeman lod naj tijb la'ch. Yagaj bado'p zien ree xbejnman nē ree ben ren, bèn zëed ree niz Judea nē Jerusalén nē ree bèn zëed Tiro con Sidón, guiedx riga' ree gajxh ro' nijsdoo. Bidxin reeman din gucaagdiajg reeman xtiidx Jesús din yayüjn tēeman laa reeman guial-guijdx ni rajc reeman.

18 Nē ree bèn yu' xindxab luxdoo bayajc.

19 Zeel graczi ree bejn rēn guqui' laaman, guial rayüjnman laa reeman con xguialrniabeeman.

*Xiquilbaa ree bejn*

*(Mt. 5:1-12)*

20 Dxel baguiaa Jesús loj ree xbejnman, abi' rēbaman:

—Xiquilbaadi bēnprob, din lējt rayal loj xguialrniabee Dios.

21 'Xiquilbaadi bēn rliaan ree yan, din Dios gunee ni gawidi xt chigdxinladxidi.

'Xiquilbaadi bēn roon ree yan, din zadxin dxej guxijdxidi.

22 'Xiquilbaadi chi rdxe'ch bejn lējt, chi rabēeca reeman lējt, rnieeguijdx tēē reeman lējt, naladx reeman najdi bendxuudx guial rliladxidi Bēn guxhaal Dios.

23 Gol babaa gol badxe' tää luxdoodi zagdxe chi güünnë reeman lëjt zian, din zro' ni tia'di yu' xanyabaa, din ziangajc beennë xbéngulal reeman bën badëë ree xtiidx Dios loj ree bejn.

24 'Per probza lëjt benrijcw, din ma guyuxgaj luxdoodi nix.

25 'Probza lëjt bën raw xt rigdxinladx yan, din zadxin dxej guiliaandi.

'Probza lëjt bën ruxijdx yan, din zadxin dxej goondi guial chu'nayadi.

26 'Probza lëjt, bën ruladx ree guilies bejn xvalor, din zian beennë ree xbéngulal reeman bën goc ree bën rusquiee, rëb reeman rudëë reeman xtiidx Dios loj ree bejn.

*Guyën bën rdxe'ch lüj*

*(Mt. 5:38-48; 7:12)*

27 'Per ganin lëjt bën rucaagdiajg ree da diidxan: Gol guyën bën ralen lëjt, gol gojc benza'c con ree bën yu'xyajn lëjt,

28 gol bazaal diidxza'c guijc ree bën ruzaal diidxmal guijquidi, gol gurejdx gunab Dios por ree bën rnieeguijdx lëjt.

29 Bal chu chëéz tiblax hajguil, badëéd zati-bladan, bal chu cwëëxuu xchamarril, ad cwexuul chinëman në xmanguil.

30 Chutëéz bën rniab xhienin lojl, badëédan. Bal chu rquied xhie xieenl, ad bal yanabilan.

31 Gol beennë ree bejn zi'c rëndi güünnë reeman lëjt.

32 'Bal rëndi ganaxzi bën rën lëjt, ¿xhieza ni zagdxen cayüjndi? Din xt bëndol ree rüjn zian, rën reeman bën rën laa reeman.

<sup>33</sup> Abi' bal rüjndi wen ganaxzi bën rüjn lëjt wen, ¿xhieza ni zagdxen cayüjndi? Din xt bëndol ree rüjn zian.

<sup>34</sup> Ziangajc bal rudëedidi ni rgui'n ganaxzi bën naladxidi zajc yaguijx lojdi, ¿xhieza ni zagdxen cayüjndi? Din xt në ree bëndol rudëed rgui'n ree bën naladx reeman zajc yaguijx loj reeman.

<sup>35</sup> Per lëjt gol guyën bën ralen lëjt, gol been reeman wen. Gol badëed qui'n reeman, ad cwëzidi xhie tia'di guijcan. Zian tia'di zro' guialnaza'c ni gunee Dios bën yu' xanyabaa, gac tëedi xi'nman, din laaman naj benza'c con ree bën ad rudëet quixtëe lojman në con ree benmal.

<sup>36</sup> Gol baya bejn zi'c raya dux Dad ree Dios bejn.

### *Xcwent guialrula'ch*

*(Mt. 7:1-5)*

<sup>37</sup> 'Ad gula'chidi, ad gudxiib tëedi ni mal guijc ree bejn chitëe saquidi zian, gol been perdon din gaquidi perdon.

<sup>38</sup> Gol badëed ni riaadx ree bejn, Dios mazri zro' naj ni gunee man zi'c tijb bols guidxadi. Din zi'c rudëedidi loj ree bejn, ziant gajc naj ni gunee Dios lojdi.

<sup>39</sup> Rëb Jesús loj reeman zatijb diidx:

—¿Wen zajc chinë bénlutia'p zatijb bénlutia'p ya? ¿Nid zayajb grop reeman ro' bala' ya?

<sup>40</sup> Tijb bën cusiid, ad mazt rajcaman guial loj xmextraman. Guiáad chi ma gulox basiidaman rajcaman zi'ctgajc rajc xmextraman.

<sup>41</sup> 'Ad gula'chil ben ren por faltdobëz ni rajpaman, zagdxeli guyu xgab por falt narooob ni rajpil.

<sup>42</sup> Abi' bal mazri falt narooob rajpil, ¿xoza guiëbil loj zatijb bejn: “Ad laat naj ni rüjnl”? ¡Bén rusquiee! yalojxgaj been zi'c rayal, chi ma beenl zian dxel ma zile' guiëbil loj zatijb bejn: “Ad laat naj ni rüjnl”.

*Por ni rtia loj yag rayünbee bejn xhie yagan  
(Mt. 7:17-20; 12:33-35)*

<sup>43</sup> 'Ad yu't yag zagdxé rtia ni guiidx loj, ad yu' tēet yag guiidx rtia ni zagdxé loj.

<sup>44</sup> Din tijbgaj yag rayünbee bejn xhie yagan por ni rtia lojn. Ad raru't higo loj yaquiějch, ad raru' tēet uv loj gui'xh.

<sup>45</sup> Benza'c rnieeman diidxza'c din laan yu' luxdooan, guiáad benmal rnieeman diidxmal din laan yu' luxdooan. Din ni yu' luxdoo bejn laan rnieeman.

*Tio'ploj cimiant  
(Mt. 7:24-27)*

<sup>46</sup> ¿Chexc zeel rnieedi naj, “Dad, Dad”, abi' adza rüjntidi ni rnin?

<sup>47</sup> Ganin lojdi chu naj zi'c bén ri't lon, riguiiejnman ni rēn, abi' rüjnman laan:

<sup>48</sup> laaman naj zi'c tijb bén been yu, yaloj xgaj gudēenman naxhit xt chi bila loj guiaj, dxel gulesaman xcimiantan guijc guiaj guin. Abi' chi bi't nijsro' majsi gulajn lad yu guin, per ni'quid baniibtan laan guial naj cimiant guin guijc guiaj.

<sup>49</sup> Per bén riguiiejn da diidxan abi' ad rüjntaman laan, najman zi'c tijb bén been yu ni ad yu't xcimiant. Abi' chi bi't nijsro' gulajn lad yu guin, balenxanan laan, tiblayaazi base'nan laan.



## 7

*Rayajc xmojs tijb suldad rom xin rniabee ree suldad**(Mt. 8:5-13)*

<sup>1</sup> Chi gulox guneenë Jesús bejn ree, dxel zëman Capernaum.

<sup>2</sup> Yagaj zojb tijb suldad Rom xin rniabee ree suldad. Yu' tijb xmojsix xin rën da'tix, ragxuu mojs guin ma rulüücüi guiëtix.

<sup>3</sup> Chi biguiejn suldad rniabee guin ruza't ree bejn Jesús, guxhaalix tio'p choon ree bën rniabee Israel lojman din chisajc reeman liaadx yayüjnman xmojsix.

<sup>4</sup> Abi' bidxin reeman loj Jesús guzajc reeman liaadx, rëb reeman:

—Gagnësiil suldad rniabee guin,

<sup>5</sup> din rën x bën duladx ree, në yan por laax gojc dux yadoo ree.

<sup>6</sup> Dxel binë Jesús laa reeman. Per chi ma cadxin reeman gajxh lidxix, guxhaal tio'p choon ree xmiwix loj Jesús biguiedx reex lojman:

—Dad, ad chu'l xgab, din ad rayaltan chu'l lënü lidxan,

<sup>7</sup> zeel ad bayaxtan nial quijb naj nidgadilan lüj. Per con gunee diizd lod za'l din yayajc da mojsan.

<sup>8</sup> Din zi'c naj yu' ree bën rniabee naj, ziangajc naj yu' ree da suldadan xin rniabeen. Chi rën loj tijb reex: “Wej”, rejx. Chi rën loj zatijbix: “Guda”, ri'tix. Abi' chi rën loj da mojsan: Been ni guin, rüjngajquixan.

<sup>9</sup> Chi biguiejn Jesús zian, dád badxa lojman ni rëb suldad guin, abi' badxi' lojman loj gra ree bën zinal laaman, rëbaman:

—Diidxiczi rnin, ni'qui Israel ad wadxaaglojtan tijb bèn rlliladx da't Dios zi'c rlliladx xin guin Dios.

<sup>10</sup> Chi badxin ree xin guxhaal suldad rniabee guin lidxix, baguiaa reex ma bayajc mojs guin.

*Rasban Jesús xi'n tijb béngunaa bizëjb*

<sup>11</sup> Chi gudëd gojc zian, wej Jesús tijb luguiedx la Naín binè ree xbejnman, në zien ree ben ren.

<sup>12</sup> Chi bidxinman gajxh ro' guiedx guin, baguiaaman ziquie'ch reeman tijb xingüt, tijbzi laax naj xi'n xniaax, najman bèn bizëjb. Zien da't ree bénluguiedx guin zinal laaman.

<sup>13</sup> Chi baguiaa Dad Jesús laaman, bayaman laaman, dxel rëbaman lojman:

—Ad roonl.

<sup>14</sup> Abi' bibig Jesús baqui'man xcaj xingüt guin, dxel guzudxe ree bèn zinë laax. Zianz rëbaman lojx:

—Xi'n, naj rni lojl: ¡Bixche!

<sup>15</sup> Dxel gureli xin guin, guzuloj caneex, zianz bayü Jesús laax loj xniaax.

<sup>16</sup> Chi baguiaa reeman zian, graczi reeman bidxeb guzuloj cuza't reeman Dios zagdxe, rëb reeman:

—Du loj ree ma gules Dios tijb bèn zojbloj, bèn rudëë xtiidx Dios loj ree bejn.

Rëb tëë reeman:

—Ma bi't Dios din gagnë ree xbejnman.

<sup>17</sup> Abi' guidib niz Judea në ree guiedx riga' niz yagaj gogbee ree bejn ni been Jesús.

*Bigneenë ree xbejn Waj Jesús  
(Mt. 11:2-19)*

18 Gogbee Waj gra ree ni cayüjn Jesús, guial bagojn ree xbejnman laaman. Abi' guneeman tio'p reeman,

19 dxel guxhaalaman laa reeman loj Jesús din chignabdiidx reeman bal laacaman naj Cristo bèn naj diidx gui't, bèn cabëz reeman, o cwëz reeman ben ren ya.

20 Abi' bibig reeman, guneenë reeman laaman, rëb reeman lojman:

—Waj bèn ruuroobnijs bejn ree guxhaal dunujn lojl zudganabdiidxan bal lüjcan naj Cristo bèn naj diidx gui't, bèn caylëjzan o yalëjzan ben ren ya.

21 Hor ziigajc bayüjn Jesús zien da't ree bënragxuu, në ree bèn rdoob, nëtëë ree bèn yu' xinxab luxdoo, baxhal tëëman loj ree bën lutia'p.

22 Dxel badxi' Jesús xtiidx ree bèn guxhaal Waj, rëbaman:

—Gol chej, gol chiguiedx loj Waj ni cuguiaadi në ni caguiejndi. Gol güjdx lojman guial ma ruguiaa ree bën lutia'p, ma rajc rza ree bencoj, ma rayajc tëë ree bèn goc guialguijdx la lepra, ma rigujëjn ree bèn nacwa't, guiáad ree bengüt ma baban reeman, abi' ree bënprob ma caguiejn reeman xtiidxza'c Dios.

23 ¡Xiquilbaa ree bèn ad zucwëëzt chililadx naj!

24 Chi baza ree bèn guxhaal Waj, guzuloj Jesús caneeman xcwent Waj loj ree bejn, rëbaman:

—¿Chu naladxidi naj bèn biquiaadi loj yujbidx? ¿Naladxidi ya najman zi'c tijb biqui runiib bi?

25 ¿O chu biquiaadi? ¿Tijb bèn najcw lajd zagdxe ya? Lëjt ragbee guial bèn rajcw ree lajd zagdxe, në ree bèn naban zagdxe, lën palas zojb reeman.

<sup>26</sup> ¿Chu biquiaadi? ¿Tijb bén rudëë xtiidx Dios loj ree bejn ya? Per diidxliczi rnin lojdi, biquiaadi tijb bén mazri zojbloj guial loj tijb bén rudëë xtiidx Dios loj ree bejn.

<sup>27</sup> Wajn naj bén ruza't xtiidx Dios, lod rëb:

Naj rxhial tijb bén ned lojl,  
bén güünchaaw xnejzil.

<sup>28</sup> Rnin lëjt, loj graczi ree bénguidxliuj ad wayut bén rudëë xtiidx Dios loj ree bejn, bén mazri zojbloj guial loj Waj. Per majsi zian, bén ad zojblojt loj xguialrniabee Dios, laaman mazri zojbloj guial loj Waj.

<sup>29</sup> Gra ree bejn, në ree bén ruquijx impuest bén baroobnijs Waj, chi biguiejn reeman ni rëb Jesús bignia' reeman guial rüjn Dios zi'c rayal.

<sup>30</sup> Per ree bénfarisew con ree mextr rajc ley ad cwëjbt reeman nuroobnijs Waj laa reeman, zian ad guyënt reeman ni rën Dios par laa reeman.

<sup>31</sup> Rëb tëë Jesús:

—¿Xhienaag ganin lëjt naj ree bén riga' loj guidxliuj guie yan? ¿Chu naj zi'c laa reeman?

<sup>32</sup> Laa reeman naj zi'c ree xindoo rguijt niz galay luguiedx, abi' rbixdiaj reex rëb loj lasa' reex: “Bacwejdxan par nuya'di, per ad baya'tidi, badoolan ni naya ree, per ad biintidi.”

<sup>33</sup> Din bi't Waj bén baroobnijs bejn ree, ad raw-taman ad rë' tëëtaman vin, abi' rëbidi xindxab yu' luxdooman.

<sup>34</sup> Yan bi't Bén guxhaal Dios, rawaman rë' tëëman vin, abi' rëbidi guial dád nalaman ruladxaman guië'man, ruchajg tëëman béndol ree con ree bén ruquijx impuest.

35 Per xguialrignia' Dios, rguienan por ree xbejnman.

*Rej Jesús lidx tijb bénfarisew la Simón*

36 Tijb bénfarisew rëb loj Jesús din chitaw Jesús guin lidxaman. Abi' bidxinman lidxaman gurejman xan mex.

37 Dxel tijb béngunaa dxuudx zojb gajc luguiedx guin. Chi gogbeeman cayaw Jesús lidx bénfarisew guin, bidxinnëman tijb lumejt yu' perfum.

38 Dxel roonman gurejman lod nuzuj guia' Jesús, guzuloj caxhie' nijs carii lojman guia' Jesús. Abi' cucwiidxnë guidxguijcaman laan, cayawaman xid guia'man curoob tëëman laan perfum guin.

39 Chi baguiaa bénfarisew guin zian, beenman xgab: “Balgui zian wali bén guin najman bén rudëë xtiidx Dios loj ree bejn, zagbeeman chunin cuqui' laaman xhie tëë naag naban béngunaa guin, najman bendxuudx.”

40 Dxel rëb Jesús loj bénfarisew guin:

—Simón, yu' tijb ni ganin lüj.

Badxi' bénfarisew guinan rëbaman:

—Gunan, mextr.

41 Abi' rëb Jesús lojman:

—Tijb bén rudëëd milia rgui'n ree bejn, ral tio'p ree bejn lojman. Tijbaman nuzëëb gaaygayuu denario, zatijbaman nuzëëb tü'pchiin.

42 Grop reeman ad beent gan naguijx lojman, per bén badëëd milia guin rëbaman loj reeman guial ad zaguijxt reeman ni nuzëëb reeman. Yan guna, ¿chu loj grop reeman mazt guiën laaman?

43 Badxi' Simón laan, rëbaman:

—Par naj, bén bazëëb mazri zro' guin.

Dxel rëb Jesús:

—Waliquil.

<sup>44</sup> Zianz baguiaa Jesús loj béngunaa guin, abi' rëbaman loj Simón:

—¿Ruguaal béngunaa guie ya? Chi guyu'n lidxil ad baneetil nijs niëd guia'n. Guiáad laaman gudi-ibaman guia'n con nijs brii lojman, abi' bacwi-idxaman laan con guidxgujcaman.

<sup>45</sup> Ad gudawtil naj xid, guiáad laaman diizd chi guyu'n ad rbëzt rawaman xid guia'n.

<sup>46</sup> Achet sejt badxe'l guican, per laaman ma badxe'man perfum guia'n.

<sup>47</sup> Zeel rnin lüj, gra ree xtolaman ma gojc perdon guial rën da'taman naj. Per bën yu' ta'nz xtol abi' rajcaman perdon, ta'nz rënman naj.

<sup>48</sup> Dxel rëb Jesús loj béngunaa guin:

—Ma naj gra xtolil perdon.

<sup>49</sup> Guiáad ree bën zojbnëman yagaj guzuloj can-abdiidx loj lasa' reeman, rëb reeman:

—¿Chu bën guin zeel xt në ree dol rünjman perdon?

<sup>50</sup> Per rëb Jesús loj béngunaa guin:

—Ma najl perdon guial rliladxil naj, baguiaj zagdx ad ruril xgab.

## 8

### *Béngunaa been ree Jesús yudar*

<sup>1</sup> Chi gudëd gojc zian, wej Jesús gra ree guiedx narooob në ree guiedx dobëz bicojnman biglüü tëëman xhienaag naj xguialrniabee Dios. Në guidxiptio'p ree apóstoles binëman,

<sup>2</sup> nëtëë tio'p choon ree béngunaa, bën babëëman xindxab luxdoo, në ree bën bayünjman guialgujdx

ni rajc reeman. Loj reeman no'ch María Magdalena, bèn babëë Jesús gajdx xindxab luxdoo.

<sup>3</sup> Në Xuan, lacheel Cuza, Cuza guin goc bèn nulen xchiin Herodes. Në Susan nètëë zien ree béngunaa ren, been reeman yudar Jesús con ni rajp reeman.

*Xcwent bèn rtie'ch bin*  
(Mt. 13:1-9; Mr. 4:1-9)

<sup>4</sup> Zien ree bejn brii loj ree guiedx ziquiaa reeman Jesús. Chi bido'p ree benzien, beman tijb cwent loj reeman rëbaman:

<sup>5</sup> —Tijb bejn zëman zigtie'chaman bin. Chi catie'chaman laan, ta'nan biajb lunejz abi' balëë ree bejn gujcan gudaw tëë ree biguijn laan.

<sup>6</sup> Zata'nan biajb loj ree guiaj, chi gulejn reen gubidx reen guiaj ad yu' xcojpt loj ree guiaj guin.

<sup>7</sup> Zata'nan biajb loj ree yaquiëjch. Abi' chi guni's reen tijbzi, banidloj yaquiëjch guin laa reen.

<sup>8</sup> Zata'nan biajb loj yujza'c abi' dád gojcan, cwa xt tibgayuu bin loj tijbgajn.

Chi gulox gunee Jesús zian, dxel gunee man rejs rëbaman:

—Bèn rën gucaagdiajg, gol bacaagdiajg.

*Chexc zeel rulüü Jesús con cwent ree*  
(Mt. 13:10-17; Mr. 4:10-12)

<sup>9</sup> Dxel gunabdiidx ree xbejn Jesús lojman, rëb reeman:

—¿Xhie rën guiëb cwent guin?

<sup>10</sup> Badxi' Jesús laan rëbaman:

—Lëjt, Dios ma basa'n lëjt din chignia'di xhien-aag naj xguialrniabeeman. Per loj gra reeman rünan zi'c cwent din majsi rani loj reeman, per ad

zuguaat reeman, majsi rigueijn reeman, per ad zignia't reeman.

*Rusignia' Jesús xcwent bén rtie'ch bin  
(Mt. 13:18-23; Mr. 4:13-20)*

<sup>11</sup> 'Ni ne rën guiëb xcwent bén rtie'ch bin: Bin guin naj zi'c xtiidx Dios,

<sup>12</sup> guiáad bin biajb runejz naj zi'c ree bén rigueijn xtiidx Dios; per rdxin gajc xindxab rquiedix laan luxdoo reeman chitëë chililadx reeman laan abi' gac reeman perdon.

<sup>13</sup> Guiáad bin biajb loj ree guiaj, naj zi'c ree bén rigueijn xtiidx Dios, abi' dád nix ru luxdoo reeman rigueijn reeman laan, per guial naj reeman zi'c cwaan ni ad yu't liuj, rliladx reeman laan tiblädëd abi' chi rzagdiaj reeman laa rusa'n gajc reeman ni rliladx reeman.

<sup>14</sup> Guiáadza bin biajb loj ree yaquiëjch, naj zi'c ree bén rigueijn xtiidx Dios; per ru reeman xgab por gra ree guialnaza'c riga' loj guidxliuj guie rüjn tëë reeman ni rëntzi reeman, abi' zianz rucwëëz rucaagdiajg reeman xtiidx Dios ad rüjn tëët reeman ni rënman.

<sup>15</sup> Guiáad bin biajb loj yujza'c, laan naj zi'c ree bén rucaagdiajg xtiidx Dios, rucaagdiajg reeman laan con guidib luxdoo reeman za'dxi'ch tëë reeman loj xnejzaman, zianczi rüjn reeman ni rënman.

*Achet ni naguie'ch yu'  
(Mr. 4:21-25)*

<sup>16</sup> 'Achut bén ruze'c tijb guij dxel ruta'cwaman laan, ad rudxe' tëëtaman laan xan lon, ruzujman laan ya din gusnin loj ree bén chu' lënü.



<sup>17</sup> Achet ni naguie'ch yu' ni ad zaguiant ad yu' tēet ni ralan ni ad zagbeet bejn, zadxin dxej gag-bee bejn laan.

<sup>18</sup> 'Zeel gol bacaagdiajg zagdxē, bēn ma rignia' gusnuu chignia'man mazri, per bēn ad rignia't, xt ta'n ni naladxaman rignia'man ad zignia'traman.

*Xniaa Jesús con ree bijchaman*  
(Mt. 12:46-50; Mr. 3:31-35)

<sup>19</sup> Xniaa Jesús con ree bijchaman bidxin reeman lod za'man, per ad gojct nibig reeman lojman guial dád zien bejn riga'.

<sup>20</sup> Abi' yu' bēn bagojn Jesús rēbaman:

—Laa xniaal con ree bijchil za' lule' guin rēn reeman guinieenē reeman lūj.

<sup>21</sup> Badxi' Jesús laan rēbaman:

—Bēn rucaagdiajg ree xtiidx Dios rūjn tēē reeman zi'c rēnman, laa reeman naj da nan laa tēē reeman naj da bichan.

*Racwēz Jesús bidoxh*  
(Mt. 8:23-27; Mr. 4:35-41)

<sup>22</sup> Tijb dxej guyu Jesús loj barcw con ree xbejman, abi' rēbaman loj reeman:

—Yo' ree zatiblad ro' nijs guin.

Zianz zē reeman.

<sup>23</sup> La'tgaj cadēd reeman loj nijs guin, goodyējs Jesús. Dxel guzuloj cabi' bidoxh loj nijs guin, abi' cadxa nijs loj barcw guin, ma cazēēbczi barcw guin xan nijs.

<sup>24</sup> Dxel bacwēen reeman Jesús, rēb reeman:

—¡Mextr! ¡Mextr! ¡Ma cayzēēb ree xan nijs!

Abi' bixche Jesús gunabeeman bacwëez bidoxh guin nē xtüjp nijs guin, zianz gulëjz reen dxel bayajcdxe.

<sup>25</sup> Abi' rëbaman loj reeman:

—¿Conza xguialrliladxidi?

Per laa reeman dád bidxeb reeman badxa tëë loj reeman, abi' canabdiidx loj lasa' reeman rëb reeman:

—¿Chu bën guin zeel rniabeeman bi nē nijs, abi' ruzoob reen xtiidxaman?

*Rayüjn Jesús tijb xin yu' xindxab luxdoo*

*(Mt. 8:28-34; Mr. 5:1-20)*

<sup>26</sup> Dxel badxin Jesús con ree xbejnman xdajn ree bën Gadara, ni riga' zatiblad ro' nijs Galilea.

<sup>27</sup> Chi barii Jesús loj barcw guin, bibig tijb xin luguiedx guin lojman. Ma gojc xchej da't yu' xindxab luxdoox. Ad rajcwt xabix, ad nabantix lënü, ganaxzi ro' ree baa nabanx.

<sup>28</sup> Chi baguiaax Jesús bazuxibix lojman, guneex rejs rëbix:

—¿Xhie rënl con naj, Jesús, Xi'n Dios yu' xanyabaa? Rniaaban lojl ad gusagzil naj.

<sup>29</sup> Rëbix zian guial ma canabee Jesús din yarii xindxab guin luxdoox. Ma gojc xchej naaz xindxab guin laax. Abi' ma guxhii ree bejn yaax nē guia'x con caden chitëë ban chex, per rutüguia'gajquix caden guin abi' rulaagdxax xindxab guin laax niz lod achut bejn zojb.

<sup>30</sup> Gunabdiidx Jesús lojx rëbaman:

—¿Chu lal?

Badxi'xan rëbix:

—Legión lan.

Rëbix zian guial zien da't ree xindxab yu' luxdoox.

<sup>31</sup> Rëb ree xindxab guin loj Jesús chitëë guixhiaalaman laa reex gabijl.

<sup>32</sup> Dajn guin riga' zien ree cüch cayaw reeb. Zeel rëb ree xindxab guin lojman din gudëëman mod chu' reex lën ree cüch guin, dxel cwëjbaman.

<sup>33</sup> Zianz barii reex luxdoox bayu reex lën ree cüch guin, abi' guzuloj cuxüün reeb zianz bitidia' reeb ro' bala' xt loj nijs, lod gu' reeb nijs abi' güjt reeb.

<sup>34</sup> Chi baguiaa ree bën cayajp ree cüch guin ni goc, baxüün reeman bicojn reeman bejn ree luguiedx në ree dajn.

<sup>35</sup> Dxel wej reeman biquiaa reeman ni goc. Chi bidxin reeman lod za' Jesús, baguiaa reeman xin barii xindxab guin ree luxdoo, zojbix guia'man ma najcw xabix, ma badëdguienx abi' bidxeb reeman.

<sup>36</sup> Guiáad ree bën baguiaa ni goc, be reeman diidx loj reeman xhienaag bayajquix.

<sup>37</sup> Graczi ree bën zojb Gadara gunab loj Jesús din yazaman yagaj guial dád rdxeb reeman. Dxel bayë'paman loj tijb barcw, ziataman.

<sup>38</sup> Guiáad xin barii xindxab guin ree luxdoo rëbix lojman din chinalix laaman, per ad cwëjbtaman, rëbaman lojx:

<sup>39</sup> —Baguiaj lidxil, biguiedx graczi ni been Dios por lüj.

Dxel ziax luguiedx guin abi' bex diidx loj gra ree bejn ni been Jesús por laax.

*Rayajc xi'n Jairo në béngunaa bagaal xab Jesús  
(Mt. 9:18-26; Mr. 5:21-43)*

<sup>40</sup> Chi badxin Jesús zatiblad ro' nijs guin, dád rabaa gra ree bén za' yagaj guial badxinman din mal cabèz reeman laaman.

<sup>41</sup> Dxel bidxin bén la Jairo, laaman rniabee lèn tijb xyadoo ree bén Israel. Bazuxibaman loj Jesús, rëbaman lojman din cheman lidxaman,

<sup>42</sup> guial yu' tijb xi'nman biin chiptio'p ijz, ma guiëtczim. Chi zë Jesús dád zien ree bejn zinal laaman xt rixa't reeman laaman.

<sup>43</sup> Abi' tijb béngunaa no'ch loj reeman, ma gojc chiptio'p ijz ragxuuman ryajbaman rejn. Ma banijtaman graczi ni rajpaman guial wejman loj ree doctor, per ni'qui tijbaman ad gojct nayüjn laaman.

<sup>44</sup> Bibigaman niz xijch Jesús abi' bagaalaman guia' xabaman. Loj hor ziigajc bayajcaman.

<sup>45</sup> Dxel gunabdiidx Jesús rëbaman:

—¿Chu baqui' naj?

Abi' graczi reeman rëb guial ad laat reeman baqui' laaman. Zianz rëb Bëd loj Jesús:

—Mextr, graczi ree bejn xt rixa't reeman lüj cucadxaa tëë reeman lüj, abi' rniabdiidxil chu baqui' lüj.

<sup>46</sup> Per rëb Jesús zatijb:

—Yu' chu baqui' naj din gogbeen yu' tijb bén ma bayajc con da guialrniabeen.

<sup>47</sup> Chi gogbee béngunaa guin guial ma gogbee gajc Jesús ni beenman, guidib rnijman bigzuxibaman loj Jesús. Dxel rëbaman lojman guidibloj ree bén guin chexc zeel baqui'man xabaman abi' loj hor guin gajc bayajcaman.

<sup>48</sup> Dxel rëb Jesús lojman:

—Xi'n, ma bayajquil guial bililadxil naj, baguiaj zagdxe.

<sup>49</sup> Sta caneenë Jesús béngunaa guin, chi bidxin tijb bén guza lidx Jairo, bén rniabee lën xyadoo ree bén Israel, rëbaman loj Jairo:

—Mal güjt xi'nl, ad ruslenril Mextr guin.

<sup>50</sup> Per chi biguiejn Jesús zian, rëbaman loj Jairo:

—Ad rdxebil, bililadxzi, zayajcqui xi'nl.

<sup>51</sup> Chi bidxin reeman lidxaman, ad cwëjbt Jesús niu ree ben ren, Bëdzi con Waj, con Jacob, con ree xdad xniaa bindo guin.

<sup>52</sup> Graczi ree bén riga' yagaj cayoon, yu'naya tëë reeman por laam. Per rëb Jesús loj reeman:

—Ad roondi, ad güjttim, naga'yëjszim.

<sup>53</sup> Graczi reeman baze' laaman guial ma ragbee reeman güjtim.

<sup>54</sup> Dxel gunaaz Jesús yaam, guneeaman rejs, rëbaman:

—Bindoo, bixche.

<sup>55</sup> Loj hor ziigajc babanm, bixchem. Dxel gunabee Jesús badëëd reeman ni gudawim.

<sup>56</sup> Dád badxa loj ree xdadim, per rëb Jesús loj reeman achu loj guiëb reeman ni goc.

## 9

*Rxhiaal Jesús guidxiptio'p ree xbejnman chiglüü reeman xtiidx Dios*

*(Mt. 10:5-15; Mr. 6:7-13)*

<sup>1</sup> Gurejdx Jesús guidxiptio'p ree xbejnman, abi' badëëman guialrniabee loj reeman din yabëë reeman graloj xindxab luxdoo ree bejn yayüjn tëë reeman bénragxuu ree.

<sup>2</sup> Guxhaalaman laa reeman chiglüü reeman xhienaag naj xgualrniabee Dios, yayüjn tää reeman bénragxuu ree.

<sup>3</sup> Rëbaman:

—Ad chinëdi xhienin par runejz: ni'qui yagrli-adxidi, ni'qui guijxh, ni'qui gualraw, ni'qui milia, ni'qui stibnejz xabidi.

<sup>4</sup> Chutëez lidx guidxindi, tib gol baya'nzi xt chi yazadi luguiedx guin.

<sup>5</sup> Bal yu' guiedx lod ad rënt reeman lëjt, gol baza yagaj, gol gudxiyp guxyuj guia'di zi'c tijb sen gual ad rënt reeman guzoob reeman xtiidx Dios.

<sup>6</sup> Dxel brii reeman zë reeman tijbgaj guiedx zigtie'ch reeman xtiidxza'c Dios, rayüjn tää reeman bénragxuu ree.

### *Riguiejn Herodes ni cayüjn Jesús*

*(Mt. 14:1-12; Mr. 6:14-29)*

<sup>7</sup> Chi gogbee rey Herodes graczi ni cayüjn Jesús. Guyunawëëgaman gual yu' ree bejn rëb, Waj Bén baroobnijs bejn ree ma baban,

<sup>8</sup> yu' tää reeman rëb Elíasan Bén badëë xtiidx Dios loj ree bejn ma balüüloj, yu'za reeman rëb, tijb ree Bén badëë xtiidx Dios loj ree bejn gocli ma baban.

<sup>9</sup> Per rëb Herodes:

—Naj gajc gunabee biru' yëjn Waj. ¿Chuza Bénan rigujejn ruza't ree bejn xcwent ni cayüjnman?

Zianan zeel rüjn Herodes naguiejn guguaaman Jesús.

### *Ruyaan Jesús gaay mil bejn*

*(Mt. 14:13-21; Mr. 6:30-44; Jn.6 :1-14)*

<sup>10</sup> Chi badxin ree xi apóstoles Jesús, be reeman graczi ni biguieen reeman. Dxel binëman laa reeman lod achutczi bejn zojb, gajxh guiedx Betsaida.

<sup>11</sup> Per chi gogbee ree bejn, dxel zinal reeman laaman lod zëman. Abi' balüüman laa reeman xcwent xguialrniabee Dios bayüjn tēëman bënragxuu ree.

<sup>12</sup> Chi ma cadxe, bibig guidxiptio'p ree apóstoles lojman rëb reeman:

—Güjdx loj gra ree bën guin din yaguiaj reeman chitiil lod yaya'n reeman luguiedx doo ree në ree ranch, chitiil tēë ni gaw reeman din lod nadxu' ree achetczi yu'.

<sup>13</sup> Dxel rëbaman loj reeman:

—Lëjt gajc gol badëëd ni gaw reeman.

Abi' rëb reeman:

—Per gaayzi guiadxtil naca'n con zatio'p bëjl, bajtëë bal yo'n yusiin ni gaw gra reeman.

<sup>14</sup> Abi' cost gaay mil ree xinguaaaw riga' yagaj. Per rëb Jesús loj ree xbejnman:

—Gol güjdx loj reeman din cwe tü'pchii gaj reeman.

<sup>15</sup> Abi' bagojn reeman laa reeman persi gurej gra reeman zian.

<sup>16</sup> Dxel cwa'man guigaay guiadxtil guin con zatio'p bëjl guin. Gules lojman xanyabaa, badëëman quixtëë loj Dios, zianz gula'man laa reen badëëman loj ree xbejnman din qui's reeman laan loj ree bën guin.

<sup>17</sup> Graczi reeman gudaw xt bigdxinladx reeman. Abi' bato'p reeman chiptio'p dxüm nilaay baya'n.

*Rëb Bëd guial Jesús naj Cristo  
(Mt. 16:13-19; Mr. 8:27-29)*

18 Tijb dxej cabejdx canab Jesús Dios, za'në ganaxzi ree xbejnman. Gunabdiidxaman loj reeman, rëbaman:

—¿Chu rëb ree bejn najn?

19 Badxi' reeman laan rëb reeman:

—Yu' reeman rëb lüj naj Waj Bén baroobnijs bejn ree, yu'za reeman rëb lüj naj Elías Bén badëë xtiidx Dios loj ree bejn, yu' tëë reeman rëb lüj naj tijb ree Bén badëë xtiidx Dios loj ree bejn gocli, Bén ma baban.

20 Dxel gunabdiidx Jesús zatijb, rëbaman:

—Laadx lëjt, ¿xhie nadi chu najn?

Badxi' Bëdan rëbaman:

—Lüj naj Cristo. Lüj naj Xi'n Dios.

*Rugojn Jesús guiëtaman*

*(Mt. 16:20-28; Mr. 8:30-9:1)*

21 Rëb Jesús loj reeman achuczi loj guiëb reeman zian,

22 rëb tëëman:

—Rayal sagdiaj Bén guxhaal Dios: ad zënt ree guxtis Israel laaman, ni'qui ree bixhioz rniabee ree bixhioz, ni'qui ree mextr rajc ley. Gugüjt reeman laaman, per ni yayon dxej yabanman.

23 Dxel rëbaman loj gra reeman:

—Bal chu rën gac da bejnman ad rayalt güünman zi'c naj xixgabaman, siibnejzaman gualzi ni tëdzaman guixie guixie abi' guidnalaman naj.

24 Din Bén mazri rën gualnaban ni rajpaman loj guidxliuj guie, zadxin dxej gusëëbaman laan, per Bén guiët por naj, zajpaman gualnaban tiblayaa con Dios.

25 ¿Xhie gan güün bejn gapaman gra ni yu' loj guidxliuj abi' nitaman loj Dios?



<sup>26</sup> Bal chu ratu guza't naj nē da diidxan, ziangajc naj najn Bén guxhaal Dios, yatunē'n laaman chi guialan con da guialrniabeen loj xbiani da Dadan nētēē loj xbiani ree xianjlaman.

<sup>27</sup> Per diidxliczi rnin lojdi, yu' ree bén za' guie ad zējtt xt guguaa reeman xguialrniabee Dios.

*Bidxaa Jesús loj choon ree xbejnman*

*(Mt. 17:1-8; Mr. 9:2-8)*

<sup>28</sup> Chi gudēd cost xhujn dxej ni gunee Jesús diidx guin ree, wejman persi gurejdx gunabaman Dios tijb guijc guia', binēman Bēd con Waj con Jacob.

<sup>29</sup> La'tgaj cabejdx canabaman Dios, bidxaa lojman guiáad xabaman gojcan naquichbēj bidiin tēēn bacha'.

<sup>30</sup> Dxejczy gulentie tio'p ree bejn, caneenē reeman laaman. Tijbaman naj Moisejs zatijbaman naj Elías.

<sup>31</sup> Yu' reeman galay biani cayü reeman diidx guial guiēt Jesús Jerusalén.

<sup>32</sup> Majsí yu' bacaal loj Bēd nē loj ree xcompniaraman, batie'ch xbaaal reeman persi baguiaa reeman xbiani Jesús con zatio'p ree bén za'nēman.

<sup>33</sup> Chi ma baza ree bén caneenē Jesús, rēb Bēd lojman:

—Mextr, įzagdxen nadxu' ree guie! Zajc yaguieenan choon ranch, tijban par lūj, tijban par Moisejs zatijban par Elías.

Per ad ragbeet Bēd xhienin caneeman.

<sup>34</sup> La'tgaj caneeman zian, biguiajt tijb zaj xt guijc reeman, chi ma yu' reeman lēn zaj guin dád bidxeb reeman.

<sup>35</sup> Dxel loj zaj guin biguien cha' bejn, rēbaman:

—Bén guie naj da Xi'nan bén rën da'tan. Gol bacaagdiajg xtiidxaman.

<sup>36</sup> Chi gulox biguien cha'man loj zaj guin, baguiaa reeman xtijbzi Jesús za'man. Abi' ad gutie'cht reeman diidx. Lën ree dxej zii achutczi loj rëb reeman ni baguiaa reeman.

*Rayüjn Jesús tijb xin yu' xindxab luxdoo*  
(Mt. 17:14-21; Mr. 9:14-29)

<sup>37</sup> Bareguiaal, chi baguiajt reeman guijc guia' guin, dád benzien brii bigchaagloj Jesús.

<sup>38</sup> Abi' tijb bén no'ch loj reeman guridxa', rëbaman lojman:

—¡Mextr!, been wen baguiaa da xi'nan din tijbzi laax ra'pan.

<sup>39</sup> Tijb xindxab ru luxdoox abi' rucwixdiajx laax, rugüjtya'x laax rbëë tëex bichijn ro'x. Dád rusagdiajx laax ad rëntix guslaax laax.

<sup>40</sup> Ma gunaaban loj ree xbejnl din nabëë reeman xindxab guin, per ad gojct reeman.

<sup>41</sup> Badxi' Jesús laan rëbaman:

—¡Benguijdx, bén ad rliladxt! ¿Xt goc gazunë'n lëjt gadaan tëën lëjt? Tanë xi'nl guie.

<sup>42</sup> Chi cabig xin guin basajb xindxab guin laax luyuj, bagüjtya'x laax zatijb. Per gunabee Jesús barii xindxab guin, bayüjnman laax dxel bayüman laax loj xdadix.

<sup>43</sup> Graczi reeman badxaloy guialrniabee ni rajp Dios.

*Rugojn Jesús zatijb guial guiëtaman*  
(Mt. 17:22-23; Mr. 9:30-32)

La'tgaj caydxa loj reeman ni cayüjn Jesús, rëbaman loj ree xbejnman:

44 —Gol bacaagdiajgchaaw ni ganin lëjt: yayü reeman Bén guxhaal Dios loj ree bejn.

45 Per laa reeman ad bignia't reeman ni rniece-man guial ad badëëtaman mod nignia' reeman, abi' bidxeb reeman niniabdiidx reeman lojman xhie rën guiëb ni rëbaman.

*¿Chu mazri zojbloj?*

*(Mt. 18:1-5; Mr. 9:33-37)*

46 Dxel guzuloj ree xbejnman rëb loj lasa' reeman chu loj gra reeman mazri zojbloj.

47 Per gogbee Jesús xgab ni cayüjn reeman abi' cwa'man tijb xindoo, bazujman laax cwë'man,

48 dxel rëbaman loj reeman:

—Bén ridxga' tijb xindoo por naj, najn ridxga'man, guiáad bén ridxga' naj, bén guxhaal najn ridxga'man. Din bén rüjn sirv lojdi, laaman mazri zojbloj lojdi.

*Bén ad za't contr dunuj ree za'man con dunuj ree*

*(Mr. 9:38-40)*

49 Rëb Waj loj Jesús:

—Mextr, baguiaan tijb bejn rabëëman xindxab luxdoo ree bejn por xgualrniabeel. Per badxoonan guial ad najtaman dux bejn ree.

50 Per rëb Jesús lojman:

—Ad rudxoondi, din bén ad za't contr dunuj ree, za'man con dunuj ree.

*Gudilë Jesús Jacob con Waj*

51 Chi ma cadxin dxej yayë'p Jesús xanyabaa, dxel beenman xgab guial rüjn naguiejn cheman Jerusalén.

<sup>52</sup> Guxhaalaman b́en guned ree, wej reeman tijb guiedxdo nulen Samaria bitil reeman lod yaya'n reeman.

<sup>53</sup> Per ad cwějbt ree b́en Samaria guin nudëed reeman lod naya'nman guial gogbee reeman cheman Jerusalén.

<sup>54</sup> Chi baguiaa Waj con Jacob zian, rëb reeman lojman:

—Dad, ¿rënl ya yanabeen guiat bajl xanyabaa din gunijtan b́en guin ree zi'c been Elías b́en badëe xtiidx Dios loj ree bejn?

<sup>55</sup> Dxel badxi' loj Jesús loj reeman, abi' gudilëman laa reeman rëbaman:

—¿Nid ragbeedi ya guial loj xindxab zëed ni rnieedi?

<sup>56</sup> Naj, B́en guxhaal Dios, ad zialtan din gunijtan xguialnaban bejn loj Dios, zialan din yabën laa reeman loj dol.

Dxel zë reeman zatijb guiedx.

*B́en rën chinal Jesús*

*(Mt. 8:19-22)*

<sup>57</sup> Chi zë reeman lunejz, tijb bejn rëb loj Jesús:

—Dad, rënan guidnaalan lüj bantëez guin chel.

<sup>58</sup> Badxi' Jesús laan rëbaman:

—Cuyojt ree yu' xguiajbiliaa reeb guiáad ree biguijn yu' xguixbitia's reeb. Per B́en guxhaal Dios ni'qui lod quixh guijcaman ad yu't.

<sup>59</sup> Rëb Jesús loj ben ren:

—Tanal naj.

Per badxi'man laan rëbaman:

—Dad, banee mod gabenë' da Dadan xt chi guiëtaman.

<sup>60</sup> Abi' rëb Jesús lojman:

—Basa'n xdadil con ree b́en ad ŕent guidnal naj, laa reeman guquie'ch laaman. Sa'n ĺuj bigtie'ch diidx xhienaag naj xguialrniabee Dios.

<sup>61</sup> Dxel ŕeb zatijb b́en guin:

—Dad, ŕenan guidnaalan ĺuj, per yalojxgaj banee mod chigzadiidxńe' ree da familan.

<sup>62</sup> Per ŕeb Jesús:

—B́en guiniaaz guia' garad abi' gudxi' lojman niz xijchaman, ad zile't guilia'man yuj zagdx. Ziangajc b́en ŕen guidnal naj, bal id zusa'nman graczi tiblاد ad zile't chu'man loj xguialrniabee Dios.

## 10

### *Rxhiaal Jesús gayojnchii bejn*

<sup>1</sup> Chi gudéd gojc ree ni guin, gulej Dad Jesús gayojnchii bejn, abi' guxhaalaman tio'p gaj reeman luguiedx ree ńe ree ranch din ned reeman che gaj reeman lod naj cheman.

<sup>2</sup> Ŕebaman loj reeman:

—Diidxliczi, zien bejn ŕen gucaagdiajg xtiidx Dios, per ad zient b́en gulüü laa reeman yu'. Zeel gol gurejdx gunab Dios din guixhiaalaman mazri zien b́en gulüü laa reeman.

<sup>3</sup> Gol chej, naj rxhial ĺejt zi'c rej ree xiil galay ree cuyojt.

<sup>4</sup> Ad chinédi guijxh, ni'qui milia, ni'qui zatib nejz xguréchidi, ad sudxedi guinieenédi bejn ree runejz.

<sup>5</sup> Bantééz ĺenü chu'di, yalojxgaj gol güjdx: “Dios yabe'cdxe luxdoodi.”

<sup>6</sup> Abi' bal lënüzii yu' ree bën rayal guialnaza'c guin, zaya'nan yagaj. Guiáad bal id rayal reeman laan zayejcan con lëjt.

<sup>7</sup> Yagaj gol baya'n, gol gudaw, gol gu' ni gunee reeman. Din bën rüjn dxiin rayal gaxaman. Yagajzi gol baya'n ad bal yaya'ndi lood ren.

<sup>8</sup> Chi guidxindi tijb guiedx lod yaca' reeman lëjt, gol gudaw ni gunee reeman.

<sup>9</sup> Gol bayüjn ree bënragxuu yu' ree luguiedx guin, gol güjdx tëë loj reeman: “Ma zëed xguialrniabee Dios gajxh par lëjt.”

<sup>10</sup> Per bal guidxindi tijb guiedx lod ad rënt reeman yaca' reeman lëjt, gol brii lunejz, gol güjdx loj reeman:

<sup>11</sup> “Xt xgoxyuj ladxidi ni cwa du guia'n, radxijpan zi'c tijb sen guial ad bidxga'tidi dux tiidxan. Per gol gogbee, guial ma zëed xguialrniabee Dios gajxh par lëjt.”

<sup>12</sup> Naj rni lëjt guial dxej yadëed ree bejn cwent loj Dios, mazri casti narooob yayal reeman guial loj ree bën gure guiedx Sodoma.

*Bën ad bazoobt ree xtiidx Dios*  
(Mt. 11:20-24)

<sup>13</sup> Rëb tëë Jesús:

—¡Probza lëjt bën Corazín! ¡Probza lëjt bën Betsaida! Din bal guiedx Tiro në guiedx Sidón niajc gra ree milagr ni goc ladxidi, diizd gocli nayüjn reeman xgab por xtol reeman, niajcw reeman lajd ya's nuroob tëë cobdëj guiyc reeman zi'c tijb sen guial ma bayüjn reeman xgab por xtol reeman.

<sup>14</sup> Per rnin lojdi guial dxej yadëed ree bejn cwent loj Dios, mazri casti narooob yayalidi guial loj ree bën Tiro në ree bën Sidón.

<sup>15</sup> Guiáad lëjt, bën Capernaum, ad naladxidi yayalidi xanyabaa, lëjt yayal gabijl.

<sup>16</sup> Dxel rëb Jesús loj ree xbejnman:

—Bén ridxga' lëjt, najn ridxga'man, per bén ad ridxga't lëjt, najn ad ridxga'taman. Guiáad bén ad ridxga't naj, bén guxhaal najn ad ridxga'taman.

*Badxin ree bén gayojnchii guxhaal Jesús*

<sup>17</sup> Chi badxin ree bén gayojnchii guxhaal Jesús, dád raba reeman rëb reeman lojman:

—Dad, xt ree xindxab ruzoob dux tiidxan chi raza'tan lajl.

<sup>18</sup> Abi' rëb Jesús loj reeman:

—Waliquidi, naj baguia, zi'czi rë'p nijs basëeb xguialrniabee xindxab.

<sup>19</sup> Naj banee lëjt guialrniabee din gulëedi guiyc ree bëel në guiyc ree nixüb, në par güündi gan loj xguialrniabee xindxab sin guial güünx lëjt xhienin.

<sup>20</sup> Per ad rabaadi guial ruzoob ree xindxab guin xtiidxidi, gol babaa guial ca lajdi loj libr yu' xanyabaa.

*Rabaa Jesús*

*(Mt. 11:25-27; 13:16-17)*

<sup>21</sup> Loj hor ziigajc babaa da't Jesús por xSprijt Dios, abi' rëbaman:

—Ruzatan lüj zagdxé, Dad, lüj rniabee xanyabaa në loj guidxliuj, din ni baquie'chil loj ree bén rajc në loj ree bén rignia', laan ma balüül loj ree bén ad rajcza'ct. Zian gojcan Dad, din zian guyënl.

<sup>22</sup> 'Da Dadan banee gra lon. Abi' achut nünbee Jesucrist Xi'n Dios, tijbzi Dios, achu tëet nünbee

Dios, tijbzi Jesucrist xi'nman con ree b́en ŕenman ǵunbee Dios.

<sup>23</sup> Dxel baguiaaman loj ree xbejnman, abi' ŕebaman lojzi reeman:

—Xiquilbaa ree b́en guguaa ni cuguaadi.

<sup>24</sup> Din naj rni lojdi, zien ree b́en bad́e xtiidx Dios loj ree bejn ńe ree rey guýen nuguaa ni cuguaadi, per ad baguiaat reeman laan. Guýen reeman nucaagdiajg reeman ni cucaagdiajguidi, per ad bacaagdiajgt reeman laan.

### *Xcwent tijb b́en Samaria*

<sup>25</sup> Tijb mextr rajc ley guzuliman guneeńeman Jesús. Abi' din ǵunman laaman prueb, gunabdiidxaman lojman ŕebaman:

—Mextr, ¿xhie rayal ǵunan din ga'pan gualnaban tiblayaa con Dios?

<sup>26</sup> Badxi' Jesús laan ŕebaman:

—¿Xhie ca loj ley bad́e Dios loj Moisejs? ¿Xhien-aag rignia'lan?

<sup>27</sup> Abi' ŕeb mextr guin:

—“Guýen xDadil Dios guidib guiyc guidib ladxil guýen t́e ben ren zi'c ŕen ĺjgajc.”

<sup>28</sup> Badxi' Jesús laan, ŕebaman:

—Zagdxequi badxi'lan. Bal ǵunl zian zajpil gualnaban tiblayaa con Dios.

<sup>29</sup> Per guýen mextr guin naya'nman zagdx, gunabdiidxaman loj Jesús, ŕebaman:

—¿Chu b́enan guíenan zi'c ŕen naj gajc?

<sup>30</sup> Dxel be Jesús tijb cwent lojman, ŕebaman:

—Tijb b́en Israel briiman Jerusaĺen źeman gúiedx Jerićo. Abi' gunaaz ree xingubaa laaman,



gudijn reex laaman gulan tëë reex gra ni ca'man xt në xabaman, basa'n reex laaman ma güjtczaman.

<sup>31</sup> Dxel gudöd tijb bixhioz niz yagaj, per chi baguiaaman bën guin, zijt bicaaman volt, zëtaman.

<sup>32</sup> Në tijb bën Levita bën rüjn yudar bixhioz ree, gudöd niz yagaj, chi baguiaaman bën guin, zijt bicaaman volt, zëtaman.

<sup>33</sup> Per tijb bën Samaria gudöd niz yagaj, chi baguiaaman bën guin, bayaman laaman,

<sup>34</sup> dxel gubigaman lod naga'man, badxe'man sejt con vin lod nadxeelguijdxaman dxel guxhiiman laan con lajd. Zianz badxiibaman laaman xburaman binëman laaman lënü lod raya'n ree bejn. Yagaj gunajman laaman.

<sup>35</sup> Chi bareguiaal, chi ma yaguiaj bën Samaria guin, gulëëman milia xieen tio'p dxej dxiin badëëman laan loj bën naj lidxan, rëbaman lojman: “Gunaj bën guie, bal gunijtil mazri, naj yaguix laan chi yaye'can.”

<sup>36</sup> Dxel rëb Jesús loj mextr guin:

—Yan, loj guiyon ree bën guin, ¿chu bénan guyën bën gudin ree xingubaan guin?

<sup>37</sup> Badxi' mextr guinan rëbaman:

—Bën baya laaman.

Dxel rëb Jesús lojman:

—Baguiaj, been ziangajc con ben ren.

### *Rignaj Jesús Mart në Li*

<sup>38</sup> Basnuu Jesús zëman abi' bidxinman tijb guiedxdoo, yagaj wejman lidx tijb biin la Mart.

<sup>39</sup> Yu' tijb xbëlim lam Li. Gurej Li guin guia' Jesús cucaagdiajguim ni caneeman.

<sup>40</sup> Per Mart guin mazri ruquiejnne gra xmandadim, abi' bibiguim loj Jesús rëbim:

—Dad, ¿nid rul xgab ya guial rusa'n da bëlan naj con gra mandad guin? Gùjdx lojm din güünm naj yudar.

<sup>41</sup> Badxi' Jesús laan rëbaman:

—Mart, Mart, dád rul xgab guial yu' da't xmandadil.

<sup>42</sup> Per tijbzi ni mazri zojbloj yu'. Li gulejm ni mazri zojbloj, abi' achut zajc chiquiedan lojm.

## 11

### *Rulüü Jesús xhienaag cwedx guiniab bejn Dios (Mt. 6:9-15; 7:7-11)*

<sup>1</sup> Tijb dxej cabejdx canab Jesús Dios. Abi' chi gulox gurejdx gunabaman Dios, rëb tijb xbejnman lojman:

—Dad, balüü dunujn yarejdx yanaaban Dios, zi'c balüü ree xbejn Waj Bén baroobnijs bejn ree.

<sup>2</sup> Abi' rëb Jesús loj reeman:

—Chi cwedx guiniabidi Dios, gol güjdx:

Dad, lüj yu' xanyabaa,

rayal yaya'p da'tan lajl respekt.

Gac zi'c rniabeel.

Gac zi'c rënl loj guidxliuj, zi'c rajc xanyabaa.

<sup>3</sup> Bazaladx ni yadaawan guixie guixie.

<sup>4</sup> Been dunujn perdon gra ree ni mal ma baguieenan, zi'c raguieenan perdon Bén rüjn ree dunujn ni mal.

Ad tiëbil güün xindxab dunujn gan yaguieenan dol, babëë dunujn loj gra ni mal.

<sup>5</sup> Abi' rëb Jesús loj reeman:

—Yaguie'ch ree, tijb lëjt yu' xmiw abi' garol guiaal chedi lidrix, guiëbidi: “Miw, baneesii choon guiadxtil gagui'nan,

<sup>6</sup> din bi't tijb da miwan abi' achet ra'pan gudëdan lojx.”

<sup>7</sup> Dxel nax diizd lënü guin: “Ad ruslenl naj. Ma nayaaw ro' da portan. Ma naga'yë'snë' ree da xi'nan. Ad zile't chixchejn gunen laa reen.”

<sup>8</sup> Per rnin lëjt, majsi bal id zixchex din guneex ni ryaadxidi guial rajc xmiwidi laax. Per zÿjnx nagueijn chixchex din guneex ni ryaadxidi chitëë guslenridi laax.

<sup>9</sup> Zeel rnin lëjt: Gol gunab loj Dios, laaman guneex ni rniabidi. Gol baguuilaman, zadxejlidi laaman. Gol gurejdx gunabaman, zidxga'man lëjt.

<sup>10</sup> Din bën rniab, zaca'man. Abi' bën rguuil, zadxejlaman guiáad bën rbejdx rniab laaman zidxga'man laaman.

<sup>11</sup> '¿Lëjt najdi dad, wen zudëedi tijb guiaj loj xi'ndi ya chi guiniabix guiadxtil?, ¿o zudëedi tijb bëel ya chi guiniabix bëjl?

<sup>12</sup> ¿O zudëedi nixüb ya chi guiniabix dxijt?

<sup>13</sup> Nacli lëjt najdi bëndol rajc rudëedi ni zagdxe loj xi'ndi. ¡Diidxgui xDadidi bën yu' xanyabaa, nid zudëe xSprijtaman loj ree bën rniab laaman ya!

*Rëb ree bejn ca' Jesús xguialrniabee Beelzebú  
(Mt. 12:22-30; Mr. 3:19-27)*

<sup>14</sup> Caybëe Jesús tijb xindxab basa'n tijb bejn gop. Abi' chi barii xindxab guin guzuloj canee bën guin. Dxel dád badxaloj ree bejn.

<sup>15</sup> Per yu' reeman rëb:

—Bén guin rabëë xindxab luxdoo ree bejn por xguialrniabee Beelzebú, xin rniabee ree xindxab.

<sup>16</sup> Yu'za reeman par güün reeman laaman prueb, rëb reeman lojman din güünman milagr zëed xanyabaa.

<sup>17</sup> Per Jesús ragbee gajcaman xgab cayüjn reeman, abi' rëbaman:

—Gra nacion bal id nadxag riga' bejn por wadijl, rlia' lasa' reeman, ziangajc tijb famil bal id nadxag riga' reeman por wadijl, rlia' lasa' reeman.

<sup>18</sup> Ziangajc bal Satanás xin rniabee ree xindxab su contr lasa' xindxab gajquix, nayob nit xguialrniabee. Canin zian guial rëbidi por xguialrniabee Beelzebú rabën xindxab luxdoo ree bejn.

<sup>19</sup> Per bal rabën xindxab luxdoo ree bejn por xguialrniabee Beelzebú, ¿chuza rudëed guialrniabee loj ree xbejn di din yabëë reeman xindxab? Zeel laagajc reeman rulüü guial ad laat rnieedi.

<sup>20</sup> Per por xguialrniabee Dios rabën xindxab luxdoo ree bejn, laan rën guiëb guial ma za'në xguialrniabee Dios lëjt.

<sup>21</sup> 'Bal tijb béngojl da't ca' xguiibaman, rajp lidxaman. Ad zajct cwan bejn ni rajpaman.

<sup>22</sup> Per bal guidxin bén mazri gojl guial lojman güünman laaman gan abi' chisüdaman guiib ni ca'man tia' tëëman gra ni rajpaman.

<sup>23</sup> 'Bén ad za't con naj, za'man contr naj, guiáad bén ad ruto'pt bejn par naj rtie'chaman laa reeman.

*Xindxab rayejc*  
(Mt. 12:43-45)

24 'Chi rarii tijb xindxab luxdoo tijb bejn, abi' rza xindxab guin niz loj yujbidx rguuilix lod yaziiladxix. Chi ad rdxejlt lod yaziiladxix, dxel rüjnx xgab naladxix: “Zagdxeli yaye'can lod bariin.”

25 Abi' chi rayejquix ruguiaax luxdoo bén guin, najn zi'c tijb lénü lod bilioob lod najcchaaw tée.

26 Dxel rica'x zagajdx ree xindxab naj mazri xinmal guial lojx. Abi' ru gra reex luxdoo bén guin. Dxel piorli raya'nman guial zi'c gocaman yaløj.

*Xiquilbaa ree bén ruzoob xtiidx Dios*

27 La'tgaj canee Jesús diidx guin ree, gurixdiaj tijb béngunaa no'ch loj ree benzien guin, rëbaman:

—¡Xiquilbaa béngunaa bazuj lüj loj guidxliuj, bén baslaa tée lüj!

28 Per badxi' Jesús laan rëbaman:

—¡Mazri xiquilbaa ree bén rucaagdiajg xtiidx Dios ruzoob tée reeman xtiidxaman!

*Rniab ree bejn güün Jesús tijb milagr*

*(Mt. 12:38-42; Mr. 8:12)*

29 Zi'cri cado'p ree bejn lod za' Jesús, abi' guzuloj rëbaman loj reeman:

—Bén riga' ree loj guidxliuj yan, naj reeman benmal. Abi' rniab reeman tijb milagr, per achet guguaa reeman, tijbzi zi'c guzac Jonás bén badëë xtiidx Dios loj ree bejn.

30 Zi'c goc Jonás tijb sen par ree bén gure guiedx Nínive, ziangajc Bén guxhaal Dios najman tijb sen par ree bén naban yan.

31 Abi' bén goc reina guiedx Sabá, zabanman chi yadëed ree bejn cwent loj Dios dxel guiëbaman guial ree bén riga' yan, yayal reeman xcasti Dios. Din laaman dád zijt guzaman bicaagdiajgaman

xgualrajc rey Salomón. Abi' yan, naj za'në'n lëjt, mazri lasajcan guial loj rey Salomón.

<sup>32</sup> Ziangajc ree bën guban guiedx Nínive, zaban reeman chi yadëed ree bejn cwent loj Dios abi' guiëb reeman guial ree bën riga' yan, yayal reeman xcasti Dios. Din bën Nínive ree bayejc reeman loj Dios chi bacaagdiajg reeman xtiidxaman ni gunee Jonás. Abi' yan, naj za'në'n lëjt mazri lasajcan guial loj Jonás.

*Guiaaloj bejn naj zi'c biani*

*(Mt. 5:15; 6:22-23)*

<sup>33</sup> 'Achut rucaaguij tijb guij par sun lod naguie'ch, achu tëtë ruta'cw laan lën tijb yagalm. Rayal sun lod guiguienan din gusnin loj bën chu' lënü.

<sup>34</sup> Guiaaloj bejn naj zi'c tijb biani par xcuerpaman. Bal por ni ruguiaal rüjnl ni zagdxë, guidib xcuerpil naj biani. Per bal por ni ruguiaal rüjnl ni mal, guidib xcuerpil naj zi'c lod nacay.

<sup>35</sup> Gojp cudad chitëë chinë guiaalojl lüj loj nejz mal luar loj nejz zagdxë.

<sup>36</sup> Abi' bal ni'qui tibda'n xcuerpil ad rüjnt ni mal, guidibczan gac nayni zi'c chi rusni guij con xbacha'n.

*Ni rüjn ree mextr rajc ley në ree bënfarisew*

*(Mt. 23:1-36; Mr. 12:38-40; Lc. 20:45-47)*

<sup>37</sup> Chi gulox guneenë Jesús laa reeman, tijb bënfarisew rëb loj Jesús din chitaw Jesús lidxaman. Chi guyuman, zianz gurejman xan mex.

<sup>38</sup> Abi' bënfarisew guin badxalojman chi baguiaaman ad banaat Jesús chi ma gawaman zi'c naj xcostumbr reeman.

39 Per rëbaman loj reeman:

—Najdi zi'c tijb vajs con pliajt ni naya xijch, rguiendi benza'c, per luxdoodi yu' da't guialgubaan në ni mal.

40 ¡Bennad! ¿Nid bén been gajc xcuerpidi been luxdoodi ya?

41 Zeel gol been yudar bén achet rajp din guiguien guial najquidi benza'c.

42 '¡Probza lëjt bénfarisew! Rbëecadi ni naj par Dios, rüjndi chi lala' ni rajpidi zi'c bidxtil në rud në graloj ni rxübindi abi' rudëedi tijban loj Dios. Per ad rüjntidi zi'c rayal ad rën tëetidi Dios. Gol bidxga' Dios ad gucwëez tëë gudëedi ni rudëedi lojman.

43 '¡Probza lëjt, bénfarisew! guial ruladxidi cwedi lod rbej ree bén zojbloj lën ree yadoo, ruladx tëedi gugajpdioz ree bejn lëjt zagdxe niz lunejz.

44 '¡Probza lëjt, mextr rajc ley në lëjt bénfarisew, bén rusquiee!, din najdi zi'c baa ni ad rguient, abi' ad ragbeet ree bejn rë'p reeman guijcan.

45 Dxel gunee tijb mextr rajc ley, rëbaman loj Jesús:

—Mextr, në dunujn caneeguijdxil guial rëbil zian.

46 Badxi' Jesús laan rëbaman:

—¡Ziangajc lëjt mextr rajc ley, probza lëjt!, guial rniabeedi bejn ree güün reeman ni nawëëgda't abi' rniabeezidi güün bejn zian guiáad lëjt ni'qui ta'n ad rüjntidi laa reeman yudar din güün reeman zi'c rëndi.

47 '¡Probza lëjt!, guial rüjnchaawidi xbaa ree bén badëë xtiidx Dios loj ree bejn, bén bagüjt gajc ree xbéngulalidi.

<sup>48</sup> Zian ragbee ree bejn guial ruladxidi ni been ree xbéngulalidi. Laa reeman bagüjt ree bèn badëë ree xtiidx Dios loj ree bejn, guiáad lëjt rayüjnchaawidi xbaa reeman.

<sup>49</sup> 'Zeel Dios guial ragbeeman gra ni gac, rëbaman: "Gaxhalan bèn rudëë ree xtiidx Dios loj ree bejn, në ree apóstoles, yu' reeman gugüjtidi yu' tëë reeman sunalidi din güüнди laa reeman xhienin."

<sup>50</sup> Abi' bèn naban ree yan, laa reeman yadëëd cwent loj Dios por rejn ni guxhie' ree bèn badëë xtiidx Dios loj ree bejn, bèn güт ree diizd chi go'tchaaw guidxliuj,

<sup>51</sup> diizd xrejn Abel xt xrejn Zacarías bèn bagüjt reeman ro' yadooro' Jerusalén. Zeel rnin lëjt guial ree bèn naban yan, laa reeman quix por gra reeman.

<sup>52</sup> '¡Probza lëjt, mextr rajc ley!, guial ad rtiëjbtidi chu' ree bejn loj xnejz Dios, ni'quiza lëjt ad rüjnt naguiejn chu'di loj xnejz Dios abi' rudxoondi chu' ree bejn loj xnejzaman.

<sup>53</sup> Chi gunee Jesús zian, dád bidxe'ch ree bënfarisew guin në ree mextr rajc ley. Abi' guzuloj zien ree ni rniabdiidx reeman lojman,

<sup>54</sup> din guidoon xhie guiëbaman din chile' gutedia' reeman laaman.

## 12

### *Xlevadur ree bënfarisew*

<sup>1</sup> La'tgaj canee Jesús zian, guzuloj cado'p por mil bejn, abi' guial zien da't reeman xt rxa't lasa' reeman. Dxel guzuloj Jesús rëbaman yaloy loj ree xbejnman:



—Gol gojp cudad con xlevadur ree bénfarisew, rën guiëban gapidi cudad con ni rusquiee reeman.

<sup>2</sup> Din achet ni naguei'ch yu' ni ad zaguiënt, ad yu' tëët ni ralan ni ad zagbeet bejn.

<sup>3</sup> Zeel gra diidx ni ma guneedi lod nacay, zaguiëjn ree bejn laan lod nayni. Guiáad ree diidx ni ma guneedi ralan lënü, yu' chi cwidxa' reeman guinee reeman diidx guin ree diizd guijc ree yu.

*Chu rayal guidxeb bejn*

*(Mt. 10:28-31)*

<sup>4</sup> 'Rnin lëjt, ad ridxebidi bén rën ree gugüjt lëjt din zile' gugüjt reeman xcuerpidi, sa'n xsprijtidi ad zile't gugaal reeman laan.

<sup>5</sup> Ganin lëjt chu rayal guidxebidi: gol bidxeb Dios bén rajp guialrniabee guial chi ma biquiedaman xguialnabandi zajc guzaalaman lëjt gabijl. Zeel gol bidxebaman.

<sup>6</sup> Lëjt ragbee guial biguijndoo ree ad lasajct reeb wayëjx, per Dios ad rayanladxtaman ni'qui tijb reeb.

<sup>7</sup> Guiáad lëjt xt guidxguijquidi, graczan nayab loj Dios. Zeel ad rdxebidi din mazri lasajquidi guial loj zien da't ree biguijndoo.

*Bén rëb loj ree bejn guial najman xbejn Jesucrist*

*(Mt. 10:32-33; 12:32; 10:19-20)*

<sup>8</sup> 'Rnin lëjt, chutëöz bén guiëb loj ree bejn guial najman da bejnan, ziangajc naj najn Bén guxhaal Dios guiën loj ree xianjl Dios guial da bejnan najman.

<sup>9</sup> Per bén guiëb loj ree bejn guial ad najtaman da bejnan, ziangajc guiën loj ree xianjl Dios guial ad najtaman da bejnan.

<sup>10</sup> 'Chutëez Bén guinieeguidx Bén guxhaal Dios zajcaman perdon, sa'n Bén guinieeguidx xSprijt Dios, ad zajctaman perdon.

<sup>11</sup> 'Chi chinë reeman lëjt lën ree yadoo o loj ree juejs në loj ree guxtis, ad aal chu'di xgab xhienaag yadxi'di xtiidx reeman.

<sup>12</sup> Din chi guidxin hor ni guinieedi, xSprijt Dios gunee diidx guinieedi.

*Xcwent tijb xinrijcw*

<sup>13</sup> Tijb Bén no'ch loj ree benzien guin rëb loj Jesús:

—Mextr, güjdx loj da bichan din gunee ni rayalan.

<sup>14</sup> Per rëb Jesús lojx:

—¿Chu bazuj naj günan guialguxtis o gagui'san ni tia'di?

<sup>15</sup> Rëb tëëman loj reeman:

—Gol gojp cudad; ad sëëbladxidi gapidi ni rajp ree ben ren, din ad ni rajpt bejn runee guialnaban.

<sup>16</sup> Dxel beman tijb cwent loj reeman, rëbaman:

—Guyu tijb xinrijcw, dád gojc xguiniaax.

<sup>17</sup> Dxel beenx xgab naladxix: “¿Xhienaag günan? Ad ra'ptan lod gagu'chaawan guialnaza'c guin ree.”

<sup>18</sup> Abi' gunaladxix: “Ma ragbeen xhienaag günan. Guse'nan yu lod rgu'chaawan da guialnaza'can din günan mazri yu narooB ree lod gagu'chaawan laa reen, në graczi ni ra'pan.

<sup>19</sup> Dxel guiën, dád zien guialnaza'c ra'pan par zien ijz, yaziiladxan, gawan, guië'n yabaa tëën.”

<sup>20</sup> Per rëb Dios lojx: “Xin tont, yanguxhin gajc guiëtil, laadx ni nagu'chaawil, ¿chu yaya'nnë laan?”

<sup>21</sup> Zian rzajc b́en rgu'chaaw ni za'c par laagajca-man, per loj Dios achet rajpaman.

*Ahetczi rayal chu' bejn xgab*

*(Mt. 6:25-34)*

<sup>22</sup> Dxel r̀eb Jeśus loj ree xbejnman:

—Naj rni l̀ejt: Ad chu'di xgab por ni gawidi par guibandi ni'qui por lajd ni gacwidi.

<sup>23</sup> Guialnaban mazri lasajcan guial loj guialraw, guiáad xcuerp bejn mazri lasajcan guial loj xabaman.

<sup>24</sup> ¡Gol baguiaa balo ree! Ad rxübint reeb ad rato'p t̀eet reeb guialnaza'c, ad rajp t̀eet reeb lod yagu'chaaw reeb guialnaza'c guin, per Dios rudéed ni raw reeb. ¡Abi' mazri lasajquidi guial loj reeb!

<sup>25</sup> ¿Wen guial ru da'tidi xgab ma güün l̀ejt gajc mazri ziool ya?

<sup>26</sup> Abi' bal ni'qui zian ad zile't güüнди, ¿xhieczy gan rudi xgab por ni ren ree?

<sup>27</sup> ¡Gol baguiaa xhienaag rini's ree guiaa dajn! Ad rüjnt reen dxiin ad rguib t̀eet reen. Per ni'qui rey Salomón ad guzujchaawt zi'c za'chaaw ree guiaa guin, majsi mast guzujchaawaman.

<sup>28</sup> Abi' bal gui'xh dajn ruzujchaaw Dios yan, majsi guixiezi che'can. ¡Diidxgui l̀ejt, b́en ad rliladxza'ct ree laaman nid zuneeman ni gacwidi ya!

<sup>29</sup> Zeel ad rudi xgab xhie gawidi o xhie guië'di, ad bal tib yu'zidi laan xgab.

<sup>30</sup> Din b́en ad nünbeet ree Dios rüjn zian. Laa reeman ru xgab por gra ree ni guin. Per l̀ejt yu' xDadidi, laaman ragbeechaaw xhienin riaadxidi.

<sup>31</sup> Per yalojxgaj gol baguüil güüнди zi'c rniabee Dios, laaman gunee gra ni ryaadxidi.

*Guialnaza'c yu' xanyabaa*  
(Mt. 6:19-21)

<sup>32</sup> 'Lëjt najdi da bejnan, ad rdxebidi. Ta'nzi najdi, per xDadidi Dios ma beenman xgab nabeenëdi laaman.

<sup>33</sup> Gol bato' ni rajpidi din gudëedan loj ree bënprob. Gol been naguiejn güüнди gan guialnaza'c ni ad rarat ni yu' xanyabaa, lod ad zut xingubaan cwan laa reen lod ad zacabe tëet reen.

<sup>34</sup> Din lod rajpidi guialnaza'c guin, yagaj za' xquiarguiejndi.

*Gol guzujsin*

<sup>35</sup> 'Gol guzujsin zi'c bën ma najcw xab ca' tëë xguijman par griiman.

<sup>36</sup> Gol been zi'c ree mojs cabëz yadxin xpatron reex, bën zë loj guialruxhliaa, din diob guixhial reex ro' port yayuman chi gucaaman.

<sup>37</sup> ¡Xiquilbaa ree mojs naga'naa cabëz xpatron reex! Naj rni lëjt, laagajc patron guin cwe'c laa reex xan mex, dxel chicchaa xabaman din gudëëman ni gaw reex.

<sup>38</sup> Xiquilbaa reex bal guidxaagloj xpatron reex laa reex naga'naa reex, majsi yadxinman garol guiaal o chi ma cayreguiaal ya.

<sup>39</sup> Gol been xgab, bal tijb bejn ragbeeman xhie hor chu' xingubaan lidxaman cwanx, ad za-tiëjbtaman chu'x lidxaman.

<sup>40</sup> Zianan zeel gol guzujsin din ad ragbeetidi dxejczy gui't Bén guxhaal Dios.

*Mojs za'c në mojs guiidx*  
(Mt. 24:45-51)

<sup>41</sup> Dxel gunabdiidx Bëd loj Jesús, rëbaman:

—Dad, ¿par dunujzan bel cwent guin ya o par gra ree bejn?

<sup>42</sup> Badxi' Jesús laan, rëbaman:

—¿Chu lëjt naj zi'c tijb mojs za'c, nazobdiidx, rusa'n xpatronx laax lidxaman persi rulenx gra ree mojs rudëë tëëx ni raw reex chi rajl hor?

<sup>43</sup> Xiquilbaa mojs cayüjn dxiin zagdxë chi yadxin xpatronx.

<sup>44</sup> Din diidxliczi rnin lëjt, zusa'n gra xieen patron guin loj mojs guin.

<sup>45</sup> Per bal naladx mojs guin: “Zaglaari yaguaaad da patronan”, zianz sulojx gusagzix gra ree bën rüjn dxiin yagaj, zi'c béngunaa zi'c xinguaaaw, dxel suloj gawix, guië'x südx tëëx,

<sup>46</sup> abi' yadxin xpatronx tijb dxej ni ad rbëztix në tijb hor ni ad ragbeetix. Dxel dád casti narooob gudëëd patron guin laax, guixhiaalaman laax lod rayal ree bën ad ruzoobt diidx.

<sup>47</sup> 'Din tijb mojs ragbee ni rën xpatronx güünx, abi' ad za'tix porvinid ad ruzoob tëëtix diidx, dád casti narooob tëdix.

<sup>48</sup> Per mojs ad ragbeet ni rën xpatronx güünx abi' güünx ni rayal casti, ta'nz tëdix casti. Din bën badëëd Dios quiargueijn, mazri zien ni rayal güünman por quiargueijn ni badëëd Dios lojman. Ziangajc bën badëëd Dios guialrniabee, mazri zien ni rayal güünman por guialrniabee ni badëëd Dios lojman.

*Por Jesús rlia' lasa' ree bejn*

*(Mt. 10:34-36)*

<sup>49</sup> 'Zialan loj guidxliuj zi'c tijb b́en zidgacaaguij xhienin, abi' jma ŕen nejzdoon tiaguijn!

<sup>50</sup> Gazaagdiajn guiét t́een, abi' j́dád yu'nayan diizd yan xt chi gacan cumplid!

<sup>51</sup> Ad naladxidi zialan loj guidxliuj par yabecdxen luxdoo bejn, zialan din guial guililadx reeman naj chu' wadijl.

<sup>52</sup> Din diizd yan, lod naj reeman gaay loj tijb famil, til choonman contr tio'paman, tio'paman contr choonaman.

<sup>53</sup> Dad su contr xi'nman guiáad xi'nman su contr laaman; na su contr xi'ndxa'paman guiáad laam su contr laaman; abi' nasuegr su contr xwalidxaman guiáad laam su contr laaman.

*Sen rguien xanyabaa*

*(Mt. 16:1-4; Mr. 8:11-13)*

<sup>54</sup> Ŕeb t́eé Jesús loj ree benzien guin:

—Chi ruguiaadi ririi záj niz lod ŕeéz gubijdx, ŕebidi: zal guia, abi' rajc gajc zian.

<sup>55</sup> Abi' chi ririi bi niz sur, ŕebidi: gac nalaa, abi' rajc gajc zian.

<sup>56</sup> j́Bén rusquiee! Ragbeedi xhie ŕen guiéb sen rguien xanyabaa ńe loj guidxliuj, ¿chexquisa zeel ad ragbeetidi xhie ŕen guiéb ni cayajc loj guidxliuj yan?

*Babej zagdxe con b́en rdx'e'ch lúj*

*(Mt. 5:25-26)*

<sup>57</sup> '¿Chexc ad ŕujnt ĺejt gajc xgab conin naj ni zagdxe?

<sup>58</sup> Bal chu b́en rudēēd lūj loj guxtis, been naguiejn baya'nnēman diidx zagdxe la'tgaj yu' tiamp, chitēē yayūman lūj loj guxtis, abi' guxtis guin yayū lūj loj ree b́en cu' lūj ladxguiib.

<sup>59</sup> Naj rni lūj, ad zariitil ladxguiib guin xtczi quixil gra ni na guxtis guin.

## 13

### *Gol bayūjn xgab por xtolidi*

<sup>1</sup> Lēn gajc ree dxejzii wej tio'p choon ree bejn biguie reeman diidx loj Jesús guial bagūjt Pilato tio'p choon ree b́en Galilea, abi' bago'chaman xrejñ reeman con xrejñ ree be bagūjt reeman par gudēēd reeman loj Dios zi'c gon.

<sup>2</sup> Dxel rēb Jesús:

—Ad bal naladxidi guzajc ree b́en Galilea guin zian guial naj reeman mazri b́endol guial loj gra ree b́en Galilea.

<sup>3</sup> Din naj rni lējt guial ad ziantan. Abi' bal id zayūjñdi xgab por xtolidi ziangajc saquidi.

<sup>4</sup> Ad bal naladxidi b́en chiinbichoon gūt ree chi guxa't torre ni la Siloé laa reeman, naj reeman mazri b́endol guial loj gra ree b́en zojb Jerusalén.

<sup>5</sup> Naj rni lējt guial ad ziantan. Abi' bal id zayūjñdi xgab por xtolidi ziangajc saquidi.

### *Xcwent yag higo ni ad rtiat*

<sup>6</sup> Dxel be Jesús tijb cwent loj reeman, rēbaman:

—Tijb bejn gojpaman yag higo lod nagu'man uv, abi' biquiaaman bal ca higo lojn, per achetczi bidxaaglojman.

<sup>7</sup> Dxel rēbaman loj b́en rajp guidxliuj guin: “Baguiaa, ma gojc choon ijz rialan rguilan higo loj

yag guin, abi' achetczi rdxaglojn. Batüügan din nawëëgzi rüjnan loj guidxliuj guie.”

<sup>8</sup> Per rëb bën rajp guidxliuj guin: “Dad, basa'nsiin zatib ijz, yabeciaan yuj xanan gagu' tëënan abon.

<sup>9</sup> Rupent zian tian, per bal id zacan dxel tügan.”

*Bayüjn Jesús tijb béngunaa ca bëw xijch*

<sup>10</sup> Tijb dxej raziiladx ree bejn, culüü Jesús bejn ree lën tijb yadoo,

<sup>11</sup> yagaj za' tijb béngunaa ma gojc chiinbichoon ijz ragxuuman, tijb xindxab basa'n laaman con tijb bëw xijchaman, ad rile'tczi yaliman.

<sup>12</sup> Chi baguiaa Jesús laaman, gurejdxaman laaman, rëbaman:

—Na, ma bayajquil guialguijdx ni goquil.

<sup>13</sup> Dxel badxiib yaaman guiycaman; abi' loj hor guin gajc baliman, zianz guzuloj cuza'taman Dios zagdxe.

<sup>14</sup> Per bën rniabee lën yadoo guin dád bidxe'chaman guial bayüjn Jesús bën guin dxej raziiladx ree bejn, dxel rëbaman loj ree bejn:

—Xho'p dxej yu' guial güün bejn dxiin, loj ree dxej guin gol guida din yayajquidi, per ad dxej raziiladxt bejn.

<sup>15</sup> Badxi' Dad Jesús laan rëbaman:

—Bën rusquiee, ¿nid rxhiec xgo'ndi o xburidi dxej raziiladx ree bejn ya par chiquië'di laa reeb nijs?

<sup>16</sup> Béngunaa guie zëëdaman loj xdiaa Abraham, ma gojc chiinbichoon ijz naxhii xindxab laaman con guialguijdx guie. ¿Wen id zajc yayajcaman dxej raziiladx ree bejn ya?



<sup>17</sup> Chi rëb Jesús zian, gra ree bén rdxe'ch laaman baya'n xtu; per graczi ree bejn rabaa guial ruguiaa reeman gra ree ni zagdxé ni rüjnman.

*Xcwent xhaj moxtajs*  
(Mt. 13:31-32; Mr. 4:30-32)

<sup>18</sup> Rëb tëë Jesús:

—¿Xhienaag ganin naj xguialrniabee Dios o xhie gulün lojdi din chignia'di xhienaag naj xguialrniabeeman?

<sup>19</sup> Laan naj zi'c xhaj moxtajs ni rxübin bejn loj xguiniaaman, rni'san xt rajcan yag narooob. Abi' guial narooob da't rajcan xt rüjn xguixbitia's ree biguijn xidxan.

*Xcwent levadur*  
(Mt. 13:33)

<sup>20</sup> Rëb Jesús zatijb:

—¿Xhienaag ganin naj xguialrniabee Dios?

<sup>21</sup> Laan naj zi'c levadur ni rugo'ch tijb béngunaa choon midid harin persi rusaaguijn gra cob guin.

*Port nadëë*  
(Mt. 7:13-14, 21-23)

<sup>22</sup> Chi zë Jesús Jerusalén, rulüüman bejn ree luguiedx narooob ree në ree luguiedx dobëz niz lod rdëdaman.

<sup>23</sup> Abi' tijb bejn gunabdiidx lojman rëbaman:

—Dad, ¿ta'nz ree bén gac perdon ya?

Badxi' Jesús laan rëbaman:

<sup>24</sup> —Gol been naguiejn din chu'di niz ro' port nadëë, din naj rni lëjt, zien ree bén rën chu', per ad zile't chu' reeman.

<sup>25</sup> Din chi chisu bén naj lidxan gusiaawaman ro' port guin, lëjt guial yaya'ndi xchu, gucaadi ro'

port guin guiëbidi: “Dad, guxhal.” Per yadxi'man xtiidxidi naman: “Ad ragbeetan ban zadi.”

<sup>26</sup> Dxel suloj guiëbidi: “Tijbzi badaaw ree, tijbzi badü' ree, niz lad dux nejzan balüül dunujn.”

<sup>27</sup> Per naman lojdi: “Ma rnin, ad ragbeetan ban guzadi. Gol biquied lon bëndol.”

<sup>28</sup> Ni goondi gaw tëë layidi chi guguaadi Abraham, Isaac, Jacob, në gra ree bën badëë xtiidx Dios loj ree bejn, za' reeman lod rniabee Dios, guiáad lëjt yariicadi.

<sup>29</sup> Din gui't ree bën sa gra lad guidiblagaa guidxliuj din cwe reeman gaw reeman lod rniabee Dios.

<sup>30</sup> Abi' zien ree bën bigra yan, laa reeman gac bën yaloj nadxel. Guiáad ree bën naj bën yaloj yan, laa reeman gac bën bigra.

### *Roon Jesús por Jerusalén*

*(Mt. 23:37-39)*

<sup>31</sup> Hor guin gajc bidxin tio'p choon ree bénfarisew, abi' rëb reeman loj Jesús:

—Baguiaj, baza niz guie, din rën rey Herodes gugüjtaman lüj.

<sup>32</sup> Badxi' Jesús laan rëbaman:

—Gol chej gol chiguiedx loj bën rusquiee zii: “Yan, në guixie yabën xindxab yayün tëën bénragxuu ree, abi' widx gulooxan.”

<sup>33</sup> Per naj rayal gusnuu da nejzan yan në guixie në widx, din ad najt guial guiët tijb bën rudëë xtiidx Dios loj ree bejn luguiedx ren bal id najn Jerusalén.

<sup>34</sup> 'ıBén Jerusalén, bën Jerusalén, rugüjtidi bën rudëë ree xtiidx Dios loj ree bejn rucaaguaaj tëëdi

gra ree b́en rxhiaal Dios lojdi! ;B́elczi volt guýenan nuchagan lasa'di zi'c ŕujn tijb guid ruchajg lasa' ree xi'nb ĺen xhiilib, per ad cwéjbtidi!

<sup>35</sup> Zianan zeel yaya'n ladxidi zi'c tijb guiedx lod achut zojb. Abi' rnin ĺejt, diizd yan ad zuguaatrídi naj xt chi guidxin dxej guiébidi: “;Ńujnle' Dios b́en zéed por laaman!”

## 14

### *Rayüjn Jesús tijb b́en rzaaguij*

<sup>1</sup> Tijb dxej raziiladx ree bejn wej Jesús bitawaman lidx tijb b́enfarisew rniabee. Yu' ree b́enfarisew guin cula'ch laaman xhie güünman,

<sup>2</sup> guial za' tijb xinragxuu lojman rzaaguijx.

<sup>3</sup> Dxel gunabdiidx Jesús loj ree mextr rajc ley ńe loj ree b́enfarisew guin, ŕebaman:

—¿Zajc yayüjn bejn b́enragxuu dxej raziiladx ree bejn ya o ad zajctan?

<sup>4</sup> Per laa reeman achetczi ŕeb reeman. Dxel gunaaz Jesús xinragxuu guin bayüjnman laax, abi' ŕebaman lojx din yaguijx.

<sup>5</sup> Dxel ŕebaman loj ree b́enfarisew guin:

—¿Bal tijb xburídi o tijb xgo'ndi yab ĺen tijb bizé, nid zabéedi laab ya, majsi naj dxej raziiladx bejn?

<sup>6</sup> Abi' achet gojc nadxi' reeman.

### *B́en rej ree loj guialruxhliaa*

<sup>7</sup> Chi baguiaa Jesús rbe ree biooz luar lod rbej ree b́en mazri zojbloj, ŕebaman loj reeman:

<sup>8</sup> —Bal chu guiniee ĺuj chel loj tijb guialruxhliaa, ad cwel luar rbej ree b́en mazri zojbloj. Din zajc guidxin zatijb biooz mazri zojbloj guial lojl,

9 abi' gui't bén gunee gropidi naman lojl: “Badëéd lod zobjil cwe bén guie.” Dxel rayal chel guidib ratul chisobil loj yagxhil bigra.

10 Zeel chi guinee reeman lüj, zagdxeli bisob loj yagxhil bigra, din chi gui't bén gunee lüj naman lojl: “Miw, badëd loj tijb luar mazri zobjloj.” Zian, gra ree bén zobjnël xan mex guza't lüj zagdx.

11 Din bén rlies xvalor gajc, yaya'nxtuman. Guiáad bén rüjn naya zajs xvaloraman.

12 Dxel rëb Jesús loj bén gunee laaman:

—Bal goc cu'l guialraw, ad guinee xmiwil, ni'qui lasa'l, ni'qui bijchil, ni'qui benrijcw zobjnël gajxh. Din laa reeman yu' dxej guinee reeman lüj, abi' zian yanee reeman ni gudaw reeman lidxil.

13 Zagdxeli naj, chi güünl tijb lanij, gunee bénprob ree, në ree bén ad nadaant yaa, në ree bencoj con ree bénlutia'p.

14 Xiquilbaal bal güünl zian, din laa reeman ad zajct yanee ni badëédil. Per chi guidxin dxej yaban ree bén bazoob xtiidx Dios, Dios yaguijx laan lojl.

### *Xcwent bén been tijb lanij*

15 Chi biguiejn tijb bén zobjnë Jesús xan mex ni rëbaman, rëbaman loj Jesús:

—¡Xiquilbaa ree bén yayal gaw lod rniabee Dios!

16 Dxel rëb Jesús lojman:

—Tijb bejn badxe' guialraw par xche, abi' gunee man zien da't ree bejn.

17 Chi ma gojl hor gaw reeman xche, guxhaal xmojsaman din chex chiguiedxix loj ree biooz guin: “Gol guda din graczi ma najcchaaw.”

18 Per graczi reeman guzuloj caynab perdon. Bén yaloj guin, rëbaman: “Yan gajczi guzin tijb

guidxliuj, rayal chiquianan; been wen güjdx lojman din güünman naj perdon.”

<sup>19</sup> Zatijbaman rëb: “Guzin gaay nejz go'n, yan chiguienan laa reeb prueb guidoondon rajc rüjn reeb dxiin ya; been wen güjdx lojman din güünman naj perdon.”

<sup>20</sup> Zatijbaman rëb: “Yan gajczi baxhlian zeel ad zile't guialan.”

<sup>21</sup> Chi badxin mojs guin bagojn xpatronx gra ni rëb ree bën guin, dád balenman, dxel rëbaman lojx: “Baquiejn wej niz galay ni, në niz ļad ree nejz, tanë gra ree bënprob në ree bën ad nadaant yaa, në ree bencoj con ree bénlutia'p.”

<sup>22</sup> Chi ma been mojs guin zian, dxel rëbix lojman: “Dad, ma benan ni nal, per sta yu' gajc luar lidxil.”

<sup>23</sup> Dxel rëbaman lojx: “Wej niz loj carreter në niz loj ree nejz la's, been naguiejn ben ren ree din gui't reeman din cha lënü lidxan.

<sup>24</sup> Din naj rni lojdi, ni'czi tijb ree bën gunen yaloj ad zajwt guialraw benchaawan par xche.”

### *Ni rayal güün ree bën rën gac xbejn Jesús*

<sup>25</sup> Dád zien ree bejn zinal Jesús; abi' badxi' lojman loj reeman rëbaman:

<sup>26</sup> —Bal chudi rën guidnal naj, rayal guiëndi naj mazri guial loj xdadidi, guial loj xniaadi, guial loj lacheelidi, në guial loj xi'ndi, o bijchidi o bizandi, rayal tëë guiëndi naj mazri guial loj xguialnabandi, din bal id züjndi zian ad zajct gaquidi da bejnan.

<sup>27</sup> Bën ad rënt sagdiaj guidnal tëëman naj, ad zajct gacaman da bejnan.

<sup>28</sup> Bal chu rën güün tijb yu narooob, ¿nid yalojxgaj cweman ya din cwëëman cwent zadaan xmilianman ya din gulooxaman laan?

<sup>29</sup> Din bal sulojman xcimiantan abi' ad zuloox-taman laan, graczi ree bën guguaiaa laan guze' laaman,

<sup>30</sup> guiëb reeman: “Guzuloj cayüjn bën guin yu abi' ad gojct nulooxaman laan.”

<sup>31</sup> 'O bal tijb rey güün wadijl contr zatijb rey, ¿nid yalojxgaj cweman ya güünman xgab züjn chii mil xsuldadaman gan loj stijb rey zidnë gajl mil suldad ya?

<sup>32</sup> Per bal naladxaman ad züjntaman gan loj rey guin, la'tgaj sta za' rey guin zijt, guixhiaalaman bën chinë ree xrusonman din yaya'n reeman didx ad zut wadijl.

<sup>33</sup> Yan, ziangajc rnin lojdi, chutëöz lëjt bal id zusa'n gra ni rajpidi din guidnalidi naj, ad zajct gaquidi da bejnan.

*Bal id zajcri zëd naxij*

*(Mt. 5:13; Mr. 9:50)*

<sup>34</sup> Dxel rëb Jesús:

—Ni zagdxe naj zëd. Per bal id zajcran naxij, ¿xhieza naag yayajcan naxij zatijb?

<sup>35</sup> Ad rüjntan sirv par luyuj ni'qui par loj abon, rzëëbzán. ¡Bën rën ree gucaagdiajg, gol bacaagdiajg!

## 15

*Xcwent xiil gunit*

*(Mt. 18:10-14)*

<sup>1</sup> Gra ree b́en ruquijx impuest ńe gra ree b́endol, bibig reeman lod za' Jeśus din gucaagdiajg reeman ni rnieeman.

<sup>2</sup> Guiáad ree b́enfarisew con ree mextr rajc ley rnieeguijdx reeman laaman, ŕeb reeman:

—Ruchajg b́en guin b́endol ree rawńe t́eeman laa reeman.

<sup>3</sup> Dxel ŕeb Jeśus loj reeman:

<sup>4</sup>—Bal tijb bejn rajp tibgayuu xiil abi' rnijt tijbib, ¿nid rusa'nman zatajpgajlchiinbitapib dajn ya abi' rigdiilaman xiil gunit guin xt lodzi radxejlaman laab?

<sup>5</sup> Abi' chi radxejlaman laab rabaaman, rudxi-ibaman laab dxidýenman.

<sup>6</sup> Dxel chi radxin lidxaman, ruto'p ree xmiwaman ńe ree b́en zojbńeman gajxh abi' ŕebaman loj reeman: “Gol babaa zi'c rabaan, din ma badxejlan da xiilan be gunit.”

<sup>7</sup> Yan, rnin ĺejt, ziangajc rabaańe Dios tijb b́en rayýjn xgab por xtol guial loj tajpgajlchiinbitap benza'c ad ryaadxt yayýjn xgab por xtol.

### *Xcwent milia ni bizéeb*

<sup>8</sup> 'O bal tijb b́engunaa rajpaman chii milia plajt abi' ruséebaman tijban, ¿nid ruze'caman guij ya ruloob t́eeman ĺenü abi' raguuilaman laan zagdxe da't xt lodzi radxejlan?

<sup>9</sup> Abi' chi radxejlaman laan, ruto'p ree xmiwaman ńe ree b́en zojbńeman gajxh, abi' ŕebaman loj reeman: “Gol babaa zi'c rabaan din ma badxejlan milia baséban.”

<sup>10</sup> Yan, naj rni lojdi, ziangajc rabaa ree xianjl Dios por tijb b́endol rayýjn xgab por xtol.

### *Xcwent b́en rýjn perdon xi'n*

11 Rëb tëë Jesús loj reeman:

—Tijb bejn yu' tio'p xi'nman.

12 Abi' xin naj mazri xinguiag, rëb loj xdadix: “Dad, banee ni rayal gaca'n.” Dxel badëëman ni rayal tijbgaj reex.

13 Ad gojct xchej ni cwa' reex ni rayal reex, xin naj xinguiag guin bato'gajquix graczi ni badëëd xdadix lojx, abi' con milia guin wejx zijt bignijt xlia'x graczi xmiliax guial beenx ni rëntzix.

14 Per chi ma banijtix gran, dxel guyu gubijn niz lod za'x abi' guzuloj biaadx ni gawix.

15 Dxel wejx bignabix dxiin loj tijb bën zojb yagaj, abi' guxhaalaman laax chigajpix cüch ree dajn.

16 Guial tant rliaanx xt guyën x niajwix ni raw ree cüch guin, per achut rudëë laan.

17 Dxel beenx xgab naladxix: “jZien ree xin rüjn dxiin lidx da Dadan xt sobr rüjn ni raw reex, guiáad naj guie ma guiëtan bëjz!

18 Yan, yazaan yaya' lidx da dadan din guiën lojman: Dad, ma benan dol loj Dios në lojl.

19 Ad rayaltri guinieel naj xi'n; been naj cwent zi'c tijb ree xmojsil.”

20 Dxel bayunejzix zia lidx xdadix.

'Per zijtri ziaadix chi baguiaa xdadix laax dxel bayaman laax, zianz ruxüünman bigchaaglojman laax, abi' gudiidxaman laax gudaw tëëman laax xid.

21 Dxel rëbix lojman: “Dad, ma benan dol loj Dios në lojl, ad rayaltri guinieel naj xi'n.”

22 Per rëb xdadix loj ree xmojsaman: “Gol baquiejn gol tanë lajd zagdxe, gol bascajcwixan, gol badxe' tijb guiibnil yaax gol baslëë tëëx gurëch,



<sup>23</sup> gol chica' go'n mazri nadaan, gol bagüjtib din yadaaw ree yaguieen ree lanij.

<sup>24</sup> Din par naj ma güjt da xi'nan abi' yan ma babanx, gunijtix abi' ma badxejlíx.” Dxel guzuloj cayüjn reeman lanij.

<sup>25</sup> 'La'tgaj xi'nman xingol guin cayüjnx dxiin dajn. Chi badxinx gajxh lidx xdadix, biguiejnx cucwejdx reeman cuya' tää reeman.

<sup>26</sup> Dxel gurejdxix tijb xmojs xdadix, gunabdi-idxix xhienin cayajc lidxix.

<sup>27</sup> Badxi' mojs guinan rëbix: “Guial baguiaad bijchil zeel gunabee xdadil güjt tijb go'n mazri nadaan guial nadaanx baguiaadix.”

<sup>28</sup> Per dád bidxe'ch xingol guin, abi' ad guyëntix nayux. Zeel wej xdadix biguiedxaman lojx din yayux.

<sup>29</sup> Dxel rëb loj xdadix: “Lüj ragbee ma gojc xchej cayünan xchiinl, zianczi ruzoban xtiidxil; per ni'czi tijb ad waneetil tijb dxibdobëz din günnë' ree da miwan lanij.

<sup>30</sup> Guiáad yan baguiaad xi'nl, xin ma bignijt xlia' xmilial con ree béngunaa dxuudx, abi' gunabeel güjt go'n mazri nadaan par laax.”

<sup>31</sup> 'Dxel badxi' xdadix laan rëbaman: “Xi'n, zianczi za'l con naj, graczi ni ra'pan naj xieenl.

<sup>32</sup> Per yan rayal yaguieen ree lanij yabaa tää ree, din bijchil xin ma güjt par naj, ma babanx, gunijtix abi' ma badxejlíx.”

## 16

### *Xcwent tijb mojs rniabee ree mojs*

<sup>1</sup> Rëb tää Jesús loj ree xbejnman:

—Guyu tijb benrijcw, nuzujman tijb mojs guinia graczi ni rajpaman. Abi' biguiedx ree ben ren lojman guial cunijt xlia' mojs guin ni naj xieenman.

<sup>2</sup> Dxel gurejdxaman laax rëbaman lojx: “¿Xhie rën guiëb ni riguejnan cayüjnl? Banee cwent lon xcwent xchiinl, din achetri dxiin gunen lojl.”

<sup>3</sup> Dxel guzuloj beenx xgab gunaladxix: “¿Xhien-aag gūnan yan ma gusa'n da patronan naj sin dxiin? Ad yu'tan gojl gūnan dxiin dajn, ratu tēn ganaaban carda.

<sup>4</sup> Ma ragbeen xhienaag gūnan din guiën ree bejn naj chi ad züntran dxiin.”

<sup>5</sup> Dxel gurejdxix tijb gaj ree bën ral loj xpatronx, rëbix loj bën bidxin yaloj: “¿Plac ralil loj da patronan?”

<sup>6</sup> Abi' rëbaman: “Ralan tibgayuu barril sejt lojman.” Dxel rëbix: “Cwa' gui'ch guie lod ca ni ralil lojman, been zatijban bacaa lojn ralil tü'pchiizan.”

<sup>7</sup> Dxel gunabdiidix loj zatijbaman rëbix: “Laadx lüj, ¿plac ralil?” Abi' rëbaman: “Tib gayuu ingujch trigo.” Zianz rëbix: “Cwa' gui'ch guie lod ca ni ralil lojman, been zatijban bacaa lojn ralil tajpgajlzan.”

<sup>8</sup> Dád badxaloj patron guin guial nasin mojs mal guin por ni beenx. Din mazri nasin ree bën ad zinalt xnejz Dios con lasa' reeman guial loj ree bën zinal xnejz Dios.

<sup>9</sup> 'Rnin lojdi, gol beennë dxiin ni rajpidi loj guidxliuj guie par gagnëdi bejn din chu' xmiwidi, din chi yaran ma yu' bën yaca' lëjt lod gapidi guialnaban tiblayaa.

<sup>10</sup> 'Bal chu rüjn zi'c rayal con ta'n ni rudëed bejn

lojman, züjnman zi'c rayal con zro'n. Ziangajc bën ad rüjnt zi'c rayal con ta'n ni rudëed bejn lojman, ad züjn gajctaman zi'c rayal con zro'n.

<sup>11</sup> Yan, ziangajc bal id züjndi zi'c rayal con ni za'c yu' loj guidxliuj guie, ¿chu gap lëjt confianz con guialnaza'c yu' xanyabaa?

<sup>12</sup> Bal id züjndi zi'c rayal con ni ad najt xieendi, ¿chu gunee lëjt ni rayalidi?

<sup>13</sup> 'Ni'qui tijb mojs ad zajct güünx sirv loj tio'p patron; dïn zadxe'chix tijbaman abi' zënx zatijbaman; o zajquix xinza'c con tijbaman abi' züjnx tibläd zatijbaman. Zeel ad zajct güündi sirv loj Dios, në loj milia.

<sup>14</sup> Abi' ree bënfarisew guial mazri rën reeman milia, chi biguiejn reeman ni rëb Jesús guzuloj cuze' reeman laaman.

<sup>15</sup> Dxel rëb Jesús loj reeman:

—Rüjndi benza'c niz loj ree bejn, per Dios nünbee luxdoodi; abi' majsi loj bejn lasajc da'tidi, per loj Dios achet lasajquidi.

### *Xley Moisejs con xguialrniabee Dios*

<sup>16</sup> 'Xley Moisejs në ni bacaa ree bën badëë xtiidx Dios loj ree bejn, naga'loj been reen dxiin xt chi bi't Waj bën baroobnijs bejn ree. Abi' diizd nadxel guzuloj rire'ch xtiidxza'c Dios xhienaag naj xguialrniabeeman, abi' zien ree bejn rüjn naguiejn chu' loj xguialrniabeeman.

<sup>17</sup> 'Adli nawëegt nit xanyabaa në guidxliuj, guial yaya'n tijb diidx zëed loj ley guin guial ad zajctan cumplid.

*Rulüü Jesús xcwent guial rala' lasa'*  
(Mt. 19:1-12; Mr. 10:1-12)

18 'Bal tijb xinguaaaw rala' lacheelix abi' rtia'x ben ren, dolan cayüjnx. Ziangajc xin rtia' tijb béngunaa bala' lacheel, dolan cayüjnx.

### *Xinrijcw con Lazr*

19 Basnuu Jesús, rëbaman:

—Guyu tijb xinrijcw, guzujchaawix con ganax-czi lajd zagdx, abi' guixie guixieczi rüjnx lanijro'.

20 Guyu tëë tijb xinprob brii lajx Lazr, rbejx ro' xport xinrijcw guin abi' guidibлагаax ca guiadx.

21 Rën nejzdoo Lazr guin gawix ni riajb xan xmex xinrijcw guin. Abi' xt ree bë'cw rbig rlie' reeb loj ree guiadx ni cax.

22 'Chi bidxin dxej güjt Lazr dxel bignë ree xianjl Dios laax lod naj nix da't, lod za' Abraham. Në xin rijcw guin güjt, abi' biguie'chix.

23 Chi ma cazagdiaj xin rijcw guin gabijl, gules lojx abi' zijtri baguiaax za' Lazr cwë' Abraham.

24 Dxel gurixdiajx rëbix: “Dad Abraham, baya naj, guxhaal Lazr din gugajdx lupunt xbacwënx din gui'tix yasiaalyujx lüdxan, din dád cazaagdiajn loj bajl guie.”

25 Per badxi' Abraham xtiidxix rëbaman: “Xi'n, basaaladx guial dád nix guyu luxdool chi gubanl loj guidxliuj, guiáad Lazr dád naya gubajnx. Yan, rayalix lod yabaax guiáad lüj rayalil lod sagdiajl.

26 Nëtëë yan Bén za' ree guie ad zajct tëd reeman yagaj, ni'qui ree Bén za' yagaj ad zajct tëd reeman guie, din za' bala'ro' du galay ree.”

27 'Dxel rëb xinrijcw guin lojman: “Rniaaban lojl dad, been wen guxhaal Lazr lidx da dadan,

<sup>28</sup> lod zojb gaay ree da bichan din chicojnx laa reex chitëë në laa reex gui't luar guie, lod yu' zro' casti.”

<sup>29</sup> Per rëb Abraham lojx: “Ma rajp reex gui'ch ni bacaa Moisejs con ree bën badëë xtiidx Dios loj ree bejn, laan rayal guidxga' reex.”

<sup>30</sup> Abi' rëb xinrijcw guin: “Walil, dad Abraham, per ad zaliladxt reex, sa'n bal yaban tijb bën ma güjt chigneenëman laa reex, zayüjn reex xgab por xtol reex.”

<sup>31</sup> Per rëb Abraham lojx: “Bal id ridxga' reex xtiidx Moisejs në xtiidx ree bën badëë xtiidx Dios loj ree bejn, ad zaliladxt reex majsi yaban tijb bën ma güjt.”

## 17

### *Bén ruzaalguiiw bejn din güünman dol*

*(Mt. 18:6-7, 21-22; Mr. 9:42)*

<sup>1</sup> Rëb Jesús loj ree xbejnman:

—Zianczi yu' ree ni ruzaalguiiw bejn din güünman dol, per ¡probza naj bën ruzaalguiiw zatijb bejn guial güünman dol!

<sup>2</sup> Par laaman zagdxeli naj guixhii reeman tijb guiaj mulin yëjnman din guzaal reeman laaman loj nijsdoo, luar guzaalguiiwaman tijb bën qui rililadxri naj din güünman dol.

<sup>3</sup> ¡Gol gojp cudad!

'Bal xhie tijb ni mal güün tijb lasa'l, guneenëman. Abi' bal bayüjnman xgab por ni beenman, beenman perdon.

<sup>4</sup> Majsi gajdx volt loj tibdxej güünman xhienin contr lüj, abi' bal gui'taman lojl gajdx volt naman:

“Been naj perdon ad züntran zian”, rayal güünl laaman perdon.

*Guialrniabee në guialrliladx*

<sup>5</sup> Dxel rëb ree xi apóstoles Jesús lojman:

—Banee dunujn mazri guialrliladx.

<sup>6</sup> Abi' rëb Jesús loj reeman:

—Bal naj xguialrliladxidi majsi zi'czi naj xhaj moxtajs, zile' guiëbidi loj yagro' guin: “Bia'xh guie, bisob loj nijsdoo”, zuzooban xtiidxidi.

*Ni rayal güün tijb mojs*

<sup>7</sup> 'Bal tijb lëjt rajp tijb mojs, abi' chi yaguaaad mojs guin bigla'x yuj o bigajpix begui'xh ree ya, ¿wen zëjbidi lojx ya: “Guyu, gurej din gawil”?

<sup>8</sup> Ad zëjbtidi zian, guiëblidi: “Bachaa xabil, been ni gawan, guda'n. Chi lox gawan guië' tēen dxel ma zajc gawil guië' tēel.”

<sup>9</sup> Abi' wed ni'qui quixtēē ad zudëētidi lojx din cayüjnizix ni rayal güünx.

<sup>10</sup> Ziangajc lëjt chi loox güüнди gra ni gunabee Dios dxel guiëbidi: “Nayajcan mojs ni ad rüjnt sirv, din baguieenzan ni rayal yaguieenan.”

*Rayüjn Jesús chii ree bën rajc guialguijdx la lepra*

<sup>11</sup> Chi ma cadxin Jesús Jerusalén, gudëdaman guiedx riga' ree niz Samaria në niz Galilea.

<sup>12</sup> Abi' chi cayuman tijb luguiedx dobëz, bigchaagloj chii ree bën rajc guialguijdx la lepra laaman. Per zijt guzuj reeman,

<sup>13</sup> rbixdiaj reeman, rëb reeman:

—¡Jesús, Mextr, baya dunujn!

<sup>14</sup> Chi baguiaa Jesús laa reeman, rëbaman loj reeman:

—Gol chej loj ree bixhioz din guguaa reeman lèjt.

Abi' la'tgaj zè reeman, baya xcuerp reeman guialguijdx ni rajc reeman.

<sup>15</sup> Dxel tijbaman chi gogbeeman ma bayajcaman, bayejcaman, rbixdiajman rudëëman quixtëë loj Dios.

<sup>16</sup> Abi' bazuxibaman loj Jesús, basajb lojman xt luyuj persi badëëman quixtëë lojman. Abi' najman bën Samaria.

<sup>17</sup> Dxel rëb Jesús:

—¿Nid chii naj ree bën bayajc ya? ¿Con zagaa reeman?

<sup>18</sup> ¿Tijbzi benzit guie bayejc ya rudëëman quixtëë loj Dios?

<sup>19</sup> Dxel rëbaman loj bën guin:

—Bisu. Baguiaj, ma bayajquil guial bililadxil naj.

*Xhienaag gui't xguialrniabee Dios*

*(Mt. 24:23-28, 36-41)*

<sup>20</sup> Gunabdiidx ree bënfarisew loj Jesús goc gui't xguialrniabee Dios, abi' rëbaman:

—Xguialrniabee Dios ad najtan ni guguaa bejn.

<sup>21</sup> Abi' achut guiëb: “Laan za' guie”, o “Laan za' ni” ya, din xguialrniabee Dios mal za'n galaydi.

<sup>22</sup> Dxel rëbaman loj ree xbejnman:

—Zadxin dxej guiëndi guguaadi Bén guxhaal Dios majsi tibdxejzi, per ad zuguaatidi laaman.

<sup>23</sup> Abi' yu' reeman na lèjt: “Laaman za' guie”, o “Laaman za' ni” ya, ad bal chinalidi laa reeman.

<sup>24</sup> Din zi'c chi rë'p nijs rulaan bacha' guidib xanyabaa, zian gac chi gui't Bén guxhaal Dios loj guidxliuj.

25 Per yalojxgaj sagdiajman abi' ad zënt ree bën riga' yan laaman.

26 Zi'c goc gulal chi guban Noé, zian gac chi gui't Bén guxhaal Dios.

27 Din nadxel gudaw ree bejn, gu' reeman, baxh-liaa reeman badëë tëë xi'n reeman baxhliaa xt chi bidxin dxej guyu Noé lën barcwro' ni beenman, abi' guzuloj guiadoxh ni bagüjt gra reeman.

28 Ziangajc gojc chi guban bën brii laj Lot, gudaw ree bejn, gu' reeman, bato' reeman, guzii reeman, guxübin reeman been tëë reeman yu ree.

29 Per chi brii Lot luguiedx Sodoma, guzuloj biyajb gui' xanyabaa në azufre, abi' güjt gra reeman.

30 Ziangajc gac dxej ni gui't Bén guxhaal Dios.

31 'Dxej ni gac zian, bën yë'p gui'c yu ad zaguiajt-taman chiglëë ni nagu'man lënü. Abi' bën za' dajn, ad zayejct lidxaman.

32 Gol basaaladx ni guzac lacheel bën brii laj Lot.

33 Bén mazri rën guialnaban rajpaman loj guidxliuj guie, zadxin dxej gunijtaman laan, per bën guiët por naj, zajpaman guialnaban tiblayaa con Dios.

34 'Naj rni lëjt, guxhinzii lod naga' tio'p bejn tijbzi loj loon, tijbaman sa zatijbaman yaya'n.

35 Guiáad lod cayo'jt tio'p ree béngunaa, tijbaman sa zatijbaman yaya'n.

36 Abi' lod za' tio'p ree xinguaaw dajn, tijbix sa zatijbix yaya'n.

37 Chi biguiejn ree xbejnman zian, rëb reeman:

—¿Ban guin, Dad?

Badxi'man laan rëbaman:



—Laa guiguien gajc ban guinan, zi'c chi rado'p ree golbich laa rguien gajc naga' tijb begüt.

## 18

### *Xcwent tijb béngunaa bizëjb në tijb juejs*

<sup>1</sup> Be Jesús tijb cwent loj ree xbejnman, persi balüüman laa reeman guial zianczi rayal cwedx guiniab reeman Dios ad zadxagtczi reeman.

<sup>2</sup> Abi' rëbaman loj reeman:

—Guyu tijb guiedx lod guyu tijb juejs, ad rdxeb-taman Dios ad ridxga' tëétaman bejn ree.

<sup>3</sup> Luguiedx ziigajc zojb tijb béngunaa bizëjb, rni-abaman loj juejs guin din güünman guialguxtis gagnëman laaman loj Bén rdxe'ch laaman.

<sup>4</sup> Xchej ad bidxga't juejs guin béngunaa bizëjb guin, per zianz laagajcaman been xgab naladxaman: “Majsi ad rdxebtan Dios ad ridxga' tëétan bejn ree,

<sup>5</sup> per béngunaa guie ad rucwëézt ruslenman naj. Zagdxeli naj günan laaman yudar chitëë ri'traman naga gad da pacensan chigra.”

<sup>6</sup> Dxel rëb Jesús loj reeman:

—Zian gunee juejs mal guin.

<sup>7</sup> Diidxgui Dios, ¿nid zagnëman Bén guleman ya Bén rbejdx rniab ree laaman dxej guiaal? ¿Wen zaglaa gagnëman laa reeman ya?

<sup>8</sup> Naj rni lëjt guial ad zaglaat gagnëman laa reeman. Per chi gui't Bén guxhaal Dios, ¿chuj ni zadxaaglojraman Bén rliladx Dios loj guidxliuj ya?

### *Xcwent Bénfarisew con Bén ruquijx impuest*

<sup>9</sup> Be Jesús zatijb cwent par ree b́en naladx ti-jbzi laa reeman naj benza'c guial loj ree ben ren, ŕebaman:

<sup>10</sup> —Tio'p ree xinguaaw wej ĺen yadooro' Jerusaĺen persi gurejdx gunab reex Dios, tijbix naj xinfarisew, zatijbix naj xin ruquijx impuest.

<sup>11</sup> Xin farisew guin, za'lix cabejdx canabix Dios, ŕebix: “Quixt́eē runen lojl, Dad, guial ad najtan zi'c ree ben ren, naj reeman b́engubaan, benmal, b́en za'ńe b́engunaa ren, ni'qui zi'c naj b́en ruquijx impuest guin.

<sup>12</sup> Rba'nán tio'p volt ĺen xuman, abi' gra ni ŕunan gan ŕunanán chii lala' persi runen tijban lojl.”

<sup>13</sup> Per xin ruquijx impuest guin, zigt za'x abi' ni'quid rayaxtix guilies lojx, rga'p luxdoox ŕebgajx: “¡Dios, baya naj najn tijb xindol!”

<sup>14</sup> Naj rni ĺejt guial xin ruquijx impuest guin ma been Dios laax perdon chi bayejc lidxix, per xin farisew guin ad beentaman laax perdon. Din b́en rlies xvalor gajc achet lasajcaman loj Dios, guiáad b́en ŕujn naya laaman mazri lasajc loj Dios.

### *Ŕujnle' Jesús xindoo ree*

*(Mt. 19:13-15; Mr. 10:13-16)*

<sup>15</sup> Bińe ree bejn xindoo ree lod za' Jesús din gudxiib yaaman guijc reex, per chi baguiaa ree xbejnman guzuloj cadiĺe reeman b́en zińe ree laa reex.

<sup>16</sup> Per gurejdx Jesús laa reeman, ŕebaman loj reeman:

—Gol bad́eē mod gui't reex lon, ad bal rudx-oondi, din lod rniabee Dios naj par ree b́en naj zi'c laa reex.

17 Din naj rni lëjt, bén ad rlliladxt xguialrniabee Dios zi'c tijb xindoo, ad zile't chu'man loj xguialrniabee Dios.

*Xcwent tijb xin rijcw*

*(Mt. 19:16-30; Mr. 10:17-31)*

18 Tijb xin rniabee, gunabdiidx loj Jesús rëbix:  
—Mextrza'c, ¿xhie rayal gūnan din ga'pan guialnaban tiblayaa con Dios?

19 Badxi' Jesús laan, rëbaman:  
—¿Chexc zeel nallon benza'c? Achut naj benza'c, tijbzi Dios.

20 Lūj rajc ree mandamient: “Ad sunël béngunaa ren, ad gugūjtil bejn, ad cwanl, ad cwëel xtiidx bejn, gojp respejt xdad xniaal.”

21 Dxel rëbix loj Jesús:

—Gra ree ni guin cayūnan diizd xindoon.

22 Chi biguiejn Jesús zian, rëbaman:

—Yu' zatijb ni ryaadx güünl: bigto' gra ni rajpil dxel gudëel milia guin loj ree bénprob. Zian gapil guialnaza'c xanyabaa, dxel gui'til guidnalil naj.

23 Chi biguiejn xin guin zian, dád guyunayax guial dád xinrijcwan.

24 Chi baguiaa Jesús guial dád yu'nayax, rëbaman:

—¡Dád nawëëg naj chu' benrijcw loj xguialrniabee Dios!

25 Adli nawëëgt téd tijb camell xan gagux, guial chu' tijb bén rijcw loj xguialrniabee Dios.

26 Abi' ree bén biguiejn ni rëb Jesús, rëb reeman:

—¿Chu za zajc laa loj xcasti Dios?

27 Dxel rëbaman loj reeman:

—Yu' ni ad zajct güün bénguidxliuj, per Dios graczan zajc güünman.

28 Dxel rëb Bëd lojman:

—Dad, ma basa'nan graczi ni raya'pan persi zudnaalan lüj.

29 Zianz rëb Jesús:

—Diidxiczi rnin lojdi, chutëez Bén rusa'n lidx, lacheel, bijch, o xdad, o xniaa, o xi'n guial rüjnman zi'c rniabee Dios,

30 mazri zien ni tia'man loj guidxliuj guie. Abi' zajpaman guialnaban tiblayaa con Dios.

*Rugojn Jesús zatijb guial guiëtaman*

*(Mt. 20:17-19; Mr. 10:32-34)*

31 Gurejdx Jesús guidxiptio'p ree xbejnman tiblad, abi' rëbaman loj reeman:

—Yan, ziyo' ree Jerusalén lod gac zi'c bacaa ree Bén badëe xtiidx Dios loj ree bejn xcwent Bén guxhaal Dios.

32 Yayü reeman laaman loj ree benzit, guze' reeman laaman, guinee reeman laaman ni rëntzi reeman, abi' gucojp xhiejn reeman lojman.

33 Quin reeman laaman dxel gugüjt reeman laaman, per ni yayon dxej yabanman.

34 Per laa reeman ad bignia'tczi reeman ni rëbaman, ad ragbee tëët reeman chexc zeel rëbaman zian din ad bile't nignia' reeman xhie rën guiëb ni guneeman.

*Rayajc guiaaloj tijb bénlutia'p*

*(Mt. 20:29-34; Mr. 10:46-52)*

35 Chi ma cadxin Jesús gajxh guiedx Jericó, tijb bénlutia'p, zojbaman cwë' nejj rniabaman carda.

36 Chi gogbeeman cadëd zien ree bejn, gunabdiidxaman xhie cayajc.

37 Abi' rëb reeman lojman guial Jesús bén Nazaret cadëd niz yagaj.

38 Dxel gurixdiajman rëbaman:

—¡Jesús, xdiaa Davi, baya naj!

39 Bén ned ree rdilë reeman laaman din gucwëöz ro'man, per mazri rbixdiajman, rëbaman:

—¡Xdiaa Davi, baya naj!

40 Dxel guzudxe Jesús abi' gunabeeman bica' reeman laaman. Chi bidxinman gajxh lojman, gunabdiidxaman lojman, rëbaman:

41 —¿Xhie rënl gūnan por lūj?

Badxi'man laan rëbaman:

—Dad, rënan yani lon.

42 Dxel rëb Jesús lojman:

—¡Ma zile' guguaal! Ma bayajquil guial bililadxil naj.

43 Hor guin gajc bani loj bén guin, abi' binalaman Jesús rudëëman quixtëë loj Dios. Në gra ree bén baguiaa ni goc rudëë quixtëë loj Dios.

## 19

### *Wej Jesús lidx Zaqueo*

1 Guyu Jesús luguiedx Jericó abi' guzuloj cadëdaman luguiedx guin.

2 Yagaj zojb tijb benrijcw laman Zaqueo. Laaman rniabee ree bén ruquijx impuest.

3 Rën Zaqueo guin gūnbeeman Jesús, per ad rile't guguaaman laaman guial dád zien ree bejn abi' laaman najman bendop.

4 Zeel ruxūnman gunedaman, abi' din chile' guguaaman Jesús, wë'paman loj tijb yagro' zojb gajxh lod téd Jesús.

<sup>5</sup> Chi gudöd Jesús yagaj, gules lojman abi' rëbaman lojman:

—Zaqueo, cari baguiajt, din yandxej naj yaya'nan lidxil.

<sup>6</sup> Dxel cari da't baguiajt Zaqueo, abi' dád rabaaman zignëman Jesús.

<sup>7</sup> Chi baguiaa ree bejn zian, gra reeman guzuloj caneeguijdx Jesús rëb reeman zigya'nman lidx tijb bëndol.

<sup>8</sup> Dxel guzuli Zaqueo, abi' rëbaman loj Jesús:

—Dad, gagui's garol ni ra'pan loj ree bënprob. Abi' bal yu' bën baquijxan mazri guial loj ni naj quixaman, yayünan tajp volt mazri guial loj ni gulaanan.

<sup>9</sup> Dxel rëb Jesús lojman:

—Yandxej ma been Dios perdon gra ree bën zojb lidx Zaqueo guial rliladxaman Dios zi'cgajc Abraham.

<sup>10</sup> Din Bén guxhaal Dios zëëdaman zidgadiilaman bën ad zët ree loj xnejz Dios din laa reeman loj xcasti Dios.

### *Xcwent milia*

<sup>11</sup> Bén cucaagdiajg ree ni canee Jesús, beman tijb cwent loj reeman guial ma zë reeman gajxh Jerusalén abi' laa reeman naladx reeman guial hor guin guidxin xguialrniabee Dios.

<sup>12</sup> Dxel rëbaman loj reeman:

—Guyu tijb bejn, zëëdaman loj tijb famil zojbloj. Zëman zijt lod tia'man guialrniabee din gacaman rey dxel yayejcaman nabee ladxaman.

<sup>13</sup> Chi gadaman grii gurejdxaman chii xmojsaman abi' loj tijbgaj reex badëëman zro' milia,

zianz rëbaman loj reex: “Gol beennë milia guin dxiin xt chi guidxin dxej yaguaian.”

14 Per ree bën ladxaman guial rdxe'ch reeman laaman, guxhaal reeman tibcwaa ree bën zinal laaman persi biguiedx reeman guial ad rënt reeman gac bën guin xrey reeman.

15 Per laaman bazuj reeman gacaman rey, abi' bayejc ladxaman. Chi badxinman dxel gunabee-man bignee reeman mojs badëëman milia guin din gagbeeman plac ma been tijbgaj reex gan.

16 Mojs bidxin yaloj rëbix: “Dad, milia ni baneel ma beenan gan chii volt mazri.”

17 Dxel rëb rey guin lojx: “Zagdxen mojsza'c, ma beenl zi'c rayal. Abi' guial beenl zi'c rayal con ta'nzi ni banen, yan guzun lüj nabeel chii guiedx.”

18 Chi bidxin mojs barojp guin, rëbix: “Dad, milia ni baneel lon ma beenan gan gaay volt mazri.”

19 Ziangajc rëb rey guin loj mojs guin: “Lüj nabee gaay guiedx.”

20 Dxel bidxin zatijb mojs guin abi' rëbix: “Dad, laa xmialal guie, badxe'chaawanan lën tijb baydoo,

21 din bidxeban lüj guial ad rayatil bejn. Raca'l ni ad najt xieenl abi' rato'pil guialnaza'c lod ad guxübintil.”

22 Dxel rëb rey guin: “Mojs guiidx por xtiidx-gajquil rayalil casti. Bal ragbeel guial ad rayatan bejn, abi' raca'n ni ad najt da xieenan ratop tëen guialnaza'c lod ad guxübintan.

23 ¿Chexc ad badëëtil da milian nigui'n bejn din chi naguaian naca'nan con guidib xi'nan?”

24 Dxel rëb rey guin loj ree bën za' yagaj:

“Gol baca' milia zii lojx, gol badëedan loj xin ca' mazran.”

<sup>25</sup> Abi' rëb reeman loj rey guin: “Dad, per ma ca'x zro'n.”

<sup>26</sup> Badxi'man laan rëbaman: “Bén rajp zro', zaca'man mazri, per bén rajp ta'nzi, xt ta'n ni rajpaman chiquied lojman.

<sup>27</sup> Abi' ree bén rdxe'ch naj bén ad guyënt ree nia-jcan rey, gol tanë reeman guie, gol bagüjt reeman lon.”

*Ru Jesús Jerusalén*

*(Mt. 21:1-11; Mr. 11:1-11; Jn.12 :12-19)*

<sup>28</sup> Chi gulox rëb Jesús zian, dxel basnuu zëman Jerusalén.

<sup>29</sup> Chi bidxinman gajxh guiedx Betfagé con Betania, në gajxh guia' la Olivos, dxel guxhaal tio'p ree xbejnman,

<sup>30</sup> rëbaman loj reeman:

—Gol chej guiedxdo riga' guin, chi guidxindi guidxaaglojdi tijb burquie'n, caduub, achut wabib laab. Gol guxhiequib gol tanëb.

<sup>31</sup> Abi' bal chu guiniabdiidx lojdi chexc zeel rxhiequidi laab, gol güjdx Dad Jesús cayaadx laab.

<sup>32</sup> Wej ree bén guxhaalaman bidxaagloj gajc reeman zi'cgajczi rëb Jesús loj reeman.

<sup>33</sup> Abi' chi caxhiec reeman bur guin, gunabdiidx ree bén naj xbur laab, rëb reeman:

—¿Chexc zeel caxhiequidi bur guin?

<sup>34</sup> Badxi' reeman laan, rëb reeman:

—Din Dad Jesús cayaadx laab.

<sup>35</sup> Dxel binë reeman bur guin lod za' Jesús, zianz badxiib xab reeman xijchib abi' been reeman laaman yudar persi gudxibaman laab.



<sup>36</sup> Abi' ree bejn rguijxh xab reeman lunejz lod zë Jesús.

<sup>37</sup> Chi ma zë reeman gajxh laguiajt ni naj guia' la Olivos, gra ree bén zinal Jesús guzuloj rbixdiaj reeman guial dád rabaa reeman abi' ruza't reeman Dios zagdxé por gra ree milagr ni ma baguiaa reeman.

<sup>38</sup> Rëb reeman:

—¡Nüjnle' Dios bén zëéd por laaman! ¡Yu' guialrabaa xanyabaa! ¡Benza'c bendxoon naj Dios bén yu' xanyabaa!

<sup>39</sup> Dxel ree bénfarisew no'ch loj ree bén zinal laaman, rëb reeman lojman:

—Mextr, gudilë ree bén guin chitëë rniee reeman zian.

<sup>40</sup> Per badxi'man laan rëbaman:

—Naj rni lëjt, bal yacwëéz ro' reeman, guiaj ree cwixdiaj zian.

<sup>41</sup> Chi bidxinman gajxh Jerusalén, dxel baguiaaman guiedx guin, zianz biinman por laan.

<sup>42</sup> Rëbaman:

—¡Bén Jerusalén, xi nix majsi yandxejzi yayagbeedi chu yabe'cdxe luxdoodi! Per yan naguie'ch najn par lëjt, ad zile't chignia'di laan.

<sup>43</sup> Din guidxin dxej ni güün ree bén rdxe'ch lëjt tijb ze' gadëd ladxidi, abi' gra lad gusiaaw reeman lëjt,

<sup>44</sup> gugüjt reeman lëjt. Dxel gunijt reeman ladxidi, ni'qui tijb guiaj ad zaya'nt guiic stijb guiaj, din ad bidxga'tidi hor ni bidganaj Dios lëjt.

*Rabëë Jesús bén ruto' ree ro' yadooro' Jerusalén  
(Mt. 21:12-17; Mr. 11:15-19; Jn.2 :13-22)*

<sup>45</sup> Chi bidxin Jesús ro' yadooro' Jerusalén, guzuloj caybëëman bén cuto' ree në ree bén cazii,

<sup>46</sup> rëbaman loj reeman:

—Loj xtiidx Dios rëb: “Lidxan naj yu lod rbejdx rniab bejn Dios.” Per lëjt nÿjndan zi'c lidx ree xingubaan.

<sup>47</sup> Guixie guixie rulüü Jesús bejn ree lën yadooro' Jerusalén, per ree bixhioz rniabee ree bixhioz con ree mextr rajc ley, në ree guxtis luguiedx guin raguiil reeman mod din gugÿjt reeman laaman.

<sup>48</sup> Per ad radxejlt xhienaag güün reeman, din graczi ree bejn rucaagdiajg chaaw ni rulüüman laa reeman.

## 20

### *Xgualrniabee Jesús*

*(Mt. 21:23-27; Mr. 11:27-33)*

<sup>1</sup> Lën ree dxej ni za' Jesús lën yadooro' Jerusalén, culüüman bejn ree xtiidx Dios, bidxin ree bixhioz rniabee ree bixhioz, con ree mextr rajc ley, në ree guxtis Israel,

<sup>2</sup> abi' rëb reeman lojman:

—Guna, ¿chu na güünl ni guin ree? ¿Chu banee guialrniabee lojl?

<sup>3</sup> Badxi' Jesús laan, rëbaman:

—Ziangajc naj yu' tijb ni ganabdiidxan lojdi. Gol badxi'n:

<sup>4</sup> ¿chu guxhaal Waj bidgaroobnijsaman bejn ree, Dios ya o bénguidxliuj?

<sup>5</sup> Dxel guzuloj rëb loj lasa' reeman:

—Bal yaguie'ch ree Dios guxhaal laaman, zana-man. “¿Chexquiza zeel ad bililadxtidi laaman?”

<sup>6</sup> Abi'za bal yaguie'ch ree bénguidxliuj guxhaal laaman, zugüjt ree bejn dunuj ree con guiaj din gra reeman riladx guial Waj gojc bén badëë xtiidx Dios loj ree bejn.

<sup>7</sup> Abi' badxi' reeman laan rëb reeman guial ad ragbeet reeman chu guxhaal Waj bidgaroobnijsaman bejn ree.

<sup>8</sup> Dxel rëb Jesús loj reeman:

—Ni'qui naj ad zanitan lojdi chu banee guialrniabee günan ni guin ree.

*Xcwent ree mojs guiidx*

*(Mt. 21:33-44; Mr. 12:1-11)*

<sup>9</sup> Dxel guzuloj cayü Jesús tijb cwent loj ree bejn, rëbaman:

—Guyu tijb bejn guxübinman uv ree loj xguini-aaman, dxel badëëman laan garol loj ree bén güün dxiin lojn, zëtaman zijt.

<sup>10</sup> Chi bidxin dxej yala' reeman uv guin, guxhaalaman tijb xmojsaman chigxiix ni rayalaman, per ree bén rüjn dxiin loj guiniaa guin gudijn reeman mojs guin abi' badxi' reeman laax zezi.

<sup>11</sup> Dxel guxhaalaman mojs ren, per nëgajc mojs guin gunee reeman ni rëntzi reeman, gudijn reeman laax abi' badxi' reeman laax zezi.

<sup>12</sup> Zianz guxhaalaman zatijbix, per gudiilguiidx reeman laax abi' babëë reeman laax loj guiniaa guin.

<sup>13</sup> 'Dxel rëb bén naj xguidxliuj laan: “¿Xhienaag günan yan? Gaxhal da xi'nän xin rën da'tan, wed zajp reeman laax respejt.”

<sup>14</sup> Per chi baguiaa ree bén guin laax, rëb loj lasa' reeman: “Xin guinan naj xin yaya'nnë guidxliuj guin. Yagüjt reex din gacan du xieen ree.”

15 Dxel babëë reeman laax loj guidxliuj guin, bagüjt reeman laax.

Zianz gunabdiidx Jesús loj ree bén caneenëman, rëbaman:

—Yan, ¿xhie naladxidi güünnë bén naj xguidxliuj laan bén guin ree?

16 Naj rni lojdi guial zi'taman din gugüjtaman bén guin ree dxel gudëëman guidxliuj guin loj ree ben ren.

Chi bigueijn reeman zian dxel rëb reeman:

—¡Gagnë Dios ad zajct zian!

17 Per Jesús baguiaaman loj reeman, abi' rëbaman:

—Bal id zajc zian ¿xhieza rën guiëb ni ca loj xtiidx Dios? Lod rëb:

Guiaj ni gulëëgo'n ree bén rüjn yu, laan naj ni mazri been sirv gojcnë yu guin.

18 Chutëëz bén yab guiyc guiay guin, gacaman zi'c tijb ni riroox, guiáad bal yab guiay guin guiycaman, gacaman zi'c tijb ni ryüüdëj.

### *Xcwent impuest*

*(Mt. 21:45-46; 22:15-22; Mr. 12:12-17)*

19 Bixhioz rniabee ree bixhioz con ree mextr rajc ley, hor guin gajc guyën reeman niniaaz reeman Jesús guial gogbee reeman cuza'taman laa reeman, per bidxeb reeman bejn ree.

20 Abi' guxhaal reeman bén zigla'ch ree laaman din güünzi reeman guial guluü naj reeman benza'c, din yaguuil reeman mod guinee Jesús diidx ni gudxiib reeman guiyc, din chile' yayü reeman laaman loj gobernador Rom.

21 Dxel gunabdiidx reeman lojman, rëb reeman:

—Mextr, dunujn rayagbee guial rnieel rulüü tēēl zi'c rayal, din par lūj tiblojzi naj bejn, abi' walil rulüül guial xhienaag rēn Dios guiban bejn.

<sup>22</sup> ¿Zagdxen ya radijxan impuest loj rey César, o ad zagdxetan?

<sup>23</sup> Per gogbee gajc Jesús xgab mal ni cayüjn reeman abi' rēbaman loj reeman:

<sup>24</sup> —Gol balüü tijb cintabl lon. ¿Chu loj ca lojn chu tēē laj ca lojn?

Badxi' reeman laan, rēb reeman:

—Loj rey César ca lojn nē lajman.

<sup>25</sup> Dxel rēbaman loj reeman:

—Gol badēēcliza loj rey César ni naj xieen César, guíaad loj Dios gol badēē ni naj xieen Dios.

<sup>26</sup> Abi' gra ni guneeman niz loj ree bejn, achetri badxejl nudxiib reeman guijc din niniaaz reeman laaman. Badxali loj reeman ni guneeman abi' achetri rēb reeman.

*Xcwent guial yaban ree bengüt*

*(Mt. 22:23-33; Mr. 12:18-27)*

<sup>27</sup> Tio'p choon ree bénsaducew bignaj Jesús, bénsadusew guin ree ad rliladxt reeman guial yaban ree bengüt, zeel rēb reeman loj Jesús:

<sup>28</sup> —Mextr, loj xley Moisejs rēb guial bal guiēt tijb xinguaaw abi' achut xi'nx guyu con lacheelix, bijch xingüt guin guxhliaanē béngunaa bizējb guin din chu' xi'n reex zi'c gulüü xi'n xin güt guinan.

<sup>29</sup> Guyu tijb famil lod goc reex gajdx bijch. Baxh-liaa xin yaloj guin, per güjtix abi' ad guyut xi'n reex con lacheelix.

<sup>30</sup> Dxel bijch barojpax baxhliaanē béngunaa guin, per güjtigajquix ad guyu gajct xi'n reex.

<sup>31</sup> Zianz baxhliaanë xin bayon guin béngunaa bizëjb guin, zianz baxhliaanëman guigajdx reex abi' gra reex güjt achut xi'n reex guyu con laaman.

<sup>32</sup> Ni bigratë në béngunaa guin güjt.

<sup>33</sup> Yan, chi yaban ree bengüt, ¿chu loj guigajdx reex gac xbéngunaa laaman guial gra reex baxhliaanë laaman?

<sup>34</sup> Dxel rëb Jesús loj reeman:

—Loj guidxliuj guie ruxhliaa ree bejn abi' rudëed xi'n reeman ruxhliaa.

<sup>35</sup> Per ree bén yaban zatijb, bén rayal ree gap guialnaban tiblayaa con Dios, ad zuxhliaatri reeman ad zudëe tēetri xi'n reeman guxhliaa,

<sup>36</sup> din ad zējtttri reeman, gac reeman zi'c ree xianjl Dios. Gac tēe reeman xi'n Dios guial ma baban reeman.

<sup>37</sup> Abi' xcwent ni yaban ree bengüt, xt Moisejs rëb zian tiblajt loj xtiidx Dios lod rëbaman guial baguiaaman yag ni caye'c. Yagaj rëb Dios lojman guial Dios naj xDios Abraham, xDios Isaac, në xDios Jacob.

<sup>38</sup> Din Dios ad najtaman xDios ree bengüt, najman xDios ree bén naban, din par laaman gra ree bejn naban.

<sup>39</sup> Dxel yu' ree mextr rajc ley, rëb lojman:

—Mextr, zagdxequi guneel.

<sup>40</sup> Abi' achetri bayax reeman niniabdiidx reeman lojman.

*Chu loj xdiaa zëed Cristo*

*(Mt. 22:41-46; Mr. 12:35-37)*

<sup>41</sup> Rëb Jesús loj ree bejn:

—¿Chexc zeel rëb ree bejn guial zëed Cristo loj xdiaa rey Davi?

<sup>42</sup> Awa Davi guin gajc gunee loj libr Salmos, rëbaman:

Dios rëb loj dux Dad ree:

“Gurej da ladbeen,

<sup>43</sup> xt gabecan xin rdxe'ch ree lüj guia'l.”

<sup>44</sup> Yan, bal xi'n Davi naj Cristo. ¿Chexquiza zeel rëb Davi guin lojman Dad?

*Ni rüjn ree mextr rajc ley*

*(Mt. 23:1-36; Mr. 12:38-40; Lc. 11:37-54)*

<sup>45</sup> La'tgaj cucaagdiajg gra ree bejn ni rëb Jesús, rëb loj ree xbejnman:

<sup>46</sup> —Gol gojp cudad con ree mextr rajc ley. Din ruladx reeman sa reeman gacw reeman lajd zagdx ruladx tëe reeman gugajpdioz ree bejn laa reeman con respejt niz lunejz, abi' lën ree yadoo ruladx reeman cwe reeman lod rbej ree bën zobjloj, ziangajc rüjn reeman lod ritaw reeman.

<sup>47</sup> Raca' tëe reeman lidx ree béngunaa bizëjb, abi' din guiëb ree bejn guial benza'c naj reeman, dád xchej rbejdx rniab reeman Dios. Per laa reeman mazri casti narooob yayal reeman.

## 21

*Gon badëed tijb béngunaa bizëjb*

*(Mr. 12:41-44)*

<sup>1</sup> Chi culüü Jesús bejn ree lën yadooro' Jerusalén, dxel gules lojman baguiaaman cagu' ree benrijcw gon lën alcancia.

<sup>2</sup> Baguiaa tëeman tijb béngunaa bizëjb prob, cagu'man tio'p cintabldoo lën alcancia guin.

<sup>3</sup> Dxel rëb Jesús loj ree xbejnman:

—Diidxli rnin lojdi guial b́en bizējb prob guin mazri lasajc gon badxe'man guial loj gon badxe' gra ree b́en guin.

<sup>4</sup> Din graczi reeman rudxe' ni rŭjn laa reeman sobr, per laaman majsi najman b́enprob, badxe'man graczi ni rajpaman par guibannēman.

*Rēb Jesús guial yaze'n yadooro' Jerusalén*

*(Mt. 24:1-2; Mr. 13:1-2)*

<sup>5</sup> Tio'p choon ree xbejn Jesús cayü reeman diidx xcwent ree guiaj zagdxe najcchaawnē yadooro' Jerusalén, nē ree ni lasajc ni rudēed ree bejn par suchaaw yadoo guin. Dxel rēb Jesús loj reeman:

<sup>6</sup> —Gra ni cuguaadi yan, zadxin dxej ni'qui tijb guiaj ad zaya'nt guijc stijban, gran yaze'n.

*Ni gac chi gad guidxliuj nit*

*(Mt. 24:3-28; Mr. 13:3-23)*

<sup>7</sup> Dxel gunabdiidx reeman lojman rēb reeman:

—Mextr, ¿goc gac zian? ¿Xhie ree sen gac chi ma zidyob gac zian?

<sup>8</sup> Zianz rēb Jesús loj reeman:

—Gol gojp cudad achu gusquiee lējt. Din zien ree b́en gui't guiēb reeman guial por naj zēed reeman guiēb tēē reeman: “Naj naj Cristo”; o “Ma zidyob dxej gui'taman.” Per ad chililadxidi laa reeman.

<sup>9</sup> Abi' chi guiguiejndi cayajc wadijl o chas ree bejn contr xguxtis reeman, ad guidxebidi din yaloj gac zian. Per ad por laatan ma bidxin dxej nit guidxliuj.

<sup>10</sup> Rēb tēē Jesús loj reeman:

—Til nacion con stijb nacion, til tēē b́en rajp guialrniabee con stijb b́en rajp guialrniabee,



11 gui't tää xudoxh, në gubijn, në guialguijdx-doxh niz ni niz guie abi' xanyabaa guiguien ree ni nadxeb.

12 Per chi gad gra ree ni guin gac, guiniaaz ree bejn lëjt din gusagzi reeman lëjt, chinë reeman lëjt lën ree yadoo din gudëed reeman lëjt casti, cu' reeman lëjt ladxguiib chinë tää reeman lëjt loj ree rey në loj ree gobernador guial najdi da bejnan.

13 Zian gac din chile' güdi da diidxan loj reeman.

14 Ad aal chu'di xgab xhie guiëbidi loj reeman.

15 Din naj gune diidx ni guinieedi gune tään quiarguejn. Abi' ni'qui tijb bën rdxe'ch lëjt ad züjnt gan loj xtiidxidi ad zanee tää reeman contr lëjt.

16 Per lëjt xt xdadidi o xniaadi, o bijchidi o xfamilidi o xmiwidi yayü reeman lëjt, abi' yu'di gugüjt reeman.

17 Gra bénguidxliuj guidxe'ch lëjt guial najdi da bejnan.

18 Per ni'qui tijb guidxguijquidi ad zanijt por zian.

19 Abi' bal sudxi'chidi loj xnejz Dios, zajpidi guialnaban tiblayaa con Dios.

20 'Chi guguaadi nayaw ree suldad Jerusalén, ma qui nit guiedx guin.

21 Dxejzii ree, bën za' ree niz Judea, gol bigxüün niz dajn ree, abi' ree bën za' guiedx Jerusalén gol brii luguiedx guin, guiáad ree bën za' dajn ad bal yayudi luguiedx guin.

22 Din dxej guin ree gudëed Dios bejn ree casti din gac cumplid zi'c ca loj xtiidxaman.

23 ¡Probza ree béngunaa nüü xi'n o béngunaa ca' ree xindoböz lën ree dxejzii! Din dád sagdiaj ree

bejn abi' dád casti narooB yayal ree bÉnluGuiedx guin.

<sup>24</sup> Yu' ree bÉn guiÉt loj wadijl yu' tÉe reeman guiniaaz reeman chinÉ nagueijn reeman laa reeman nacion rent nacion ren ree. Abi' ree benzit zanabee reeman Jerusalén xt yayaaloj dxej ni tiÉb Dios nabee reeman yagaj.

*Gui't Bén guxhaal Dios zatijb*

*(Mt. 24:29-35, 42-44; Mr. 13:24-37)*

<sup>25</sup> 'Dxel gac sen loj gubijdx, con loj bÉew, con loj ree bajl xanyabaa. Abi' loj guidxliuj gagdxa ree bejn guidxeb tÉe reeman guial gac naquie' loj nijsdoo gac tÉe naquie' por xtüjp nijs.

<sup>26</sup> Abi' ree bejn xt yadaj reeman guial guidxeb reeman chi güün reeman xgab ni gac loj guidxliuj, guiáad ree ni rguien xanyabaa guiniib reen.

<sup>27</sup> Abi' guguaa reeman Bén guxhaal Dios, rdiinman bacha' zÉédaman loj zaj con xguialrniabee-man.

<sup>28</sup> Chi suloj gac ree ni guin, gol bagu' luxdoodi zagdxe gol gules tÉe lojdi din ma zidyob dxej ni laadi loj casti.

<sup>29</sup> RÉb tÉe Jesús loj reeman:

—Gol baguiaa yag higo o xhietÉez zatijb yagan.

<sup>30</sup> Chi ma caydxib ree xbalagan, léjt ragbee guial ma zÉéd tiamp nalaa.

<sup>31</sup> Ziangajc chi guguaadi ma cayajc ree ni guin, zagbeedi guial ma zÉéd xguialrniabee Dios gajxh.

<sup>32</sup> 'Diidxli rnin lojdi guial gra ree ni guin gac chi gad gra ree bÉn naban yan guiÉt.

<sup>33</sup> Guidxliuj nÉ xanyabaa zanijt reen, per da diidxan ad zadÉdt gacan cumplid.

<sup>34</sup> 'Gol gojp cudad ad güün graloj ni riga' loj guidxliuj guie lëjt gan, zi'c guial rzüdx, në guial ru xgab por ni ryaadxidi par guibandi din chi guialan zatijb, ad gac dxej guin par lëjt

<sup>35</sup> zi'c tijb tramp. Din zian gac dxej guin par gra ree bénguidxliuj.

<sup>36</sup> Gol guzujsin, guixie guixie gol gurejdx gunab Dios din gac laadi loj gra ree ni gac loj guidxliuj din chile' tëë sudi loj Bén guxhaal Dios.

<sup>37</sup> Radxe rulüü Jesús bejn ree lën yadooro' Jerusalén guiáad guxhin raya'nman ruguia' la Olivos.

<sup>38</sup> Abi' rsildoo rej gra ree bejn lën yadoo guin ricaagdiajg reeman ni rnieeman.

## 22

*Baya'n reeman diidx xhienaag guiniaaz reeman Jesús*

*(Mt. 26:1-5, 14-16; Mr. 14:1-2, 10-11; Jn. 11:45-53)*

<sup>1</sup> Chi ma zidyob lanij pascw, chi raw reeman guiadxtil ni ad yu't levadur.

<sup>2</sup> Bixhioz rniabee ree bixhioz con ree mextr rajc ley, raguiil reeman mod xhienaag gugüjt reeman Jesús guial rdxeb reeman bejn ree.

<sup>3</sup> Dxel guyu xindxab luxdoo tijb ree xi apóstoles Jesús, bén la Judas Iscariote.

<sup>4</sup> Judas guin bigneenë bixhioz rniabee ree bixhioz con ree bén rniabee bén rajp ree yadooro' Jerusalén, abi' benëman laa reeman diidx xhienaag yayüman Jesús loj reeman.

<sup>5</sup> Dád babaa reeman abi' rëb reeman guial gudëed reeman milia lojman.

<sup>6</sup> Zianz cwëjbaman, dxel guzuloj raguuilaman mod xhienaag yayüman Jesús, guial ad zagbeet ree bejn.

*Gudawnë ree xbejn Jesús xche*

*(Mt. 26:17-29; Mr. 14:12-25; Jn.13 :21-30; 1Co.11 :23-26)*

<sup>7</sup> Chi bidxin lanij pascw, tijbgaj yu raw ree bejn guiadxtil ni ad yu't levadur rugüjt tée reeman tijb xiil,

<sup>8</sup> dxel guxhaal Jesús Bëd con Waj, rëbaman loj reeman:

—Gol biguieen ni yadaaw ree guxhin pascw.

<sup>9</sup> Abi' gunabdiidx reeman lojman rëb reeman:

—¿Ban guin rën l yuguieenan laan?

<sup>10</sup> Zianz rëb Jesús loj reeman:

—Chi chu'di luguiedx guin, guguaadi tijb xinguaaaw ca'x tijb re yu' nijs. Gol chinalix xt lod yayux,

<sup>11</sup> gol güjdx loj bën naj lidxan: “Na mextr: ¿Con lënü gawnë ree xbejnman guxhin pascw?”

<sup>12</sup> Dxel gulüüman lëjt tijb lënü ni rarojp pijs, ma najcchaaw lënü guin. Yagaj gol been ni yadaaw ree xche.

<sup>13</sup> Zianz wej reeman abi' bidxaagloj reeman gra zi'cgajczi rëb Jesús loj reeman. Dxel been reeman guialraw guin ni gaw reeman guxhin pascw.

<sup>14</sup> Chi bidxin hor, Jesús con ree bën naj apóstoles gurej reeman xan mex.

<sup>15</sup> Dxel rëbaman loj reeman:

—¿Diizd gocli rënan gawnë'n lëjt pascw guie, chi gad dxej guidxin gazaagdiajn abi' guiëtan!

<sup>16</sup> Din naj rni lëjt guial ad yu'tri dxej gawnë'n lëjt, xt chi ma canabee Dios guidiblagaa.

17 Dxel cwa'man tijb cojp yu' vin, chi gulox badëëman quixtëë loj Dios, rëbaman loj reeman:

—Gol cwa' vin guie, gol gudi'san loj gradi.

18 Din diidxli rnin lëjt, ad yu'tri dxej guië'n vin xt chi ma canabee Dios guidiblagaa.

19 Dxel cwa'man guiadxtil badëëman quixtëë loj Dios, zianz gula'man laan, gudi'saman laan loj reeman, rëbgajman:

—Guiadxtil guie naj da cuerpan ni ma bayün din guiëtan por lëjt. Chi güüнди zian, gol been zian guial rusaaladxidi naj.

20 Abi' ziangajc beenman con cojp ni yu' vin guin, chi gulox gudawaman xche, rëbaman:

—Vin guie naj da rejan ni gaxhie'n chi guiëtan din guixal tijb nejz cüb xhienaag gap ree bejn perdon loj Dios.

21 'Per yan bën yayü naj, laa yaaman xoob loj mex lod xoob gajc yan.

22 Per Bén guxhaal Dios, naj sagdiajman abi' guiëtaman. Per jprobza bën yayü laaman!

23 Dxel guzuloj rniabdiidx loj lasa' reeman chu reeman yayü laaman.

### *Chu mazri zobjloj*

24 Dxel guzuloj reeman cadildiidx reeman chu loj gra reeman naj mazri bën zobjloj.

25 Per rëb Jesús loj reeman:

—Bën naj ree rey loj guidxliuj guie rniabee reeman bën ladx reeman zi'ctzi rën reeman, abi' ree bën rniabee, rëb reeman guial rüjn reeman ni zagdxe.

26 Per lëjt ad rayalt güüнди zian, bën mazri zobjloj lojdi rayal güün laagajcaman zi'c tijb bën

ad zobjlojt. Guiáad bén rniabee lojdi rayal güün laagajcaman zi'c tijb mojs.

<sup>27</sup> ¿Chu naj mazri bén zobjloj loj guidxliuj guie? ¿Bén rbej xan mex par gaw ya o bén rbe'c guialraw? ¿Nid bén rbej xan mex guin naj mazri bén zobjloj ya? Guiáad naj za'n lojdi zi'c tijb bén rbe'c guialraw.

<sup>28</sup> 'Lëjtci za'në naj loj ree dxej cazaagdiajn.

<sup>29</sup> Zeel gunen guialrniabee lojdi zi'c banee da Dadanan lon,

<sup>30</sup> abi' gawidi loj da mexan lod ganabeen cwe tēedi loj ree yagxhil lod güündi guialguxtis loj gra ree bén za loj guidxiptio'p xdiaa Israel.

*Rëb Jesús guial guiëb Bëd ad nünbeetaman laaman (Mt. 26:31-35; Mr. 14:27-31; Jn. 13 :36-38)*

<sup>31</sup> Rëb tēë Jesús:

—Simón, Simón, ma gunab xindxab lëjt din güünx lëjt prueb zi'c rbijb bejn trigo.

<sup>32</sup> Per naj ma guredx gunaaban Dios por lüj chitëë cwëz chililadxil naj. Guiáad lüj chi yazudxi'chil loj ni rliladxil naj zatijb, gognë ree lasa'l din sudxi'ch reeman loj ni rliladx reeman naj.

<sup>33</sup> Dxel rëb Bëd lojman:

—Dad, ad zaro'nladxtan lüj majsi gayu'në'n lüj ladxguib o xt guiëtnë'n lüj.

<sup>34</sup> Abi' rëb Jesús:

—Naj rni lüj Bëd, yan guxhin gajc chi gad guid cwidxa', choon volt mal rëbil ad nünbeetil naj.

*Zidyob dxej sagdiaj Jesús*

<sup>35</sup> Dxel gunabdiidx Jesús loj ree xbejnman rëbaman:

—Chi guxhalan lëjt sin bols, sin milia, në sin gurëch, çyu' ni biaadxidi ya?

Badxi' reeman laan rëb reeman:

—Achet.

<sup>36</sup> Dxel rëbaman loj reeman:

—Sa'n yan bën rajp milia në bols, gol cwa'n. Guiáad bën ad rajpt espad, gol bato' xabidi din siidi tijban.

<sup>37</sup> Din naj rni guial rüjn naguiejn gac zi'c rëb loj xtiidx Dios por naj, lod rëb: “Abi' nayabaman loj ree benmal.” Gra ni ca loj xtiidx Dios por naj, naj gacan cumplid.

<sup>38</sup> Dxel rëb reeman lojman:

—Dad, guie naca'n tio'p espad.

Badxi'man laan rëbaman:

—Zajquican.

*Rbejdx rniab Jesús Dios lod la Getsemani*

*(Mt. 26:36-46; Mr. 14:32-42)*

<sup>39</sup> Dxel brii Jesús zi'c naj xcostumbraman zëman ruguia' Olivos, abi' binal ree xbejnman laaman.

<sup>40</sup> Chi bidxin reeman yagaj, rëbaman loj reeman:

—Gol gurejdx gunab Dios, chitëë güün xindxab lëjt gan.

<sup>41</sup> Abi' wejman zijt zi'ct lod rucaa bejn tijb guiaj, zianz bazuxibaman gurejdx gunabaman Dios,

<sup>42</sup> rëbaman:

—Dad, bal tiëbil, babëë naj loj ni gazaagdiajn per ad gac zi'c rënan, rayal gac zi'c rën.

<sup>43</sup> Dxel balüüloj tijb anjl guza xanyabaa lojman persi badëëman laaman gojl.

<sup>44</sup> Abi' chi cazagdiaj da'taman, mazri con gan cabejdx canabaman Dios ryajb tëë ree xnijs rag-neeyaman luyuj zi'c rejn.

<sup>45</sup> Chi bisuman lod cabejdx canabaman Dios, bignaj ree xbejnman abi' chi badxinman cwë' reeman laa reeman naga'yëjs, guial yu'naya reeman.

<sup>46</sup> Zianz rëbaman loj reeman:

—¿Chexc zeel naga'yëjsidi? Gol bixche, gol gurejdx gunab Dios chitëë güün xindxab lëjt gan.

*Gunaaz reeman Jesús*

*(Mt. 26:47-56; Mr. 14:43-50; Jn.18 :2-11)*

<sup>47</sup> Sta caneenë Jesús bën naj ree xbejnman chi bidxin ree benzien. Në bën brii laj Judas, bën goc tijb ree xbejn Jesús, nedaman loj ree bën guin abi' bibigaman loj Jesús gudawaman laaman xid.

<sup>48</sup> Dxel rëb Jesús lojman:

—Judas, ¿wen con tijb xid rayül Bén guxhaal Dios ya?

<sup>49</sup> Chi baguiaa ree bën za'në Jesús ni cayajc, rëb reeman lojman:

—Dad, ¿zalëë dux espadan ya?

<sup>50</sup> Abi' tijb xbejnman gudiilguijdxaman xmojs bixhioz rniabee gra ree bixhioz, gutü'man guidiajg ladbeeman.

<sup>51</sup> Per rëb Jesús loj reeman:

—Guzujr ree bënan. Ma gojczy.

Dxel baqui' Jesús guidiajg mojs guin abi' bayüjnman laan.

<sup>52</sup> Zianz rëb Jesús loj ree bixhioz rniabee ree bixhioz, con ree bën rniabee ree bën rajp yadooro' Jerusalén con xguxtis ree bën Israel, bën bidxin ree par chinë laaman:

—¿Chexc zeel zëëdidi con espad con yag din chinëdi naj zi'c tijb xingubaan?



<sup>53</sup> Guixie guixie guzunë'n lëjt lën yadooro' Jerusalén abi' ad gunaaztidi naj. Per yan ma bidxin xihoridi, hor ni nabee xindxab.

*Rëb Bëd ad nünbeetaman Jesús*

*(Mt. 26:57-58, 69-75; Mr. 14:53-54, 66-72; Jn.18 :12-18, 25-27)*

<sup>54</sup> Dxel gunaaz reeman Jesús zinë reeman laaman lidx bixhioz rniabee gra ree bixhioz, binal Bëd laaman zijt zijt.

<sup>55</sup> Yagaj gule'c ree bën guin guij galay lule', abi' gurej reeman rudëj guin. Në Bëd gurejnë laa reeman.

<sup>56</sup> Per tijb béngunaa rüjn dxiin yagaj, chi baguiaaman Bëd zojbaman rudëj guin, baguiaaman lojman, abi' rëbaman:

—Në bën guin za'në Jesús.

<sup>57</sup> Per gurexuu Bëd, abi' rëbaman loj bën guin:

—Ad nünbeetan laax.

<sup>58</sup> Ad gojct xchej chi baguiaa zatijb bejn laaman, rëbaman lojman:

—Në lüj naj xbejn Jesús.

Badxi' Bëdan rëbaman:

—Yajqui dad, ad xbejtix naj.

<sup>59</sup> Gudëd cost tib hor, dxel rëb zatijb bejn:

—Nëczi bën guie za'në laaman din nëman naj bën Galilea.

<sup>60</sup> Zianz rëb Bëd:

—Ad ragbeetan xhienin rnieel.

Hor ni canee gajc Bëd zian guridxa' tijb guid.

<sup>61</sup> Dxel badxi' loj Jesús baguiaaman loj Bëd, abi' basaaladx Bëd guial rëb Jesús lojman: “Yan guxhin gajc chi gad guid cwidxa', choon volt mal rëbil ad nünbeetil naj.”

62 Dxel barii Bëd yagaj, abi' dád naya biinman.

*Baze' reeman Jesús gudijn tëë reeman laaman  
(Mt. 26:67-68; Mr. 14:65)*

63 Bén cayajp ree Jesús, baze' reeman laaman gudijn tëë reeman laaman.

64 Guxhii reeman lojman abi' gudijn reeman laaman, dxel rëb reeman lojman:

—¡Guneeya' chu gudin lüj!

65 Abi' zien ree diidxguijdx rëb reeman lojman.

*Za' Jesús loj ree guxtis Israel  
(Mt. 26:59-66; Mr. 14:55-64; Jn.18 :19-24)*

66 Chi bareguiaal, badxajg lasa' ree guxtis Israel, në ree bixhioz rniabee ree bixhioz con ree mextr rajc ley, abi' binë reeman Jesús lod radxaag lasa' gra ree xguxtis reeman, dxel rëb reeman lojman:

67 —Guna du lojn, ¿lütj naj Cristo ya?

Badxi'man laan rëbaman:

—Bal ganinan ad zaliladxtidi.

68 Abi' bal xhie ganabdiidxan lojdi, ad zadxi'tidan.

69 Per diizd yan, Bén guxhaal Dios cweman xlad-bee Dios, bén ca' gra guialrniabee.

70 Dxel rëb gra reeman lojman:

—¿Lütj naj Xi'n Dios ya?

Badxi'man laan, rëbaman:

—Waliquidi najcan.

71 Zianz rëb reeman:

—¿Xhie mazri rütj naguiejn yadiil ree testiw? Dunuj gajc ree ma baguiejn ni nax con quijb xti-idxix.

## 23

### *Binë reeman Jesús loj Pilato*

(Mt. 27:1-2, 11-14; Mr. 15:1-5; Jn.18 :28-38)

<sup>1</sup> Dxel wajs gra reeman binë reeman Jesús loj Pilato.

<sup>2</sup> Yagaj guzuloj cutedia' reeman Jesús lojman, rëb reeman:

—Badxaaglojn xin guie cusquieex Bén du ladx ree, rëbix guial ad rayalt yadijx ree impuest loj rey César, rëb tëëx guial laax naj Cristo, naj tëëx rey.

<sup>3</sup> Dxel gunabdiidx Pilato lojman rëbaman:

—¿Lüjn naj xrey ree Bén Israel ya?

Badxi' Jesús laan, rëbaman:

—Waliquil, najcan.

<sup>4</sup> Dxel rëb Pilato loj ree bixhioz rniabee ree bixhioz në loj gra ree Bén riga' yagaj:

—Achet xfalt xin guie radxejlan.

<sup>5</sup> Per laa reeman naguiejnczi rüjn reeman, rëb reeman:

—Cusquieex bejn ree guidib niz Judea con ree ni rulüüx laa reeman. Guzulojx niz Galilea abi' yan cayüjnx zian niz guie.

### *Binë reeman Jesús loj Herodes*

<sup>6</sup> Chi biguiejn Pilato baza't reeman Galilea, gunabdiidxaman loj reeman bal niz Galilea naj ladx Jesús.

<sup>7</sup> Abi' chi rëb reeman guial najman Bén Galilea, guxhaalaman laaman loj Herodes Bén rniabee Galilea, guial lën ree dxej guin në Herodes za' Jerusalén.

<sup>8</sup> Chi baguiaa Herodes Jesús dád babaaman guial diizd gocli rënman guguaaman laaman guial

bacaagdiajgaman ruza't ree bejn laaman, abi' rbëzaman guguaaman güünman tijb milagr.

<sup>9</sup> Zien ree ni gunabdiidxaman lojman, per Jesús achetczi badxi'man.

<sup>10</sup> Nè ree bixhioz rniabee ree bixhioz za' yagaj con ree mextr rajc ley, ad rucwëëzt rutedia' reeman laaman.

<sup>11</sup> Dxel Herodes con ree xsuldadaman xhiernarajc beennè reeman laaman, baze' reeman laaman, bascajcw reeman laaman lajd zagdxe lasa' ni rajcw ree rey. Zianz baxhaal Herodes guin laaman loj Pilato zatijb.

<sup>12</sup> Abi' dxejzii bazuloj baneenè Herodes Pilato zagdxe, din gocli rdxe'ch lasa' reeman.

*Gunabee reeman guiët Jesús*

*(Mt. 27:15-26; Mr. 15:6-15; Jn. 18 :39-19 :16)*

<sup>13</sup> Dxel bachajg Pilato lasa' ree bixhioz rniabee ree bixhioz con ree guxtis, con ree bén luguiedx guin,

<sup>14</sup> abi' rëbaman loj reeman:

—Bidnèdi xin guie nadi cusquieex bejn ree. Per niz lojdi ma gunabdiidxan lojx abi' achet xfaltix radxejlan zi'c nadi.

<sup>15</sup> Ni'qui Herodes ad badxejlt xfaltix, zeel baxhaalaman laax lon zatijb. Ma baguiaalojdi achet ni mal beenx din guiëtix.

<sup>16</sup> Yan, gudëdan laax casti dxel guslaan laax.

<sup>17</sup> Lën ree dxej lanij guin ruslaa Pilato tijb bén yu' ladxguiib zi'c goc xcostumbr reeman.

<sup>18</sup> Per graczi reeman guzuloj rbixdiaj, rëb reeman:

—¡Bagüjt xin guin! ¡Baslaa Barrabás!

19 Badxe' reeman Barrabás guin ladxguiib guial beenman tijb wadijl Jerusalén, guial guzujman contr ree suldad rom, në guial bagüjtaman bejn.

20 Guneenë Pilato laa reeman zatijb guial guyënman nuslaaman Jesús,

21 per laa reeman gurixdiaj reeman mazri rejs, rëb reeman:

—¡Bacaax loj crüjz! ¡Bacaax loj crüjz!

22 Ni bayon volt rëb Pilato loj reeman:

—¿Xhieza ni mal been xin guin? Achet xfaltix radxejlan din guiëtix. Gudëdan laax casti dxel guslaan laax.

23 Per laa reeman mazri rbixdiaj reeman, rëb reeman loj Pilato din gucaaman laaman loj crüjz. Abi' guial tant rbixdiaj reeman con ree bixhioz rniabee ree bixhioz, been reeman gan gojc zi'c rën reeman.

24 Dxel cwëjb Pilato beenman zi'c rën reeman.

25 Abi' baslaaman Barrabás bën guyu ladxguiib por wadijl në guial bagüjtaman bejn, guiáad Jesús bayüman laaman loj reeman persi beennë reeman laaman zi'ctzi rën reeman.

*Baca reeman Jesús loj crüjz*

*(Mt. 27:32-44; Mr. 15:21-32; Jn.19 :17-27)*

26 Chi zinë reeman Jesús din gucaa reeman laaman loj crüjz, gunaaz reeman tijb bën za Cirene laaman Simón. Ziaadaman bazaman dajn, gunabee reeman laaman güüman xcrüjz Jesús din chinalaman laaman.

27 Zien da't bejn zinal laaman, abi' zien ree béngunaa roon rbixdiaj guial raya reeman laaman.

28 Per baguiaa Jesús loj reeman abi' rëbaman:

—Béngunaa Jerusalén ad roondi por naj, gol biin por lèjt gajc nè por xi'ndi.

<sup>29</sup> Din zadxin dxej guiëbidi: “Xiquilbaa ree béngunaa ad rajct ru xi'n, nè ree béngunaa ad gojlt xi'n con ree béngunaa ad ca't bindobèz.”

<sup>30</sup> Dxel suloj guiëb ree bejn loj ree guia': “Gol guxa't du guiican”, guiáad loj ree lom guiëb reeman: “Gol baquie'ch dunujn.”

<sup>31</sup> Yan, nacli naj rüjnnë reeman zian, diidxgui lèjt, wed xhieczinin güünnë reeman lèjt.

<sup>32</sup> Abi' nè tio'p ree xingubaan zinë reeman din tia reex loj crüz con Jesús.

<sup>33</sup> Chi bidxin reeman lod la Calaver, bacaa reeman Jesús loj crüz, con grop ree xingubaan guin: tijbix cwa ladbee zatijbix cwa ladruvejs.

<sup>34</sup> Abi' chi cucaa reeman Jesús loj crüz, rëbaman:

—Dad, been reeman perdon, din ad ragbeet reeman xhienin rüjn reeman.

Dxel gudxijt ree suldad suert guijc xabaman din yala' reex laan.

<sup>35</sup> Zien ree bejn riga' yagaj cuguiaa reeman, abi' xt ree guxtis ruze' laaman, rëb reeman:

—Baslaax ben ren ree, yan guslaa laagajquix bal walix laax naj Cristo.

<sup>36</sup> Nè ree xin suldad ruze' laaman, rbig reex rudëed reex vinagr guië'man,

<sup>37</sup> rëb reex lojman:

—Bal lüj naj xrey ree bén Israel, baslaa lüj gajc.

<sup>38</sup> Abi' guijc crüz guin bacaa reex lèjtr con diidx grieg, diidx latin, nè diidx hebreo, rëban: “Bén guie naj xrey ree bén Israel.”

<sup>39</sup> Tijb xingubaaan ni ca loj crüzj guin guneex diidxguijdx loj Jesús, rëbix:

—Bal lüj naj Cristo, baslaa lüj gajc, baslaa tëë dunujn.

<sup>40</sup> Per zatijbix gudilë xcompniarix, rëbix lojx:

—¿Staczi ad rdxebtil Dios ya majsi lasa'gajc casti guin cadëdil?

<sup>41</sup> Dunuj rayalczi cayzaagdiaj din zian cay-dijx ni baguieen. Per bën guie achetctzi ni mal wayüjnman.

<sup>42</sup> Dxel rëbix loj Jesús:

—Basaaladx naj chi ma canabeel.

<sup>43</sup> Abi' rëb Jesús lojx:

—Diidxli rnin lojl guial yandxej gajc sunël naj lod naj nix, lod gan.

### *Güjt Jesús*

*(Mt. 27:45-56; Mr. 15:33-41; Jn.19 :28-30)*

<sup>44</sup> Chi gol garol dxej, bicajy guidibczi guidxliuj xt raca choon wadxe.

<sup>45</sup> Bicajy logbijdx guiáad lajd nal lën yadooro' Jerusalén goxya'n, gojcan tio'p lala'.

<sup>46</sup> Dxel gurixdiaj Jesús, rëbaman:

—Dad, lojl rusa'n da sprijtan.

Chi gulox guneeman zian, dxel güjtaman.

<sup>47</sup> Chi baguiaa suldad rniabee ree suldad ni goc, baza'tix Dios zagdxe, rëbix:

—Walican achet xtol bën guin yu'.

<sup>48</sup> Chi baguiaa gra ree bën za' yagaj ni goc, dád guyunaya reeman zia reeman riga'pgaj luxdoo reeman.

<sup>49</sup> Per gra ree bën nünbee Jesús, con ree bégunaa nal laaman diizd Galilea, zijt guzuj reeman baguiaa reeman gra ree ni goc.

*Biguie'ch Jesús**(Mt. 27:57-61; Mr. 15:42-47; Jn.19 :38-42)*

<sup>50</sup> Guyu tijb bejn, brii lajman Xiëb, gojcaman benza'c, beenman zi'c rayal. Gojc ladxaman guiedx Arimatea tijb guiedx naaz Judea. Gojc tëëman tijb xguxtis ree bën Israel.

<sup>51</sup> Nëman rbëz nabee Dios, abi' ad nëtaman bachajg xixgab ree bën bagüjt Jesús.

<sup>52</sup> Wejman loj Pilato bignabaman xcuerp Jesús.

<sup>53</sup> Chi gulox baletaman xcuerp Jesús loj crüjz guin, cwa'man laaman batüübaman tijb lajd, dxel biquie'chaman laaman lën tijb baa ni bidëën lën guiaj lod achutczu waguie'ch.

<sup>54</sup> Dxej guin rüjn reeman porvinid gra par dxej raziiladx ree bejn. Zamer suloj dxej guin chi biquie'ch reeman Jesús.

<sup>55</sup> Abi' ree béngunaa zidnä Jesús diizd Galilea, në reeman binal abi' baguiaa reeman xbaa Jesús baguiaa tëë reeman xhienaag gudijxh reeman xcuerpaman.

<sup>56</sup> Chi bayejc reeman, zianz beenchaaw reeman perfum në zaj ni rliaa nejxh ni guidëëbaman. Dxel baziiladx reeman dxej raziiladx ree bejn zi'c rni-abee ley.

**24***Raban Jesús**(Mt. 28:1-10; Mr. 16:1-8; Jn.20 :1-10)*

<sup>1</sup> Chi dumingw rsildoo, wej ree béngunaa guin ro' xbaa Jesús binë reeman perfum ni beenchaaw reeman.

<sup>2</sup> Chi bidxin reeman yagaj, baguiaa reeman guiaj ni bida'cw ro' baa guin ad naga'tri xluaran.



<sup>3</sup> Abi' guyu reeman, per ad bidxaaglojtri reeman xcuerp Dad Jesús.

<sup>4</sup> La'tzi cadxeb reeman ni'quid radxejlt xhie güün reeman, dxejczy baguiaa reeman tio'p ree bejn za'li reeman gajxh lod za' reeman, najcw reeman lajd bacha'.

<sup>5</sup> Abi' guial tant bidxeb reeman, basajb loj reeman xt luyuj, dxel rëb ree bën guin loj reeman;

—¿Chexc zeel raguuilidi tijb bën naban loj ree bengüt?

<sup>6</sup> Achutri laaman guie din ma babanman. Gol basaaladx ni naman lojdi chi guzuman niz Galilea.

<sup>7</sup> Naman lojdi guial yayü reeman Bén guxhaal Dios loj ree bëndol din gucaa reeman laaman loj crüjz, abi' ni yayon dxej yabanman.

<sup>8</sup> Dxel basaaladx reeman diidx ni rëb Jesús loj reeman,

<sup>9</sup> abi' chi baza reeman ro' baa guin, bicojn reeman guidxiptib ree xi apóstoles Jesús në los demazri ree xcompniar reeman gra ni baguiaa reeman.

<sup>10</sup> María Magdalena, con Xuan, con Li xniaa Jacob con ree béngunaa ren, laa reeman bigné rusion guin loj ree xi apóstoles Jesús.

<sup>11</sup> Per laa reeman ad bililadxt reeman ni rëb ree béngunaa guin, gunaladx reeman wed rëbzi reeman.

<sup>12</sup> Per Bëd baxüünman biquiaaman lën baa guin, abi' chi baguiaaman lën baa guin, lajd ni bidüübzi Jesús baguiaaman, zianz ziaman dád radxalojman por ni goc.

*Baliüloj Jesús loj tio'p ree xbejnman  
(Mr. 16:12-13)*

<sup>13</sup> Dxej guin gajc, tio'p ree xbejn Jesús zë tijb guiedx la Emaús, raya'nan zi'ct chiptib kilometro par Jerusalén.

<sup>14</sup> Chi zë reeman lunejz cayü reeman diidx xcwent gra ree ni goc.

<sup>15</sup> La'tgaj cayü reeman diidx, gubig Jesús cwë' reeman abi' guzuloj cazanëman laa reeman.

<sup>16</sup> Per majsi cuguiaa reeman laaman, yu' ni badxoon nayünbee reeman laaman.

<sup>17</sup> Dxel gunabdiidx Jesús loj reeman, rëbaman:

—¿Xhie diidxan rüdi la'tgaj cazadi? ¿Chexc zeel yu'nayadi?

<sup>18</sup> Badxi' tijb bén la Cleofas laan, rëbaman:

—Gra ree bejn ragbee ni goc Jerusalén lën ree dxej guie. ¿Wen tijbzi lüj naj bén guzu Jerusalén ad gogbeetil ni goc ya?

<sup>19</sup> Dxel rëbaman loj reeman:

—¿Xhie goc?

Abi' rëb reeman:

—Ni beennë reeman Jesús bén Nazaret, laaman goc tijb bén badëë xtiidx Dios loj ree bejn, bén gop guialrniabee zi'c ni beenman në ree diidx ni guneeaman niz loj Dios në niz loj ree bejn.

<sup>20</sup> Në guial bayü ree bixhioz rniabee ree bixhioz laaman në ree dux guxtis ree din guiëtaman, abi' bacaa reeman laaman loj crüjz.

<sup>21</sup> Par dunujn laaman naj bén yabëë ree bén Israel loj ree bén rom, per yan gojc choon dxej ni goc ree ni guin.

22 Majsi tio'p choon ree béngunaa no'ch du lojn bachejb reeman dunujn, guial rsildoo wej reeman ro' baa guin,

23 abi' guial ad baguiaat reeman xcuerpaman, bayejc reeman rü reeman diidx guial balüüloj ree anjl loj reeman, rëb ree anjl guin loj reeman guial naban Jesús.

24 Laa biquiaa gajc ree tio'p choon ree dux compniaran ro' baa guin abi' baguiaa reeman zi'cgajczi rëb ree béngunaa guin, per ad baguiaat reeman Jesús.

25 Dxel rëb Jesús loj reeman:

—iXi nawëëg naj chignia'di abi' xi raglaa par chililadxidi gra ni gunee ree bén badëë xtiidx Dios loj ree bejn!

26 ¿Wen id naj ya guial sagdiaj Cristo, dxelri yayë'paman xanyabaa?

27 Dxel guzuloj cusignia'man laa reeman ni rën guiëb ni ca loj xtiidx Dios xcwentaman. Guzuloj-man con ree xlibr Moisejs abi' basnuuman con gra ree libr ni bacaa ree bén badëë xtiidx Dios loj ree bejn.

28 Chi bidxin reeman guiedx lod zë reeman, been Jesús zi'c bén che mazri zijt.

29 Per laa reeman been reeman naguiejn din yaya'nnëman laa reeman, rëb reeman lojman:

—Baya'n con dunujn, din ma gudxe yan abi' ma cabej guiaal.

Dxel guyu Jesús persi baya'nnëman laa reeman.

30 Abi' chi zojbnëman laa reeman xan mex, cwa'man guiadxtil abi' chi gulox badëëman quix-tëë loj Dios, gula'man laan persi badëëman laan loj reeman.

<sup>31</sup> Hor guin gajc guzajc reeman zi'c b́en baxal guiaaloy, abi' bayünbee reeman laaman. Per laa gunidloy gajcaman,

<sup>32</sup> zianz rēb loj lasa' reeman:

—ǐZe'cliza dád nix yu' du luxdoo chi zudnē'man lunejz, chi cusignia'man dunuj ni rēb loj xtiidx Dios!

<sup>33</sup> Abi' ni'quid gulējzt reeman, laa bayunejz gajc reeman zia reeman Jerusalén lod riga' guidxiptib ree xi apóstoles Jesús con ree xcompniar reeman.

<sup>34</sup> Rēb reeman loj grop ree b́en guin:

—Walican ma baban Dad Jesús, ma balüüloyman loj Simón.

<sup>35</sup> Zianz be reeman diidx ni guzac reeman chi zē reeman lunejz xhie tēē naag bayünbee reeman Jesús chi gula'man guiadxtil.

*Balüüloy Jesús loj ree xbejnman*

*(Mt. 28:16-20; Mr. 16:14-18; Jn.20 :19-23)*

<sup>36</sup> Sta cayü reeman diidx xcwent ree ni guin, chi balüüloy Jesús galay reeman, rēbaman:

—Yabe'cdxe Dios luxdoodi.

<sup>37</sup> Dád badxaloy reeman abi' bidxeb reeman guial gunaladx reeman anman cuguiaa reeman.

<sup>38</sup> Per rēb Jesús loj reeman:

—ǐChexc zeel rdxebidi? ǐChexc zeel yu'nawēēg luxdoodi?

<sup>39</sup> Gol baguiaa yan nē guia'n. Naj gajcan, gol baqui' naj gol baguiaa tēē naj, din tijb anm ad yu'taman dxijt ad ca tētaman bēēl zi'c ruguiaadi naj.

<sup>40</sup> Chi rēbaman zian, balüü yaaman nē guia'man.

41 Per laa reeman staczi ad rliladxt reeman guial tant rabaa reeman radxa tëë loj reeman, abi' rëbaman loj reeman:

—¿Rajpidi ta'n guialraw ya?

42 Dxel badëë reeman tibia' bëjl biguie',

43 abi' cwa'man laab gudawaman niz loj reeman.

44 Zianz rëbaman loj reeman:

—Ni ma guza'can naj ni rnin lojdi chi sta za'n con lëjt: Guial naj gac gra ree ni ca loj xlibr Moisejs ni gaza'can, në xlibr ree bën badëë xtiidx Dios loj ree bejn, në loj libr salmos.

45 Dxel guxhalaman xquiarguejn reeman persi bignia' reeman ni ca loj xtiidx Dios,

46 abi' rëbaman loj reeman:

—Loj xtiidx Dios rëb guial Cristo, naj guial guiëtaman, abi' ni yayon dxej yabanman.

47 Abi' diizd Jerusalén suloj guire'ch xtiidxaman xt guidib loj guidxliuj guial yu' perdon par gra ree bën yayüjn xgab por xtol guililadx tëë reeman naj.

48 Lëjt naj testiw xcwent gra ree ni guin.

49 Naj gaxhal par lëjt ni ma na da Dadan. Per gol guzujsii luguiedx Jerusalén xt tia'di guialrniabee ni gui't diizd xanyabaa.

*Bayë'p Jesús xanyabaa*  
(Mr. 16:19-20)

50 Dxel briinë Jesús laa reeman luguiedx Jerusalén binëman laa reeman gajxh Betania, zianz gules yaaman beenle'man laa reeman.

51 Abi' la'tgaj cayüjnle'man laa reeman, wajsaman ziaman xanyabaa.

<sup>52</sup> Chi gulox bazuxib reeman badëë reeman quixtëë lojman, dxel zia reeman Jerusalén, dád rabaa reeman.

<sup>53</sup> Abi' guixie guixie yu' reeman lën yadooro' Jerusalén ruza't reeman Dios zagdxe rudëëd tëë reeman quixtëë lojman.

**Xtiidx Dios**  
**New Testament in Zapotec, Santo Domingo Albarradas**  
**(MX:zas:Zapotec, Santo Domingo Albarradas)**

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

**Copyright Information**

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Santo Domingo Albarradas

**© 2010, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

fb4ebcb8-e1f4-5bfc-b08c-f590e137d86d